



改廿三字丁卯

戊寅十月三日寓安隱菴朱筆點勘一遍

齊本紀下第五



南史五



李延壽

廢帝鬱林王諱昭業字元尚小字法身文惠太子長子也  
 高帝為相王鎮東府時年五歲牀前戲高帝方令左右拔  
 白髮問之曰兒言我誰耶荅曰太翁高帝笑謂左右曰豈  
 有為人作會祖而拔白髮者乎即擲鏡鑷其後問訖高帝  
 指示賓客曰我基於此四世矣及武帝即位封為南郡王  
 時年十歲永明五年十一月戊子冠於東宮崇正殿其日  
 小會賜王公以下帛各有差給南郡王扶二人七年有司  
 奏給班劍三十人鼓吹一部高選友學禮絕群王十一年

給皂輪三望車文惠太子薨立南郡王爲皇太孫居東宮  
其年七月戊寅武帝崩皇太孫即帝位大赦八月壬午詔  
稱墳詔以護軍將軍武陵王曄爲衛將軍征南大將軍陳  
顯達即本號並開府儀同三司以尚書左僕射西昌侯鸞  
爲尚書令右僕射王晏爲左僕射吏部尚書徐孝嗣爲右  
僕射癸未加司徒竟陵王子良位太傅增班劍三十人蠲  
除三調及衆逋在今年七月三十日以前者省御府及無  
用池田邸治減關市征稅先是每有蠲原之詔多無事實  
督責如故是時西昌侯鸞任知朝政天下咸望風來蘇至  
此恩信兩行海內莫不欣欣九月辛酉追尊文惠皇太子

爲世宗文皇帝冬十月壬寅尊皇太孫太妃爲皇太后立

皇后何氏十一月庚戌魏人來聘辛亥立臨汝公昭文爲

新安王曲江公昭秀爲臨海王皇弟昭粲爲永嘉王

隆昌元年春正月丁未大赦改元加太傅竟陵王子良殊

禮鎮軍將軍西昌侯鸞即本號爲大將軍給鼓吹一部親

兵五百人以領軍都陽王錡爲尚書右僕射詔百僚極陳

得失又詔王公以下各舉所知辛亥祀南郊省隆昌元年

以來流人戊午拜崇安陵甲戌使司徒參軍劉敷聘于魏

二月辛卯祀明堂夏四月辛巳衛將軍開府儀同三司武

陵王曄薨戊子太傅竟陵王子良薨丁酉以驃騎將軍廬

陵王子卿為衛將軍尚書右僕射鄱陽王鏘為驃騎將軍  
並開府儀同三司閏月丁卯以鎮軍大將軍西昌侯鸞即  
本號開府儀同三司五月甲戌朔日有蝕之秋七月癸巳  
皇太后令廢帝為鬱林王帝少美容止好隸書武帝特所  
鍾愛敕皇孫手書不得妄出以貴之進退音吐甚有令譽  
生而為竟陵文宣王所攝養常在衣妃間竟陵王移住西  
州帝亦隨住焉性甚辯慧哀樂過人接對賓客皆款曲周  
至矯情飾詐陰懷鄙慝與左右無賴群小二十許人共衣  
食同卧起如何氏擇其中美貌者皆與交歡密就富市人  
求錢無敢不與及竟陵王移西邸帝獨住西州每夜輒開

後堂閣與諸不逞小人至諸營署中淫宴凡諸小人並逆  
加爵位皆疏官名號於黃紙使各囊盛以帶之許南面之  
日即便施行又別作箭筒兼善教人書每私出還輒扇箭  
封題如故故人無知者師史仁祖待書胡天翼聞之相與  
謀曰若言之二宮則其事未易若於營署為異人所毆打  
及犬物所傷豈直罪止一身亦當盡室及禍年各已七十  
餘生寧足吝邪數日中二人相係自殺二宮不知也武帝  
以旣陽縣寒人給事中蔡丹珍之代仁祖剡縣寒人馬澄  
代天翼文惠太子每禁其起居節其用變帝謂豫章王妃  
庾氏曰阿婆佛法言有福生帝王家今見作天王便是大

南齊書卷五  
罪左右主帥動見拘執不知市邊屠酤富兒百倍文惠太子自疾及薨帝侍疾及居喪哀容號毀旁人見者莫不嗚咽裁還私室即歡笑酣飲備食甘滋葬畢立為皇太孫問訖太妃截壁為閣於太妃房內往何氏間每入輒彌時不出武帝往東宮帝迎拜號慟絕而復蘇武帝自下輿抱持之寵愛日隆又在西州令女巫楊氏禱祀速求天位及文惠薨謂由楊氏之力倍加敬信呼楊婆宋氏以來人間有楊婆兒哥蓋此徵也武帝有疾又令楊氏日夜禱祈令宮車早晏駕時何妃在西州武帝未崩數日疾稍危與何氏書紙中央作一大喜字而作三十六小喜字繞之侍武帝

疾憂容慘感言發淚下武帝每言及存亡帝輒哽咽不自勝武帝以此謂為必能負荷大業謂曰五年中一委宰相汝勿厝意五年以後勿復委人若自作無成無所多恨臨崩執帝手曰阿奴若憶公羽當好作如此再而崩大斂始畢乃悉呼武帝諸伎備奏衆樂諸伎雖畏威從事莫不哽咽流涕素好狗馬即位未逾旬便毀武帝所起招婉殿以材賜閹人徐龍駒於其處為馬枵馳騎墜馬面額並傷稱疾不出者數日多聚名鷹快犬以梁肉奉之及武帝梓宮下渚帝於端門內奉辭輶輦車未出端門便稱疾還內裁入閣即於內奏胡伎鞞鐸之聲震響內外時司空王敬則問

新除射聲校尉蕭坦之曰便如此不當忽忽邪坦之曰此政是內人天響徹耳自山陵之後便於閣內乘內人車問訖往皇后所生母宋氏間因微服游走市里又多往文帝崇安陵隧中與群小共作諸鄙褻擲塗賭跳放鷹走狗雜狡獪帝既失道朝事大小皆決之西昌侯鸞鸞有諫多不見從極意鸞左右動至百數十萬每見錢曰我昔思汝一箇不得今日得用汝矣武帝聚錢上庫五億萬齋庫亦出三億萬金銀布帛不可稱計即位未暮歲所用已過半皆賜與諸不逞群小諸寶器以相擊剖破碎之以為笑樂及至廢黜府庫悉空其在內常裸袒著紅紫錦繡新衣錦

帽紅縠褲雜采袒服好鬪雞亦買雞至數千價武帝御物甘草杖宮人寸斷用之徐龍駒為後宮舍人日夜在六宮房內帝與文帝幸姬霍氏淫通改姓徐氏龍駒勸長留宮內聲云度霍氏為尼以餘人代之皇后亦淫亂齋閣通夜洞開內外淆雜無復分別中書舍人蔡母珍之朱隆之直閣將軍曹道剛周奉叔並為之羽翼西昌侯鸞屢諫不納既而尼媪外入頗傳異語乃疑鸞有異志中書令何胤以皇后從叔見親使直殿省常隨后呼胤為三父與胤謀誅鸞令胤受事胤不敢當休違杜諫乃止又謀出鸞於西州中敕用事不復閑諮鸞慮變先使蕭湛坦之等於省誅曹

道剛朱隆之等率兵自尚書省入雲龍門戎服加朱衣於  
出此入門三失履王晏徐孝嗣蕭坦之陳顯達王廣之沈  
文季係進帝在壽昌殿裸身與霍氏相對聞外有變使開  
內殿諸房閣令闔人登興光樓望還報云見一人戎服從  
數百人急裝在西鍾樓下須臾蕭湛領兵先入宮帝走向  
愛姬徐氏房拔劍自刺不入以帛纏頸輿接出延德殿湛  
初入殿宿衛將士皆衛執弓楯欲戰湛曰所取自有入卿  
等不須動宿衛信之及帝出各欲自奮帝竟無一言出西  
弄遇弒年二十二昇尸出徐龍駒宅殮葬以王禮霍氏及  
廣昌君宋並賜死餘黨亦見誅先是文惠太子立樓館於

鍾山下號曰東田太子屢游幸之東田反語也武帝  
帝又於青溪立宮號曰舊宮反之窮既也果以輕狃而至  
於窮又武帝時有小史姓名太子武帝曰皇太子非名  
之謂於是移點於外易名為太子處士何點曰太子者天  
地之所懸三才之所係今化而為犬不得立矣既而文惠  
太子薨鬱林海陵相繼廢黜此其驗也永明中百姓忽著  
破後帽始自建業流于四遠貴賤翦然服之此服杖也帽  
自蕭湛之家其流遂遠天意若曰武穆文昭皆當滅而湛  
亦誅死之効焉

廢帝海陵恭王諱昭文字季尚文惠太子第二子也永明

四年封臨汝公鬱林王即位改封新安王及鬱林廢西昌侯鸞奉帝纂統延興元年秋七月丁酉皇帝即位大赦改元賜文武位二等以鎮軍大將軍西昌侯鸞為驃騎大將軍開府儀同三司錄尚書事都督揚州刺史加班劍為三十人封宣城郡公出鎮東城以尚書左僕射王晏為尚書令以丹陽尹徐孝嗣為左僕射以領軍將軍沈文季為右僕射以車騎大將軍陳顯達為司空以驃騎大將軍鄱陽王錡為司徒命宣城公鸞甲仗百人入殿陳顯達王晏徐孝嗣蕭詵各五十人入殿八月壬辰魏人來聘甲午以前司空王敬則為太尉辛丑復置南蠻校尉官甲辰詔使者

觀省風俗九月癸未誅新除司徒鄱陽王錡中書大將軍隨王子隆遣平西將軍王廣之誅南兖州刺史安陸王子敬於是江州刺史晉安王子懋起兵遣中護軍王玄邈討誅之乙酉又誅湘州刺史南平王鈺益州刺史晉熙王鉉南豫州刺史宜都王鏗丁亥以衛將軍廬陵王子卿為司徒以撫軍將軍桂陽王鏐為中軍將軍開府儀同三司冬十月丁酉加宣城公鸞黃鉞進授都督中外諸軍事太傅領大將軍揚州刺史加殊禮進爵為王戊戌誅新除中軍將軍桂陽王鏐撫軍將軍衡陽王鈞侍中秘書監江夏王鋒鎮軍將軍建安王子真左將軍巴陵王子倫是時宣城

王鸞輔政帝起居皆諮而後行思食蒸魚菜太官令荅無  
錄公命竟不與辛亥皇太后令廢帝為海陵王使宣城王  
入纂皇統建武元年詔海陵王依漢東海王彊故事給虎  
賁旌頭畫輪車設鍾簾宮縣十一月稱王有疾數遣御師  
往視乃殞之給溫明秘器斂以衾冕之服大鴻臚監護喪  
事葬給輜輶車九旒大輅黃屋左纛前後部羽葆鼓吹挽  
歌二部依東海王彊故事謚曰恭先是武帝立禪靈寺於  
都下當世以為壯觀天意若曰禪者禪也靈者神明之目  
漢文帝晏駕而鼎業傾移也宋明世市里小兒以鐵相擊  
於地謂之關鑿鑿之為言族也至是宗室族滅矣又武帝

時以燕支為朱衣朝士皆服之及明帝以宗子入纂比又  
奪朱之效也時又多以生紉為帽半其裾而析之號曰倚  
勸先是人間語好云擾攘建武至是朝士勸進實為怨遽  
倚勸擾攘之言於是驗矣

高宗明皇帝諱鸞字景栖始安貞王道生之子也小字玄  
度少孤高帝撫育過諸子宋泰豫元年為吉吉令有嚴能  
之名昇明中累遷淮南宣城二郡太守進號輔國將軍高  
帝踐祚封西昌侯位郢州刺史宋明元年為侍中領驍騎  
將軍王子侯舊乘纒帷車帝獨乘下帷儀從如素士公事  
混撓取食人擔火誤燒牛鼻豫章王以白武帝帝笑焉轉

為散騎常侍左衛將軍清道而行十年累遷尚書左僕射  
領右衛將軍武帝遺詔為侍中尚書令尋加鎮軍將軍給  
班劍二十人隆昌元年即本號為大將軍給鼓吹一部親  
兵五百人尋加中書監開府儀同三司海陵王立為驃騎  
大將軍錄尚書事揚州刺史加都督增班劍為三十人封  
宣城郡公鎮東府城給兵五千人錢二百萬布千匹九江  
事難假黃鉞事寧表送之尋加黃鉞都督中外諸軍事太  
傅領大將軍揚州牧增班劍為四十人給幢絡三望車前  
後部羽葆鼓吹劔履上殿入朝不趨贊拜不名置左右長  
史司馬從事中郎掾屬各四人封宣城王末拜太后令廢

海陵王以上入纂高帝為第三子群臣三請乃受命建武  
元年冬十月癸亥皇帝即位大赦改元文武賜位三等以  
太尉王敬則為大司馬以司空陳顯達為太尉乙丑詔斷  
遠近上禮丁卯詔自今雕文篆刻歲時光新可悉停省藩  
牧守宰或有薦獻事非任土嚴加禁斷十一月壬申日有  
蝕之帝宿沐浴不御內其日潔齋蔬食斷朝務屏人單衣  
怡危坐以至事畢追尊始安貞王為景皇帝江氏為懿后  
別立寢廟號陵曰脩安封桂陽王鐸等諸王子皆為列侯  
凡諸王侯得罪者諸子皆復屬籍又詔遣大使觀省四方  
癸酉革永明之制依晉宋舊典太子以師禮敬少傅甲戌

進大司馬尋陽公王敬則等十三人爵邑各有差省新林苑先是百姓地者悉以還主廢南蠻校尉官己卯追崇妃劉氏為敬皇后號陵曰興安庚辰立皇子寶義為晉安王寶玄為江夏王寶源為廬陵王寶當為建安王寶融為隨郡王寶攸為南平王甲申斷官長貢獻及私餉遺以安陸昭王緬第二子寶暄襲封安陸王丁亥詔細作中署材官車府凡諸工可悉開番假遞令休息戊子立皇子寶卷為皇太子賜天下為父後者爵一級己丑詔東宮肇建遠近或有廢禮可悉斷之永明中御史中丞沈深表百官年登七十者皆令致仕並窮困私門庚子詔自縉紳年及可一

遵永明七年以前銓叙之科十二月庚戌宣德右僕劉朗之游擊將軍劉瑒之子坐不贍給兄子致使隨母他嫁免官禁錮終身付之鄉論是歲魏孝文皇帝遷都洛陽

二年春正月辛未降都下繫囚殊死以下詔王公以下各舉所知內外群僚各進忠言無有所諱魏攻豫司徐梁四州壬申遣鎮軍王廣之督司州右衛將軍蕭坦之督徐州尚書右僕射沈文季督豫州以拒魏己卯詔都下二縣有毀發墳壠隨宜修理乙未魏軍攻鍾離徐州刺史蕭惠休破之丙申加太尉陳顥達使持節都督西北道諸軍事丁酉內外纂嚴三月己未司州刺史蕭誕與衆軍攻敗魏軍

詔雍豫司南兗徐五州遭遇兵戎之家悉停今年稅調丙寅停青州麥租魏軍自壽春退甲申解嚴夏四月己亥朔親錄三百里內獄訟自外委州郡訖察三署徒隸原遣有差魏軍圍漢中梁州刺史蕭懿拒退之五月甲午寢廟成詔監作長帥賜位一等六月壬戌誅領軍蕭湛西陽王子明南海王子罕邵陵王子貞秋九月己丑改封南平王寶攸為邵陵王蜀郡王子文為西陽王廣漢王子峻為衡陽王臨海王昭秀為巴陵王永嘉王昭繁為桂陽王冬十月癸卯詔罷東田毀光興樓并詔水衡量省御乘乙卯納皇太子妃褚氏大赦王公以下班賜各有差斷四方上禮十

二月丁酉詔晉帝諸陵悉皆修理并增守衛吳晉陵失稔之鄉蠲三調有差

三年春正月丁酉以陰平王楊昱子崇祖為沙州刺史封陰平王二月己巳詔申明守長六周之制事竟不行乙酉詔以去歲魏攻緣邊諸州郡將士有臨陣及病死者並送還本土三月壬午詔車府乘輿有金銀飾者皆剔除之夏四月魏軍攻司州櫟城戍主魏僧塔擊破之冬閏十二月戊寅皇太子冠賜王公以下帛各有差為父後者賜爵一級斷遠近上禮

四年春正月庚午大赦庚辰詔人產子者蠲其父母調役

一年又賜米十斛新婚者蠲夫役一年壬辰誅尚書令王  
 晏三月以尚書左僕射徐孝嗣為尚書令秋八月甲午追  
 尊景皇所生王氏為恭太后魏軍攻沔北冬十月又逼司  
 雍二州甲戌遣太子中庶子蕭衍右軍司馬張稷禦之十  
 一月丙辰以氏楊靈珍為北秦刺史封仇池公武都王十  
 二月丁丑遣度支尚書崔慧景率眾救雍州

永泰元年春正月癸未朔大赦中軍大將軍徐孝嗣即本  
 號關所儀同三司沔北諸郡為魏所攻相繼亡敗新野太  
 守劉巨師巨師應接食盡煮土為粥而救兵不至城被虓死  
 之乙巳遣太尉陳顯達持節救雍州丁未誅河東王鉉臨

賀王子岳西陽王子文衡陽王子岷南康王子琳永陽王  
 子珉湘東王子建南郡王子夏巴陵王昭秀桂陽王昭粲  
 二月癸丑遣左衛將軍蕭惠休假節援壽陽辛未豫州刺  
 史裴叔業敗魏軍於淮北三月丙午蠲雍州遇魏軍之懸  
 租布戌申詔增仲尼祭秩上以疾患不瘳望氣者云宜改  
 元夏四月甲寅大赦改元文武賜位二等己未立武陵昭  
 王子子坦為衡陽王丁丑大司馬會稽太守王敬則舉兵  
 反五月壬午遣輔國將軍劉山陽率軍東討乙酉斬敬則  
 傳首建鄴曲赦浙東吳晉陵等七郡秋七月己酉帝崩于  
 正福殿年四十七遺詔徐孝嗣可重申八命中書監本官

悉如故沈文季可尚書左僕射常侍護軍如故江祐可右僕射江祀可侍中劉暄可衛尉卿軍政大事委陳太尉內外衆事無大小委後孝嗣遙光坦之江祐其大事與沈文季江祀劉暄參懷心腹之任可委劉悛蕭惠休崔慧景群臣上諡曰明皇帝廟號高宗葬與安陵帝明審有吏木持法無所借制御親幸臣下肅清驅使寒人不得用四幅織大存儉約罷武帝所起新林苑以地還百姓廢文惠太子所起東田斥賣之永明中興輦舟乘衆刳取金銀還主衣庫以牙角代之嘗用阜茨訖殺餘樂與左右曰此猶堪明日用太官進御食有嬰燕帝十字畫之曰可四片破之

充晚食而武帝掖庭中宮殿服御一無所改其儉約如此性猜忌亟行誅戮信道術用計數每出行幸先占利害簡於出入將南則詭言之西將東則詭言之北皆不以實竟不南郊初有疾無醫聽覽群臣莫知及疾篤敕臺省府署文簿求白魚以為藥外始知之身衣絳衣服飾皆赤以為厭勝巫覡云後湖水頭經過宮內致帝有疾帝乃自至太官行水溝左右啓太官無此水則不立決意塞之欲南引推流會崩事寢

廢帝東昏侯諱寶卷字智藏明帝第二子也本名明賢明帝輔政後改焉建武元年立為皇太子永泰元年七月己

西明帝崩太子即皇帝位八月庚申鎮北將軍晉安王寶  
 義進號征北大將軍開府儀同三司冬十月己未詔刪省  
 律科癸亥詔蕭坦之江柘更直殿省相監宿衛辛未詔劉  
 暄江柘更直延明殿省十一月戊子立皇后褚氏庚寅尚  
 書令徐孝嗣議王侯貴人昏連登以真銀盃盞出近俗又  
 牢燭修績亦虧曩制今除金銀連鎖自餘新器悉用埏陶  
 牢燭華侈亦宜停之奏可

永元元年春正月戊寅朔大赦改元辛卯祀南郊丁酉改  
 封隨王寶融為南康王武陵王寶暉為湘東王竟陵王昭  
 胄為巴陵王二月太尉陳顯達敗績於馬圈夏四月丙午

朔魏孝文皇帝崩己巳立皇子誦為皇太子大赦賜為父

後者爵一級五月癸亥加撫軍大將軍始安王遙光開府

儀同三司六月甲子詔原雍州今年三調秋七月辛未淮

水變赤如血丙戌殺尚書右僕射江祐侍中江祀地震自

此至來歲晝夜不止小屋多壞丁亥都下大水死者甚衆

賜死者材器並加板恤八月乙巳蠲遇水資射漂蕩者今

年調稅又詔為馬園戰亡將士舉哀丙辰揚州刺史始安

王遙光據東府反詔曲赦都下中外戒嚴遣鎮軍將軍蕭

坦之致討戊午斬遙光傳首己巳以尚書令徐孝嗣為司

空以領軍蕭坦之為尚書左僕射閏月丙子以江陵公寶

覽為始安王九月甲辰殺尚書左僕射蕭坦之右衛將軍  
 曹武戌午殺領軍將軍劉暉壬戌以頻殺大臣大赦冬十  
 月乙未誅尚書令新除司空徐孝嗣右僕射新除鎮軍將  
 軍沈文季庚子以吳興太守蕭惠休為尚書右僕射辛丑  
 以侍中王亮為左僕射十一月丙辰太尉江州刺史陳顯  
 達舉兵反於尋陽乙丑加護軍將軍崔慧景平南將軍督  
 眾軍南討十二月甲申陳顯達至都宮城嚴警已酉斬顯  
 達傳其首殊當重平

二年春正月庚午詔討豫州刺史裴叔業二月己丑叔業  
 病死兄子植以壽春降魏三月乙卯命平西將軍崔慧景

攻壽春夏四月丙午尚書右僕射蕭惠休卒丁未崔慧景  
 於廣陵反舉兵內向壬子命右衛將軍左興盛督都下水  
 步眾軍禦之南徐州刺史江夏王寶玄以京城納慧景乙  
 卯遣中領軍王瑩率眾軍屯北籬門壬戌慧景至瑩等敗  
 績甲子慧景入建業臺城內閉門拒守豫州刺史蕭懿與  
 兵入援己巳以懿為尚書右僕射癸酉慧景奔眾走斬之  
 詔曲赦都下及南徐南兖二州乙亥以新除尚書右僕射  
 蕭懿為尚書令丙子以中領軍王瑩為尚書右僕射五月  
 己酉江夏王寶玄伏誅壬子赦己丑曲赦都下及徐兖二  
 州六月庚寅車駕於樂游苑內會如三元都下放女人觀

秋七月甲申夜宮內火唯東閣內明帝舊殿數區及太極  
以南得存餘皆蕩盡十月己亥殺尚書令蕭懿十一月  
甲寅西中郎長史蕭穎胄起兵於荊州十二月雍州刺史  
蕭衍起兵於襄陽是歲魏宣武皇帝景明元年

三年春正月丙申朔日有蝕之帝與宮人於闕武堂元會  
皇后正位閨人行法俄帝戎服臨視丁酉以驃騎大將軍晉  
安王寶義為司徒以新除撫軍將軍建安王寶寅為車騎  
將軍開府儀同三司乙巳長星見竟天辛亥祀南郊大赦  
詔百官陳讜言二日丙寅乾和殿西廂火壬午詔遣羽林  
兵征雍州中外募盜始內橫吹五部於殿內晝夜奏之壬

戌蚩尤旗見三月乙巳南康王寶融即皇帝位於江陵

癸丑遣平西將軍陳伯之西征六月蕭穎胄弟穎孚起兵

廬陵戊子赦江州安成廬陵二郡秋七月癸巳曲赦荆雍

二州雍州刺史張欣泰前南譙太守王靈秀率石頭文武

奉建安王寶寅向臺至杜姥宅宮門閉乃散走丙辰龍鬬

于達康淮激水五里八月辛卯以太子左率李居士摠督

西討諸軍事屯新亭九月甲辰蕭衍至南豫州輔國將軍

監南豫州事甲冑軍二萬人於姑熟奔歸丙辰李居士與

衍軍戰於新亭見敗十月甲戌王珍國又戰敗於朱雀

航戊寅寧朔將軍徐元瑜以東府城降青翼二州刺史

和入衛屯東宮。帝嘗幸其第，行於是，閉宮城門自守。十二月丙寅，新除雍州刺史王珍國侍中，張稷率兵入殿殺帝。時年十九。帝在東宮，便好書，不喜書學。明帝亦不以為非，但勅以家人之行，令太子求一日再入朝發詔，不許使三日一朝。在宮嘗夜捕鼠，達旦以為笑樂。明帝臨崩，屬後事以隆昌為戒，曰：「作事不可在人後。」故委任群小，誅諸宰臣，無不如意。性訥澀，少言，不與朝士接。欲速葬惠靈在太極殿，徐孝嗣固爭得踰月。每當哭輒云：「喉痛。」太中大夫羊闡入臨，無髮，號慟，俯仰憤遂脫地。帝輟哭大笑，謂宦者王寶孫曰：「此謂禿秋啼來乎？」自江祐始，安王遙光等誅後無所忌憚。

日夜於後堂戲馬，鼓譟為樂。合夕便擊金鼓吹角，令左右數百人叫雜，以羌胡橫吹諸伎常以五更就卧，至晡乃起。王侯以下節朔朝見，晡後方前。或際暗遣出臺閣，案奏月數十日乃報，或不知所在。闔豎以紙包裹魚肉還家，並是五省黃案。二年元會，食後方出朝賀。裁竟便還殿西序，寢自巳至申，百僚陪位皆僵仆。菜色比起，就會忽遽而罷。太子所生母黃貴嬪早亡，令潘妃母養之。拜潘氏為貴妃，乘卧輿，帝騎馬從後，著織成袴褶，金薄帽，執七寶縛鞘。又有金銀校具，錦繡諸帽數十種，各有名字。戎服急裝，縛袴上著絳紵，以為常服。不變寒暑。陵冒雨雪不避。阮奕馳騁渴

乏輒下馬解取腰邊蠶器酌水飲之復上馳去馬乘具用  
錦繡處患為兩所濕織雜米珠為覆蒙備諸雕巧教黃門  
五六十人為騎客又選營署無賴小人善走者為逐馬鷹  
犬左右數百人常以自隨奔走往來略不暇息置射雉場  
二百九十六處翳中帷帳及步障皆袷以綠紅錦金銀鏤駝  
牙瑇瑁帖箭每出輒與鷹犬隊主徐令孫媿翳隊主俞靈  
韻齊馬而走左右爭逐之又甚有筋力牽弓至三斛五斗  
能擔幢初學擔幢每傾倒在幢杪者必致跌傷其後白虎  
幢七丈五尺齒上擔之折齒不倦擔幢諸校具服飾皆自  
製之綴以金華玉鏡衆寶舍人主書及至左右主帥並皆

侍側逞諸變態曾無愧顏始欲騎馬未習其事俞靈韻為  
作木馬人在其中行動進退隨意所適其後遂為善騎陳  
顯達卒漸出游走不欲令人見之驅斥百姓唯置空宅而  
已是時率一月二十餘出既往無定處尉司常慮得罪東  
行驅西南行驅北應旦出夜便驅逐吏司奔驅叫呼盈路  
打鼓蹋圍鼓聲所聞便應奔走臨時驅迫衣不暇披乃至  
徒跣走出犯禁者應手格殺百姓無復作業終日路隅從  
萬春門由東宮以東至郊外數十里皆空家盡室巷陌縣  
慢為高障置人防守謂之屏除高障之內設部伍羽儀復  
有數部皆奏鼓吹羗胡伎鼓角橫吹夜反火光照天每三

四更中鼓聲四出幡戟橫路百姓喧走士庶莫辨或於市肆左側過親幸家環繞宛轉周徧都下老小震懼啼號塞道處處禁斷不知所過疾患困篤者悉捆移之無人捆者扶匍道側吏司又加撞打絕命者相係從騎及左右因之入富家取物無不蕩盡工商莫不廢業樵蘇由之路斷至於乳婦昏姻之家移產寄室或與病棄屍不得殯葬有棄病人於青溪邊者吏懼為監司所問推置水中泥覆其面須臾便死遂失骸骨前魏興太守王敬賓新死未斂家人被驅不得留視及家人還鼠食兩眼都盡如此非一又嘗至沈公城有一婦人當產不去帝入其家問何獨在荅曰

臨產不得去因剖腹看男女又長秋卿王儼病篤不聽停家死於路邊丹陽尹王志被驅急狼狽步走惟將二門生自隨藏朱雀航南酒壚中夜方得羽儀而歸喜游獵不避危險至蔣山定林寺一沙門病不能去藏於草間為軍人所得應時殺之左右韓暉光曰老道人可念帝曰汝見麀鹿亦不射邪仍百箭俱發故貴人富室者皆數處立宅以為避圍之舍每還宮常至三更百姓然後得反禁斷又不即通處處屯咽或泥塗灌注或冰凍嚴結老幼啼號不可聞見時人以其所圍處號為長圍及建康城見圍亦名長圍識者以為讖焉三年殿內火合夕便發其時帝猶未還

宮內諸房閣已閉內人不得出外人又不敢輒開比及開  
死者相枕領軍將軍王瑩率衆救火太極殿得舍內外叫  
喚聲動天地帝三更中方還先至東宮慮有亂不敢便入  
參覘審無異乃歸其後出游火又燒璿儀曜靈等十餘殿  
及栢寢北至華林西至秘閣三千餘間皆盡左右趙鬼能  
讀西京賦云栢梁既災建章是營於是大起諸殿芳樂芳  
德仙華大興含德清曜安壽等殿又別爲潘妃起神仙永  
壽玉壽三殿皆市飾以金壁其玉壽中作飛仙帳四面繡  
綺窻間畫畫神仙又作七賢皆以美女侍側鑿金銀爲書  
字靈獸神禽風雲華炬爲之玩飾椽桷之端悉垂鈴佩江

左舊物有古玉律數枚悉裁以鈿笛莊嚴寺有玉九子鈴  
外國寺佛面有光相禪靈寺塔諸寶珥皆剝取以施潘妃  
殿飾性急暴所作便欲速成造殿未施梁桷便於地畫之  
唯須宏麗不知精密酷不別畫但取絢曜而已故諸匠賴  
此得不用情又鑿金爲蓮華以帖地令潘妃行其上曰此  
步步生蓮華也塗壁皆以麝香錦幔珠簾窮極綺麗繁役  
工匠自夜達曉猶不副速乃剔取諸寺佛刹殿藻井仙人  
騎獸以充足之武帝興光樓上施青漆世人謂之青樓帝  
曰武帝不巧何不純用瑠璃潘氏服御極選珍寶主衣庫  
舊物不復周用貴市人間金銀寶物價皆數倍虎珀釧一

南史卷五  
三  
隻直百七十萬都下酒租皆折輸金以供雜用猶不能足  
下揚南徐二州橋桁塘埭下計功為直斂取見錢供太樂  
主衣雜費由是所在塘瀆悉皆隳廢又訂出雄雉頭鶴氅  
白鷺縷百品千條無復窮已親倖小人因緣為姦科一輸  
十又各就州縣求為人輸準取見直不為輸送守宰懼威  
口不得道須物之處以復重求如此相仍前後不息百姓  
困盡號泣道路少府大官凡諸市買事皆急速催求相係  
吏司奔馳遇便虜奪市廛離散商旅靡依又以闕武堂為  
芳樂苑窮奇極麗當暑種樹朝種夕死死而復種率無一  
生於是徵求人家望樹便取毀徹牆屋以移置之大樹合

抱亦皆移掘挿葉擊華取玩俄頃刻取細草來植階庭烈  
日之中至使焦燥紛紛往還無復已極山石皆塗以采色  
跨池水立紫閣諸樓壁上畫男女私褻之像明帝時多聚  
金寶至是金以為泥不足周用令富室買金不問多少限  
以賤價又不還直張欣泰嘗謂舍人裴長穆曰宮殿何事  
頓爾夫以秦之富起一阿房而滅今不及秦一郡而頓起  
數十阿房其危殆矣荅曰非不悅子之道顧言不用耳潘  
妃放恣威行遠近父寶慶與諸小共逞姦毒富人悉誣為  
罪田宅貲財莫不啓乞或云寄附隱藏復加收沒計一家  
見陷禍及親隣又慮後患男口必殺明帝之崩竟不一日

蔬食居處衣服無改平常潘妃生女百日而亡制斬衰經  
杖衣悉麤布群小來弔盤旋地坐舉手受執蔬膳積旬不  
聽音仗左右直長閹豎王寶孫諸人共營肴羞云為天子  
解菜又於苑中立店肆模大市日游市中雜所貨物與宮  
人閹豎共為禪販以潘妃為市令自為市吏錄事將鬪者  
就潘妃罰之帝小有得失潘則與杖乃救虎賁威儀不得  
進大荆子閹內不得進實中拔雖畏潘氏而竊與諸姊妹  
淫通每游走潘氏乘小輿宮人皆露禪著綠絲屨帝自戎  
服騎馬從後又開渠立埭躬自引船埭上設店坐而屠肉  
于時百姓歌云閱武堂種楊柳至尊屠肉潘妃酤酒又偏

信將侯神迎來入宮晝夜祈禱左右朱光尚詐云

輒諮啓並云降福媚安之平遂加位相國末又號為靈帝  
車服羽儀一依生著又曲信小祠日有十數師巫魔媼迎  
送紛紜光尚輒說云神意范雲謂光尚曰君是天子要入  
當思百全計光尚曰至尊不可諫正當託鬼神以達意耳  
後東入樂游人馬忽驚以問光尚光尚曰向見先帝大瞋  
不許數出帝大怒拔刀與光尚等尋覓既不見處乃縹菰  
為明帝形北向斬之縣首苑門上自永元以後魏每來伐  
繼以內難揚南徐二州人丁三人取兩以此為率遠郡悉  
令上米準行一人五十斛輸米既畢就役如故又先是諸

郡役人多依人士為附隸請之屬名又東境役苦百姓多  
注籍詐病遣外醫巫在所檢占諸屬名并取病身凡屬名  
多不合役止避小小假並是役蔭之家凡注病者或已積  
年皆攝充將役又追責病者租布隨其年歲多少銜命之  
人皆給貨賂隨意縱捨又橫調徵求皆出百姓群小以陳  
顯達下數日便敗崔慧景圍城正得十日及蕭衍師至亦  
謂為然裹糧食糗芻凡所須物為百日備帝謂茹法珍曰  
須來至白門前當一決及至近郊乃聚兵為固守計召王  
侯分置尚書都坐及殿省尚書舊事悉充紙鏝使冠軍將  
軍王珍國領二萬人據大桁莫有鬪志遣王寶孫督戰呼

為王侯子寶孫切罵諸將帥直閣將軍席蒙發憤突陣死  
豪驍將也既斃眾軍於是土崩軍人從朱雀觀上自投及  
赴淮水死者無數於是閉城自守城內軍事委王珍國充  
州刺史張稷入衛以稷為副實甲猶七萬人帝著烏帽袴  
褶備羽儀登南掖門臨望又虛設鎧馬齋仗千人皆張弓  
拔白出東掖門稱將王出讓又受刀敕等教著五音兒衣  
登城望戰還與御刀左右及六宮於華光殿立軍壘以金  
玉為鎧仗親自臨陣詐被創勢以板欄將去以此厭勝又  
於闕武堂設牙門軍頓每夜嚴警帝於殿內騎馬從鳳莊  
門入撒明門馬被銀蓮葉且裝鎧雜羽孔翠寄生逐馬左

右衛從晝眠夜起如平常聞外鼓吹叫聲被大紅袍登景陽樓望空幾中之衆皆忿怨不為致力募兵出戰至城門數十步皆坐甲而歸慮城外有伏兵乃燒城傍諸府署六門之內皆盡城中閣道西掖門內相聚為市販死牛馬肉蕭衍長圍既立塹柵嚴固然後出盪屢戰不捷帝尤惜金錢不肯賞賜如法珍叩頭請之帝曰賊來獨取我邪何為就我求物後堂儲數百具榜啓為城防帝曰擬作嚴竟不與城防巧手而悉令作嚴晝夜不休又催御府細作三百人精仗須圍解以擬屏除金銀雕鏤雜物倍急於常法梅虫兒又說帝曰大臣不留意使圍不解宜悉誅之珍國張

稷懼禍乃謀應蕭衍以計告後閣舍人錢強強許之密令游盪主崔叔智夜開雲龍門稷及珍國勒兵入殿分軍又從西上閣入後宮御刀豐勇之為內應是夜帝在含德殿吹笙歌作女兒子卧未熟聞兵入趨出北立欲還後宮清曜閣已閉閣人禁防黃泰平刀傷其膝仆地顧曰奴反邪直後張齊斬首送蕭衍宣德太后令依漢海昏侯故事追封東昏侯

和帝諱寶融字智昭明帝第八子也建武元年封隨郡王永元元年改封南康王出為西中郎將荊州刺史督九州軍事二年十一月甲寅長史蕭穎曾奉王舉兵其日太白

及辰星俱見西方乙卯教募嚴丙辰以雍州刺史蕭衍為使持節都督前鋒諸軍事戊午衍表勸進十二月乙亥群僚勸進並不許壬辰驍騎將軍夏侯亶自建鄴至江陵稱宣德太后令西中郎將南康王宣纂承皇祚光臨億兆可且封宣城王相國荊州牧加黃鉞置僚屬三年正月乙巳王受命大赦唯梅虫兒茹法珍等不在例是日長星見竟天甲寅建牙于城南二月己巳群僚上尊號立宗廟及南北郊

中興元年春正月乙巳皇帝即位大赦改永元三年為中興文武賜位二等是夜彗星竟天以相國左長史蕭穎胄

為尚書公加雍州刺史蕭衍尚書左僕射都督征討諸軍

以晉安王寶義為司空廬陵王寶源為車騎將軍開府儀

同三司丙午有司奏封庶人寶卷為零陵侯詔不許又奏

為涪陵王詔可夏四月戊辰詔凡東討眾軍及諸向義之

眾普復除五年秋七月丁卯魯山城王孫樂祖以城降已

未郢城主薛元嗣降八月丙子平西將軍陳伯之降九月

己未詔假黃鉞蕭衍若定京邑得以便宣從事冬十一月

壬寅尚書令鎮軍將軍蕭穎胄卒十二月丙寅建康城平

己巳宣德皇太后令以征東大將軍蕭衍為大司馬錄尚

書驃騎大將軍揚州刺史封建安郡公依晉武陵王遵承

制故事壬申改封建安王寶夤為鄱陽王癸酉以司徒揚  
州刺史晉安王寶義為太尉領司徒乙酉以尚書右僕射  
王瑩為左僕射

二年春正月戊戌宣德皇太后臨朝入居內殿壬寅大司  
馬蕭衍都督中外諸軍事加殊禮己酉以大司馬長史王  
亮為守尚書令甲寅加大司馬蕭衍位相國梁公備九錫  
禮二月壬戌誅湘東王寶暉丙戌進梁公蕭衍爵為正三  
月辛丑鄱陽王寶夤奔魏誅邵陵王寶休晉熙王寶貞庚  
戌車駕東歸至姑熟丙辰遜位于梁丁巳廬陵王寶源薨  
四月辛酉禪詔至皇太后遜居外宮梁受命奉帝為巴陵

王宮于姑熟戊辰巴陵王五年十五追尊為齊和帝葬  
安陵初梁武帝欲以南海郡為巴陵國邑而遷帝焉以問  
范雲雲俯首未對沈約曰今古殊事魏武所云不可慕虛  
名而受實禍梁武領之於是遣鄭伯禽進以生金帝曰我  
死不須金醇酒足矣乃引飲一升伯禽就加搢馬先是文  
惠太子與才人共賦七言詩句後輒云愁和帝至是其言  
方驗又永明中望氣者云新林婁湖青溪並有天子氣於  
其處大起樓苑宮觀武帝屢游幸以應之又起舊宮於青  
溪以弭其氣而明帝舊居東府城西延興末明帝龍飛至  
是梁武帝衆軍城於新林而武帝舊宅亦在征虜百姓皆

著下屋白紗帽而反裙覆頂東昏曰裙應在下今更在上  
 不祥命斷之於是百姓皆反裙向下此服袂也帽者首之  
 所寄今而向下天意若曰元首方為猥賤乎東昏又令左  
 右作逐鹿帽形甚窄狹後果有逐鹿之事東昏宮裏又作  
 散叛髮反髻根向後百姓爭學之及東昏在惑天下散叛  
 矣東昏又與群小別立帽騫其口而舒兩翅名曰鳳度三  
 橋帚向後揔而結之名曰反縛黃麗東昏與刀敕之徒親  
 自著之皆用金寶鑿以壁璫又作著調帽鏤以金玉間以  
 孔翠此皆天意梁武帝舊宅在三橋而鳳度之名鳳翔之  
 驗也黃麗者皇離也而反縛之東昏戮死之應也調者

漢武帝至都而風俗和調先是百姓及朝士皆以方鳥填  
 名曰假兩此又服袂假非正名也儲兩而假之明不得  
 真也東昏誅其子廢為庶人假兩之意也

論曰鬱林地居長嫡瑕譽未彰而武皇之心不變周道故  
 得保茲守器正位尊極既而愆鄙內作兆自宮闈雖為害  
 未遠而足傾社稷耶璞稱永昌之名有二日之象隆昌之  
 號實亦同焉明帝越自支庶任當負荷秉機而作大致殲  
 夷流涕行誅非云義舉事苟非安能無內愧既而自樹本  
 枝根胤孤弱貽厥所授屬在凶愚用覆宗祊亦其理也夫  
 名以行義往賢垂範備而之禪術士誠之東昏以卷矣藏

以終之其兆先徵蓋亦天所命矣

齊本紀下第五

南史五

梁本紀上第六

南史六

李

延壽

梁高祖武皇帝諱衍字叔達小字練兒南蘭陵中都里人  
姓蕭氏與齊同承淮陰令整整生自高祖鐸位濟陰太守  
鐸生皇曾祖副子位州治中從事副子生皇祖道賜位南  
臺治書侍御史道賜生皇考諱順之字文緯於齊高帝為  
始族弟皇考外甚清和而內懷英氣與齊高少而款狎嘗  
共登金牛山路側有枯骨縱橫齊高謂皇考曰周文王以  
來幾年當復有掩此枯骨者乎言之慄然動色皇考曰此  
知齊高有大志常相隨逐齊高每外討皇考常為軍副及

北討薛索兒夜遣人入營提刀徑至齊高眠牀皇考手刃之類為齊高鎮軍司馬長史時宋帝昏虐齊高謀出外皇考以為一旦奔亡則危幾不測不如因人之欲行伊霍之事齊高深然之歷黃門郎安西長史吳郡內史所經皆著名吳郡張緒常稱文武兼資有德有行吾敬蕭順之表祭之擄石頭黃回與之通謀皇考聞難你率家兵擄朱雀橋回覘人還告曰朱雀橋南一長者英威毅然坐胡牀南向回曰蕭順之也遂不敢出時微皇考石頭幾不據矣及齊高創造皇業推鋒決勝莫不垂拱仰成焉齊建元末齊高從容謂皇考曰當令阿玉解揚州相授玉豫章王疑小名

也齊武帝在東宮皇考嘗問訊及退齊武指皇考謂疑曰非此翁吾徒無以致今日及即位深相忌憚故不居台輔以參豫佐命封臨湘縣侯歷位侍中衛尉太子詹事領軍將軍丹陽尹贈鎮北將軍謚曰懿帝以宋孝武大明元年歲次甲辰生于秣陵縣同夏里三橋宅初皇妣張氏嘗夢抱日已而有娠遂產帝帝生而有異光狀貌殊特日角龍顏重岳虎顧舌文八字項有浮光身映日無景兩髀駢骨項上隆起有文在右手曰武帝為兒時能蹈空而行及長博學多通好籌略有文武才幹所居室中常若雲氣人或遇者體輒蕭然初為衛軍王儉東閣祭酒儉一見深相器

異請為戶曹屬謂廬江河憲曰此蕭郎三十內當作侍中  
出此則貴不可言竟陵王子良開西邸招文學帝與沈約  
謝朓王融蕭琛范雲任昉陸倕等並游焉號曰八友融俊  
爽識鑒過人尤敬異帝每謂所親曰宰制天下必在此人  
累遷隨王鎮西諮議參軍行經牛渚逢風入泊龍濱有一  
老人謂帝曰君龍行虎步相不可言天下方亂安之者其  
在君乎問其名氏忽然不見尋以皇考艱去職歸建鄴及  
齊武帝不豫竟陵王子良以帝及范懿王融劉繪王思遠  
顧暉之范雲等為帳內軍主融欲因帝晏駕立子良帝曰  
夫立非常之事必待非常之人融才非負圖視其敗也范

雲曰憂國家者惟有王中書帝曰憂國欲為周召欲為豎  
刁邪懿曰直哉史魚何其木強也初皇考之薨不得志事  
見齊魚復侯傳至是鬱林失德齊明帝作輔將為廢立計  
帝欲助齊明傾齊武之嗣以雪心恥齊明亦知之每與帝  
謀時齊明將追隨王恐不從又以王敬則在會稽恐為變  
以問帝帝曰隨王雖有美名其寔庸劣既無智謀之士瓜  
牙惟仗司馬垣廕生武陵太守卞白龍耳此並惟利是與  
若啗以顯職無不載馳隨王止須折簡耳敬則志安江東  
窮其富貴宜選美女以娛其心齊明曰亦吾意也即徵歷  
生為太子左衛率白龍游擊將軍並至續召隨王至都賜

自盡豫州刺史崔慧景既奔武舊臣不自安齊明憂之乃起帝鎮壽陽外聲備魏實防慧景師次長瀨慧景懼罪白服來迎帝憮而宥之將軍房伯玉徐玄慶並曰慧景反跡既彰實是見賊我曹武將譬如羈上鷹將軍一言見命便即制之帝笑曰其如掌中嬰兒殺之不武於是曲意和釋之慧景遂安隆昌元年拜中書侍郎遷黃門侍郎建武二年魏將王肅劉昶攻司州刺史蕭詵甚急齊明遣左衛將軍王廣之赴救帝為偏帥隸廣之行次熨斗洲有人長八尺餘容貌衣冠皓然皆白緣江呼曰蕭王大貴帝既屢有徵祥心益自負時去誕百里眾軍以魏軍盛莫敢前帝欲

大振威略謂諸將曰今屯下梁之城塞鑿峴之險守雒陽之路據賢首之山以通西關以臨賊壘三方掎角出其不備破賊必矣廣之等不從後遣徐玄慶進據賢首山魏絕其糧道眾懼莫敢援之惟帝獨奮請先進於是廣之益帝精甲樹夜前失道望見如持兩炬者隨之果得道徑上賢首山廣之軍因得前魏軍來營帝堅壁不進時王肅自攻城一鼓而退劉昶有疑心帝因與書問成其隙一旦有風從西北起陣雲隨之來當蕭營尋而風回雲轉還向西北帝曰此所謂驚氣魏師遁矣令軍中白望麾而進聽鼓而動肅乃傾壁下高陣于水北帝揚麾鼓譟響振山谷敢

死之士執鉞兵先登長戟翼之城中見援至因出軍攻魏  
柵魏軍表裏受敵因大崩肅昶單騎走斬獲千計流血絳  
野得肅昶巾箱中魏帝敕曰聞肅昶善用兵勿與爭鋒待  
吾至若能禽此人則江東吾有也以功封建陽縣男尋為  
司州刺史有沙門自稱僧暉謂帝曰君項有伏龍非人臣  
也復求莫知所之帝在州甚有威名嘗有人餉馬帝不受  
餉者密以馬繫齋柱而去帝出見馬答書殷勤縛之馬首  
令人驅出城外馬自還都為太子中庶子領四廂直出鎮  
石頭齊明性猜忌帝遊時嫌解遣部曲常乘折角小牛車  
齊明每稱帝清儉勸朝臣四年魏孝文帝自率大衆逼

雍州刺史曹武度沔守樊城武舊齊武腹心齊明忌之欲  
使后弟劉暄為雍州暄不願出外因江昶得留齊明帝擬  
帝雍州受密旨出頓聲為軍事於道又命五兵尚書崔慧  
景征南將軍陳顯達相續援襄陽慧景與帝進行鄧城魏  
孝文帥十餘萬騎奄至慧景引退帝止之不從於是大敗  
帝帥衆拒戰獨得全軍及魏軍退以帝為輔國將軍監雍  
州事先是雍州相傳樊城有王氣至是謠言更甚及齊明  
崩遺詔以帝為都督雍州刺史時揚州刺史始安王遙光  
尚書令徐孝嗣右僕射江昶右將軍蕭坦之侍中江祀衛  
尉劉暄更直內省分日怙敕世所謂六貴又有御刀茹法

珍梅虫兒豐勇之等八人號為八要及舍人王暄之等四十餘人皆口擅王言權行國憲帝謂張弘策曰政出多門亂其階矣當今避禍惟有此地勤行仁義可坐作西伯但諸弟在都恐離時患須與益州圖之耳時上長兄懿罷益州還仍行郢州事乃使弘策詣郢陳計於懿語在懿傳言既不從弘策還帝乃召弟備及愔是歲至襄陽乃潛造器械多伐竹木沈於檀溪密為舟裝之備時帝所住齋常有氣五色回轉狀若蟠龍季秋出九日臺忽暴風起煙塵四合帝所居獨白日清明其上紫雲騰起形如繖蓋望者莫不異焉尋而大臣相次誅戮永元二年冬懿又被害信至

帝密召長史王茂中與呂種珍別駕柳慶遠功曹史吉士瞻等謀之既定以十一月乙巳召僚佐集於聽事告以舉兵是日建牙出檀溪竹木裝舸艦旬日大辦百姓願從者得鐵馬五千匹甲士三萬人先是東昏以劉山陽為巴西太守使過荊州就行事蕭穎胄以襲襄陽帝知其謀乃遣參軍王天武龐慶國詣江陵徧與州府人書論軍事天武既發帝謂諮議參軍張弘策曰今日天武坐收天下矣荊州得天武至必回遑無計若不見同取之如拾地芥耳斷三峽據巴蜀分兵定湘中便全有上流以此威聲臨九派斷彭蠡傳檄江南風之靡草不足比也政小引日月耳江

陵本憚襄陽人加辱亡齒寒必不孤立寧得不聞見同邪  
挾荆雍之兵掃定東夏韓白重出不能為計況以無筭之  
昏主役御刀應救之徒哉及山陽至巴陵帝復令天武齎  
書與穎胄兄弟去後帝謂張弘策曰用兵之道攻心為上  
攻城次之心戰為上兵戰次之今日是也近遣天武往州  
府人皆有書今段止有兩封與行事兄弟云一二天武口  
具及問天武口無所說天武是行事心膂彼聞必謂行事  
與天武共隱其事則人人生疑山陽惑於眾口判相嫌貳  
則行事進退無以自明是馳函定一州矣山陽至江  
安關之果疑不上柳忱勸斬天武送首山陽穎胄乃謂天

武曰天下之事懸之在卿今就卿借頭以詐山陽昔樊於  
期亦以頭借荆軻於是斬之送首山陽山陽信之馳入城  
將踰閫門發折其車轆投車而走中兵參軍陳秀拔戟  
逐之斬于門外傳首于帝仍以南康王尊號之議來告且  
曰時有未利當須來年二月遽便進兵恐非廟筭帝答曰  
今坐甲十萬糧用自竭若頓兵十旬必生悔吝且太白出  
西方救義而動天時人謀有何不利昔武王伐紂行逆太  
歲復須待年月乎竟陵太守曹景宗遣杜思沖勸帝迎南  
康都襄陽時正尊號帝不從王茂又私于張弘策曰今以  
南康置人手中被挾天子以公諸侯節下前去為人所使

此豈歲寒之計弘策言之於帝帝曰若前途大事不捷故  
自蘭艾同焚若功業克建誰敢不從豈是碌碌受人處分  
於沔南立新野郡以集新附三年二月南康王為相國以  
帝為征東將軍封中帝發襄陽自冬積糴至是開霽士卒  
咸悅帝遂留弟偉守襄陽城謂曰當置心於襄陽人腹中  
推誠信之勿有疑也天下一家乃當相見遂移檄建鄴關  
揚威武及至竟陵命長史王茂與太守曹景宗為前軍中  
兵參軍張法安守竟陵城故景宗帥眾濟岸進頓九里其  
日郢州刺史張沖迎戰茂等大破之荆州遣冠軍將軍鄧  
元起軍主王世興由安等會大軍於夏口帝築漢口城以  
守魯山命水軍主張惠紹朱思遠等游遏中江絕郢魯二  
城信使時張沖死其眾推軍主薛元嗣及中長史程茂為  
主三月乙巳南康王即帝位於江陵遣廢東昏為涪陵王  
以帝為尚書左僕射加征東將軍都督征討諸軍假黃鉞  
西臺又遣冠軍將軍蕭穎達領兵來會四月帝出沔命王  
茂蕭穎達等逼郢城五月己酉帝移屯漢南是日有紫雲  
如蓋陰于顯幕甲寅東昏遣寧朔將軍吳子陽光子衿等  
十三軍救郢州進據巴口十月帝命王茂帥軍主曹仲宗  
康絢武會超等濟師襲加湖將逼子陽水涸不通艦子衿  
喜其夜流星墜其城四更中無雨而水暴長眾軍乘流齊

進鼓譟攻之俄而大潰子陽等竄走衆盡溺于江王茂虜  
其餘而旋郢魯二城相視奪氣先是東昏遣冠軍將軍陳  
伯之鎮江州爲子陽等聲援帝謂諸將曰夫征討未必須  
實力所聽威聲耳今加湖之敗誰不驚服陳武牙即伯之  
之子狼狽奔歸彼間人情理當兇懼我謂九江傳檄可定  
也因命搜所獲俘囚得伯之幢主蘇隆之厚加賞賜使致  
命焉戊午魯山城主孫樂本降已未夜郢城有數百毛人  
踰堞且泣因投黃鵠磯蓋城之精也及旦其城主程茂薛  
元嗣遣參軍朱曉求降帝謂曰城中自可不識天命何意  
恒罵曉曰明公未之思耳桀犬何嘗不吠堯初郢城之閉

將佐文武男女口十餘萬人疾疫流腫死者十七八及城  
開帝並加隱卹其死者命給棺槨東昏聞郢城沒乃爲城  
守計簡二尚方二冶囚徒以配軍其不可活者於朱雀門  
內日斬百餘人尚書令王亮苦諫不從陳伯之遣蘇隆之  
反命求未便進軍帝曰伯之此言意懷首鼠可及其猶豫  
逼之乃命鄧元起即日沿流八月天子遣兼黃門郎蘇回  
勞軍帝登舟命諸軍以進路留上庸太守韋叡守郢城行  
州事鄧元起將至尋陽陳伯之猶懼乃收兵退保湖口留  
其子武牙守益城及帝至乃東甲請罪九月天子詔帝平  
定東夏以便宜從事前軍之次蕪湖南豫州刺史申胄棄

姑熟走至是大軍進據之自發雍州帝所乘艦恒有两龍  
導引左右莫不見者緣道奉迎百姓皆如挾纊仍遣曹景  
宗蕭穎達領馬步進頓江寧東昏遣征虜將軍李居士迎  
戰景宗擊走之於是王茂鄧元起呂僧珍進據赤鼻邏曹  
景宗陳伯之為游兵是日新亭城主江道林率兵出戰衆  
軍禽之於陣大軍次新林建康士庶傾都而至送款或以  
血為書命王茂進據越城曹景宗據阜茨橋鄧元起據道  
士墩陳伯之據臨門道林餘衆退屯航南迫之因復散走  
退保朱雀憑淮自固時李居士猶據新亭壘請東昏燒南  
岸邑屋以開戰場自大航以西新亭以北蕩然矣十月東

昏石頭軍主朱僧勇歸降東昏又遣征虜將軍王珍國列  
陣於航南大路悉配精手利器尚十餘萬閩人王張子持  
白虎幡督諸軍王茂曹景宗等犄角奔之珍國之衆一時  
土崩衆軍退至宣陽門李居士以新亭壘徐元瑜以東府  
城降石頭白下諸軍並宵潰壬午帝鎮石頭命衆軍圍六  
門東昏悉焚門內驅逼營署官府並入城有衆二十萬青  
州刺史桓和給東昏出戰因降先是俗語謂密相欺變者  
為和欺於是虫兒法珍等曰今日敗於桓和可謂和欺矣  
帝命諸軍築長圍初衆軍既逼東昏遣軍主左僧慶鎮京  
口常僧景鎮廣陵李叔獻屯瓜步及申胄自姑熟奔歸又

使屯破墩以為東北聲援至是帝遣曉喻並降帝乃遣弟  
輔國將軍秀鎮京口輔國將軍恢屯破墩從弟寧朔將軍  
景鎮廣陵吳郡太守蔡黃奔郡赴降十二月丙寅兼衛尉  
張穆屯徐州刺史王珍國斬東昏其夜以黃油裹首送軍  
帝命呂僧珍張綱勒兵封府庫及圖籍帝乃入收嬖妾潘  
妃誅之及兇黨五噎之以下四十八人屬吏以宮女二千  
人分賚將士宣德皇后令追廢涪陵王為東昏侯授帝中  
書監大司馬錄尚書驃騎大將軍都督揚州刺史封建安  
郡公食邑萬戶給班劍四十人黃鉞侍中征討諸軍事並  
如故依晉武陵王遺制故事百僚致敬巳卯帝入屯關

武堂下令大赦丙戌入鎮殿內是日鳳皇集建鄴又下令  
凡畧制謖賦淫刑濫役外可詳檢前源悉皆除湯其主守  
散失諸所損耗精立科條咸從原例丁亥遣豫州刺史李  
元履以兵五千慰勞東方十二郡二年正月辛卯下令通  
檢尚書衆曹東昏時諸諍訟失理及主者淹停不時施行  
者精加說辯依事議奏其義師臨陣致命疾病死亡者並  
加葬歛收恤遺孤甲午天子遣兼侍中席闡文兼黃門侍  
郎樂法才慰勞都下追贈皇祖散騎常侍左光祿大夫皇  
考侍中丞相乙未下令朱雀之捷逆徒送死者特許家人  
殯葬若無親屬或有貧苦二縣長尉即為埋掩建康城內

不違天命自取淪滅亦同此科又下令減損浮費自非奉  
梁成務絃冕習禮樂之容繕甲兵之備此外一皆禁絕御  
府中署量宜罷省命外詳為條格戊戌宣德皇后臨朝入  
居內殿拜帝大司馬解承制百僚致敬如前丁亥詔進帝  
都督中外諸軍事劔履上殿入朝不趨贊拜不名加前後  
部羽葆鼓吹置左右長史司馬從事中郎掾屬各四人并  
依舊辟士餘並如故甲寅齊帝進帝位相國總百揆封十  
郡為梁公備九錫之禮加遠游冠綠綬綬位在諸王上策  
曰上天不造難鍾皇室世祖以休明早崩世宗以仁德不  
嗣高宗襲統宸居弗永雖夙夜劬勞而隆平不洽嗣君昏

暴書契弗睹朝權國柄委之群孽勦戮忠賢誅殘台輔含  
冤抱痛噍類靡餘公藉昏明之期因兆庶之願爰率群后  
翊成中興宗社之危已固天人之望允塞此實公紐我絕  
綱大造皇家者也永明季年邊隙大啓荆河連率招引戎  
荒公受言本朝輕兵赴襲排危冒險剛柔遞用坦然一方  
還成藩服此又公之功也在昔隆昌洪基已謝高宗慮深  
社稷將行權道公定策帷帳激揚大節廢帝立王謀猷深  
著此又公之功也建武闡業厥猶雖遠戎狄內侵憑陵關  
塞司部危逼淪陷指期公摠兵外討卷甲長駕焚廬毀帳  
胡哭言歸此又公之功也樊漢陷切羽書績至公星言鞠

旅稟命徂征極我邊危重獲安堵此又公之功也漢南迴  
弱咫尺勅寇公作藩爰始因資靡訖練兵訓卒蒐狩有序  
俾我危城翻為強鎮此又公之功也永元紀號瞻焉已及  
雖廢昏有典而伊霍難行公首建大策爰立明聖義踰邑  
綸勳高代入此又公之功也文王之風雖被江漢京邑蠢  
蠢澶為洪流公投袂萬里事惟拯溺義聲所覃無思不躋  
此又公之功也魯城夏汭梗據中流乘山置壘紫川自固  
公御此烏集陵茲地險費無遺矢戰未窮兵踐華之固相  
望俱拔此又公之功也惟此群凶同惡相濟緣江負險蟻  
聚淮湖桴旛一臨應時禱潰此又公之功也葵孽震皇復

懷舉斧畜兵九派用擬勳至公稜威直指勢踰風雷旌旆  
小臨全州稽服此又公之功也姑乾衝要密邇京畿兇徒  
熾聚斷塞津路公兵威所震望旗自駭此又公之功也群  
豎猖狂志在借一豕突淮漢武騎如雲公爰命英勇因機  
騁銳氣冠阪泉勢踰洹水此又公之功也琅邪石首襟帶  
岨固新壘東壙金湯是埒憑險作守兵食兼資風激電駭  
莫不震疊城復于隄於具乎在此又公之功也獨夫昏佞  
憑城靡懼鼓鍾鞞鞞傲若有餘狎是邪孽怠斯冠冕凶狡  
因之將逞孽戮公竒謀密運威略潛回忠勇之徒得申厥  
效白旗宣室未之或比此又公之功也公有拯億兆之勳

重之以明德爰初厲志服道儒門濯纓來仕清猷映世時  
運艱難宗社危殆崐岡已燎玉石同焚驅率貔貅抑揚寔  
電義等南巢功齊牧野若夫禹功寂寞微管誰嗣極其將  
魚駐其祖髮解茲亂網理此焚絲復禮衽席反樂河海永  
平故事聞之者歎息司隸舊章見之者隕涕請我人命還  
之斗極憫憫縉紳重符戴天之慶哀哀黔首復蒙履地之  
恩德踰於高山功隣於造物超哉邈矣越無得而言焉朕  
又聞之疇庸命德建侯作屏咸用克固四維永隆萬葉是  
以三南流化九伯斯征王道淳洽刑厝罔用惟公經綸天  
地寧濟區夏道冠乎伊稷賞薄於桓文豈所以憲章齊魯

長轡宇宙敬惟前列朕甚懼焉今進授相國改揚州刺史  
為牧以豫州之梁郡歷陽南徐州之義興揚州之淮南宣  
城吳興會稽新安東陽十郡封公為梁公錫茲白土首  
以白茅爰定爾邦用建冢社在昔旦奭入居保佑逮于畢  
毛亦作卿士任兼內外禮寔宜之今命使持節兼太尉王  
亮授相國揚州牧印綬梁公璽紱使持節兼司空王志授  
梁公茅土金虎符第一至第五左竹使符第一至第十左  
相國位冠群后任總百司恒典彝數宜與事章其以相國  
總百揆去錄尚書之號上所假節侍中貂蟬中書監印中  
外都督大司馬印綬建安公印策驃騎大將軍如故又加

公九錫其敬聽後命以公禮律兼脩刑德備舉哀矜折獄罔不用情是用錫公大輅戎輅各一玄牡二駟公勞心稼穡念在人天丕崇務本惟穀是寶是用錫公衮冕之服赤舄副焉公鎔鈞所被變風以雅易俗陶人載和邦國是用錫公軒縣之樂六佾之舞公文德廣賈義聲遠洽推髻擗首夷歌請吏是用錫公朱戶以居公揚清抑濁官方有序多士聿興棫樸流詠是用錫公納陛以登公正色御下以身範物式遏不虞折衝惟遠是用錫公虎賁之士三百人公威同夏日志清姦宥放命圮族刑茲罔赦是用錫公鈇鉞各一公跨躡嵩溟陵厲區宇譬諸日月容光必至是用

錫公彤弓十彤矢百盧弓百盧矢千公永言惟孝至感通神恭嚴祀典祭有餘敬是用錫公秬鬯一卣圭璫副焉梁國置丞相以下一遵舊式欽哉其敬循往策祗服大禮對揚天眷用膺多福以弘我太祖之休命帝固辭府僚勸進不許二月辛酉府僚重請曰近以朝命蘊策冒奏丹誠奉被還令未蒙虛受縉紳顛顛深所未達蓋聞受金於府通人之弘致高蹈海隅疋夫之小節是以履乘石而周公不以為疑贈玉璜而太公不以為讓況世哲繼軌先德在人經綸草昧歎深微管加以朱方之役荆河是依班師振旅大造王室雖復累繭救宋重脰存楚居今觀古曾何足云

而惑甚盜鍾功疑不賞皇天后土不勝其酷是以玉馬駿  
奔表微子之去金板出地告龍逢之寃明公據鞶號哭厲  
三軍之志獨居掩涕激義士之心故能使海若登祗罄圖  
効祉山戎孤竹束馬景從伐罪弔人一匡靜亂匪叨天功  
寔勤濡足龜玉不毀誰之功歟獨為君子將使伊周何地  
於是始受相國梁公之命命林東昏淫奢異服六十二種  
於都街齊帝追贈梁公夫人為梁國妃乙丑南充州隊主  
陳文興於宣武城內鑿井得玉鏤騏驎金鏤玉璧水精環  
各二又鳳凰見建康縣桐下黑宣德皇后稱美符瑞歸于  
相國府丙寅詔梁國依舊選諸要職悉依天朝之制帝上

表以前代選官皆立選簿請自今選曹精加隱括依舊立  
簿使冠履無爽名實不違庶人識涯涘造請自息且聞中  
間立格甲族以二十登仕後門以過立試吏豈所以弘獎  
風流希向後進此實巨蠹尤宜刊革詔依表施行丙戌詔  
進梁公爵為王以豫州之南譙廬江江州之尋陽郢州之  
武昌西陽南徐州之南琅邪南東海晉陵揚州之臨海永  
嘉十郡益梁國并前為二十郡其相國揚州牧驃騎大將  
軍如故帝固辭有詔斷表相國左長史王瑩等率百僚敦  
請三月癸巳受梁王之命下令赦國內殊死以下鰥寡孤  
獨不能自存者賜穀五斛府州所統亦同蠲蕩丙午齊帝

命帝冕十有二旒建天子旌旗出警入蹕乘金根車駕六馬備五時副車置旄頭雲罕樂儻八佾設鍾虞宮縣王妃王子王女爵命之號一如舊儀丙辰齊帝下詔禪位即安姑熟四月辛酉宣德皇后令曰西詔至帝憲章前代敬禪神器于梁明可臨軒遣使恭授璽紱未亡人便歸于別宮壬戌策曰咨爾梁王惟昔遂古之載肇有生靈皇雄大庭之辟赫胥尊盧之后斯並龍圖鳥跡以前恍惚杳冥之世固無得而詳焉洎乎農軒炎暉之代放勛重華之主莫不以大道君萬姓公器御八紘居之如執朽索去之若釋重負一駕汾陽便有宵然之志暫適箕嶺即動讓王之心故

知戴黃屋服玉璽非所以示貴稱尊乘大輅建旂旗蓋欲令歸趣有地是故忘已而字兆庶徇物而君四海及於菁華內竭畚櫬外勞則無茲歸運惟能是與四百告終有漢所以高揖黃德既謝魏氏所以樂推爰及晉宋亦弘斯典我太祖握河文歷應符啓運二葉重光三聖係軌嗣君喪德昏棄紀度毀紊天綱彫絕地紐是以谷滿川枯山飛鬼哭七廟已危人神無主惟三體茲上哲明聖在躬端冕而協邕熙推鋒而拯塗炭武功與日車並運文教與鵬翼齊舉固以幽顯宅心謚訟斯屬豈徒桴鼓播地卿雲叢天而已哉至於晝睹爭明夜飛枉矢除舊之徵必顯更姓之符

允集公便仰祗乾象俯從人願敬禪神器授帝位于爾躬  
大祚告窮天祿永終於威王允執其中式遵前典以副昊  
天之望禋上帝而臨億兆格文祖而膺大業以傳無疆之  
祚豈不盛與并命璽書遣兼太保中書監兼尚書令王亮  
兼太尉中書令王志奉皇帝璽紱受終之禮一依唐虞故  
事帝抗表陳讓表不獲通於是齊百官豫章王元琳等八  
百一十九人及梁臺侍中范雲等一百一十七人並上表  
勸進帝讓不受是日太史令蔣道秀陳天文符讖六十  
四條事並明著群臣重表固請乃從之

天監元年夏四月丙寅皇帝即位于南郊設壇柴燎告昊天

曰皇帝臣行敢用玄牡昭告于皇皇后帝齊氏以歷運斯  
既否終則身欽若天應以命于行夫任是司牧惟能是授  
天命不于常帝王非一族唐謝虞受漢替魏升爰及晉宋  
憲章在昔咸以君德馭四海元功子萬姓故能大庇吐黎  
光宅區宇齊代云季世主昏凶狡焉羣慝是崇是長肆厥  
姦回暴亂以播虐于我有邦俾九服八荒之內連率岳牧  
之君蹶角頓顙匡救無術衍投袂星言推鋒萬里厲其挂  
冠之情用拯兆庶之切遂因時來宰司邦國濟物康世寔  
有厥勞而畧緯星祥川岳効祉代終之符既顯革運之期  
已華殊俗百蠻重譯獻款人神遠邇罔不和會於是群公

卿士咸致厥誠並以皇乾降命難以謙拒衍自惟匪德辭  
不獲遂仰迫上玄之眷俯惟億兆之心宸極不可久曠人  
神不可乏主遂藉樂推膺此嘉祚以茲寡薄臨馭萬方顧  
求夙志求言祇惕敬簡元辰恭茲大禮升壇受禱告類上  
帝克播休祉以弘盛烈式傳厥後用求保于我有梁惟明  
靈是饗禮畢有詔放觀乃備法駕還建康宮臨太極前殿  
大赦改元賜人爵二級文武位二等鰥寡孤獨不能自存  
者人穀五斛逋布口錢宿責勿復收其犯鄉論清議賊汙  
淫盜一比且蕩滌沈除前注與之更始封齊帝為巴陵王全  
食一郡載天子旌旗乘五時副車以齊正朔郊祀天地禮

樂制度皆用齊典以齊宣德皇后為齊文帝妃齊帝后王  
氏為巴陵王妃齊代王侯封爵悉皆降省其効著艱難者  
別有後命惟宋汝陰王不在除例劫賊餘口没在臺府者  
悉皆蠲放諸流徙之家並聽還本以兼尚書令王亮為尚  
書令兼尚書右僕射沈約為尚書僕射封皇弟中護軍宏  
為臨川王南徐州刺史秀為安成王雍州刺史偉為建安  
王右衛將軍恢為鄱陽王荊州刺史憺為始興王自郡王  
以下列爵為縣六等皇弟皇子封郡王二千戶王之庶子  
為縣侯五百戶謂之諸侯功臣爵邑無定科鳳凰集南蘭  
陵丁卯詔凡後宮樂府西解暴室諸如此例被幽逼者一

皆放遣若衰老下能自存者官給稟食戊辰遺巴陵王錢  
二百萬絹布各千疋綿二千斤車府將軍高麗王高雲進  
號車騎大將軍鎮東大將軍高濟王餘太進號征東大將  
軍鎮東大將軍倭王武進號征東將軍己巳巴陵王殂于  
姑熟追謚為齊和帝終禮一依故事庚午詔分遣內侍周  
省四方觀政聽謠訪賢舉滯其有田野不闢獄訟無章忘  
公徇私侵漁是務者悉隨事以聞若懷寶迷邦蘊竒待價  
茲響藏真不求聞達各依名騰奏罔或遺隱又詔白金作  
贖刑有聞自昔入縑以免施於中代求言叔季偷薄成風  
嬰愆入罪厥塗匪一死者不可復生刑者無因自反由此

而望滋實庸可致乎可依周漢舊典有罪入贖外詳為條  
格以時奏聞辛未以新除謝沐公蕭寶義為巴陵王以奉  
齊祀復南蘭陵武進縣依前代之科徵新除相國軍諮祭  
酒謝朓為侍中左光祿大夫開府儀同三司改南東海為  
蘭陵郡土斷南徐州諸僑郡縣癸酉詔於公車府謗木肺  
石傍各置一函若肉食莫言山阿欲有橫議投謗木函若  
從我江漢功在河策犀兕擯弊龍蛇方縣次身才高妙擯  
壓莫通懷傳呂之術抱屈賈之歎其理有皦然受困包匭  
夫大政侵小豪門陵賤百姓已窮九重莫達若欲自申並  
可投勝石函甲戌詔斷遠近上慶禮閏月丁酉以行宕昌

王梁彌邕為安西將軍河涼二州刺史正封宕昌王壬寅  
詔以憲網日弛漸以為俗令端右以風聞奏事依元熙舊  
制有司奏追尊皇考為文皇帝廟號太祖皇妣張氏為獻  
皇后陵曰建陵郝氏為德皇后陵曰脩陵五月乙亥夜盜  
入南北掖燒神武門摠章觀害衛尉卿張弘策戊子江州  
刺史陳伯之舉兵反以領軍將軍王茂為征南將軍江州  
刺史率眾討之六月庚戌封北秦州刺史楊紹先為武都  
王是月陳伯之奔魏江州平前益州刺史劉季連據成都  
反秋七月丁巳朔日有蝕之八月戊戌置建康三官癸卯  
鸞鳥見樂游苑乙巳平北將軍西涼州刺史象舒彭進號

安西將軍封鄧至王丁未命中書監王瑒等八人參定律  
令詔尚書郎依昔奏事文列獻能歌鸚鵡詔不納林邑干  
陁利國各遣使朝貢冬十一月己未立小廟甲子立皇子  
統為皇太子賜天下為父後者爵一級十二月大雪深三  
尺是歲大旱米斗五十人多餓死

二年春正月乙卯以尚書僕射沈約為左僕射吏部尚書  
范雲為右僕射辛酉祀南郊降死罪以下囚庚辰以仇池  
公楊靈珍為北秦州刺史封仇池王夏四月癸卯尚書刪  
定郎蔡法度上梁律二十卷令三十卷科四十卷五月尚  
書右僕射范雲卒乙巳益州刺史鄧元起封成都曲赦益

州六月丁亥以新除左光祿大夫謝朐為司徒尚書令申  
午以中書監王瑩為尚書右僕射是夏多鴈疫秋七月扶  
南龜茲中天竺國各遣使朝貢冬十月皇子綱生降都下  
死罪以下囚十一月乙卯雷電大雨晦

三年春正月癸丑以尚書右僕射王瑩為左僕射太子詹  
事柳惔為右僕射二月魏尅梁州三月隕霜殺草夏五月  
丁巳以扶南王憍陳如闍耶跋摩為安南將軍六月丙子  
詔分遣使巡察州部視人冤酷癸未大赦秋七月甲子立  
皇子綜為豫章王八月魏尅司州九月壬子以河南王世  
子伏連籌為鎮西將軍西秦河二州刺史封河南王北天

竺國遣使朝貢冬十一月甲子詔除贖罪科是歲魏正始  
元年

四年春正月癸卯詔自今九流常選年未三十不通一經  
不得解褐若有才同甘頰勿限年次置五經博士各一人  
有奇奏吳令唐傭鑄盤龍火鑪翔鳳硯蓋詔禁錮終身丙  
午省鳳凰衛書伎成申詔往代多命宮人惟宮觀裡郊之  
禮非所以御度蒼昊自今傳上辛亥祀南郊大赦二月初  
遣書子律博士壬午遣衛尉卿楊公則率宿衛兵塞洛口  
壬辰交州刺史李凱據州反長史李叟討平之曲赦交州  
是月立建寧侯於秣陵建興里夏四月丁巳以行宕昌王

梁肅博為安西將軍河涼二州刺史正封宕昌王六月庚戌立孔子廟冬十月使中軍將軍揚州刺史臨川王宏都督北討諸軍事侵魏以興師費用王公以下各上國租及田穀以助軍資是歲大穰米斛三十

五年春正月丁卯朔詔凡諸郡國舊族邦內無在朝位者選官搜括使郡有一人乙亥起前司徒謝朓為中書監司徒甲申立皇子綱為晉安王三月丙寅朔日有蝕之夏四月甲寅初立詔獄詔建康縣置三官與廷尉三官分掌獄事號建康為南獄廷尉為北獄五月置集雅館以招遠學秋七月乙丑鄧至國遣使朝貢八月辛酉修東宮九月臨

川王宏軍至洛口大潰所亡萬計宏單騎而歸冬十一月甲子都下地震生白毛乙丑以師出淹時大赦魏人乘勝攻鍾離十二月癸卯司徒謝朓薨

六年春三月庚申隕霜殺草是月有三象入建鄴夏四月壬辰置左右驍騎左右游擊將軍官癸巳曹景宗韋叡等

破魏師於邵陽洲斬獲萬計己酉以江州刺史王茂為尚書右僕射丁巳以揚州刺史臨川王宏為驃騎大將軍開府儀同三司以右光祿大夫沈約為尚書左僕射五月己巳置中衛中權將軍改驍騎為雲騎游擊為游騎秋八月戊子赦戊戌都下大水九月乙亥改闕武堂為德陽堂聽

南史卷之六  
二十  
訟堂為儀賢堂冬閏十月乙丑以開府臨川王宏為司徒以行太子太傅尚書左僕射沈約為尚書令以行太子少傅吏部尚書袁昂為兼尚書右僕射甲申以左光祿大夫夏侯詳為左僕射十二月丙辰左僕射夏侯詳卒

七年春正月戊子以元樹為恒朔二州都督封魏郡王戊戌詔作神龍仁獸闕於端門大司馬門外二月乙卯新作國門于越城南乙丑增置鎮衛將軍以下為十品以法日數凡二十四班以法氣序不登十品別有八班以象八風又置施外國將軍二十四班合一百九號庚午詔於州郡縣置州望郡宗鄉豪各一人專掌搜薦乙亥以車騎大將

軍高麗王高雲為撫東大將軍開府儀同三司夏四月乙卯以皇太子納妃故赦大辟以下頒賜朝臣及近侍各有差五月都下大水戊子詔蘭陵縣脩建二陵周四五里內居人賜復終身己亥詔復置宗正太僕大匠鴻臚又增太府太舟仍先為十二卿及置朱衣直閣將軍官六月辛酉改陵監為令秋八月丁巳皇子繹生赦大辟以下未結正者九月壬辰置童子奉車郎癸巳立皇子績為南康王冬十月丙寅以吳興太守張稷為尚書左僕射丙子詔大舉北侵丁丑魏縣瓠鎮主白阜生豫州刺史胡遜以城內屬是歲魏永平元年

八年春正月辛巳祀南郊大赦壬辰魏鎮東參軍成景雋  
以宿豫城內屬夏四月戊申以司徒臨川王宏為司空揚  
州刺史以車騎將軍領太子詹事王茂即本號開府儀同  
三司秋七月癸巳巴陵王蕭寶義薨冬十月壬寅立皇  
子續為廬陵王

九年春正月乙亥以左光祿大夫王瑩為尚書令庚寅新  
作緣淮塘三月己丑幸國子學親臨講肄賜祭酒以下各  
有差乙未詔皇太子及五侯之子年在從師者皆入學夏  
四月丁巳選尚書五都令史革用士流六月癸丑盜殺宣  
城太守朱僧勇閏六月己丑宣城盜轉寇吳興太守蔡搏

討平之冬十二月癸未幸國子學策試貴子賜訓授之司  
各有差是歲于闐林邑國並遣使朝貢

十年春正月辛丑祀南郊大赦戊子荊州言騶虞見三月  
盜殺東莞琅邪二郡太守劉斯以朐山引魏徐州刺史盧  
昶夏六月以國子祭酒張充為尚書右僕射冬十二月山  
車見臨城縣振遠將軍馬仙琕大破魏軍斬馘十餘萬復  
朐山城是歲初作宮城門三重樓及闕二道宕昌國遣使  
朝貢婆利國貢金席

十一年春正月壬辰詔自今捕謫之家及罪應質作若年  
有老小可停將送加鎮南將軍江州刺史建安王偉開府

儀同三司司空揚州刺史臨川王宏進位太尉以驃騎將軍王茂為司空二月戊辰新昌濟陽二郡野蠶成繭三月丁巳為旱故曲赦揚徐二州庚申高麗國遣使朝貢夏四月百濟扶南林邑等國各遣使朝貢秋九月宕昌國遣使朝貢冬十月乙未以吳郡太守袁昂為兼尚書右僕射己酉降太尉揚州刺史臨川王宏為驃騎將軍開府同三司之儀癸丑齊宣德太妃王氏薨是歲魏延昌元年

十二年春正月辛卯祀南郊赦大辟罪以下辛酉兼尚書右僕射袁昂即正丙寅詔明下遠近若委骸不葬或條衣莫改量給棺具收斂辛巳新作太極殿改為十三間以從

閏數閏三月乙丑特進中軍將軍沈約卒夏四月都下大水六月癸巳新作大廟增基九尺秋九月加揚州刺史臨川王宏位司空以司空王茂為驃騎將軍開府同三司之儀位江州刺史冬十月丁亥詔曰明堂地居卑濕可量就埤起以盡誠敬

十三年春二月庚辰朔震于西南天如裂丁亥耕藉田大赦賜孝悌力田爵一級夏六月都下訛言有棖棖取人肝肺及血以飴天狗百姓大懼二旬而止秋七月乙亥立皇子綸為邵陵王繹為東湘王紀為武陵王是歲林邑扶南于闐國各遣使朝貢作浮山堰

十四年春正月乙巳朔皇太子冠大赦賜為父後者爵一級王公以下班賚各有差使遠近上慶禮辛亥祀南郊詔班下遠近博採英異又前以墨刑用代重辟者除其條丙寅汝陰王劉胤惠等已魏宮武皇帝崩夏四月丁丑驃騎將軍開府同三司之儀江州刺史王茂薨冬十月浮山堰壞是歲蠕蠕狼牙脩國各遣使來朝貢

十五年春三月戊辰朔日有蝕之既夏四月高麗國遣使朝貢六月庚子以尚書令王瑩為左光祿大夫開府儀同三司尚書右僕射袁昂為左僕射吏部尚書王暕為右僕射秋八月蠕蠕河南國各遣使朝貢九月辛巳左光祿大

夫開府儀同三司王瑩薨壬辰大赦冬十一月交州刺史李叟斬反者阮宗孝傳首建鄴曲赦交州是歲魏孝明皇帝熙平元年

十六年春正月辛未祀南郊詔允貧家勿收今年三調無田業者所在量宜賦給及優蠲產子之家恤理冤獄并賑孤老鰥寡不能自存者二月辛亥耕藉田甲寅赦罪人三月丙子敕太醫不得以生類為藥公家織官紋錦飾並斷仙人鳥獸之形以為褻衣裁翦有乖仁恕於是祈告天地宗廟以去殺之理欲被之含識郊廟牲牲皆代以麩其山川諸祀則否時以宗廟去牲則為不復血食雖公卿異議

朝野喧囂竟不從冬十月宗廟薦羞始用蔬果是歲河南扶南婆利等國各遣使朝貢

十七年春二月癸巳雍州刺史安成王秀薨甲辰大赦三月丙申改封建安郡王偉為南平王夏六月乙酉中軍將軍中書監臨川王宏以本號行司徒秋八月壬寅詔兵騶奴婢男年六十六女年六十免為編戶閏八月干陟利國遣使朝貢冬十月乙亥以行司徒臨川王宏即正十一月辛亥以南平王偉為左光祿大夫開府儀同三司是歲魏神龜元年

十八年春正月甲申以領軍將軍鄱陽王恢為征西將軍荊州刺史以荊州刺史始興王憺為中撫將軍並開府儀同三司以尚書左僕射袁昂為尚書令以右僕射王暕為左僕射以太子詹事徐勉為右僕射辛卯祀南郊孝懷力田賜爵一級夏四月丁巳帝於無算殿受佛戒赦罪人秋七月于闐扶南國各遣使朝貢

梁本紀上第六

南史六

梁本紀中第七

南史七

李

延壽

普通元年春正月乙亥朔大赦改元丙子日有蝕之巳卯  
 以司徒臨川王宏為太尉揚州刺史以金紫光祿大夫王  
 份為尚書左僕射庚子扶南高麗等國並遣使朝貢二月  
 癸丑以高麗王嗣子安為寧東將軍高麗王三月滑國遣  
 使朝貢夏四月河南國遣使朝貢秋七月巳卯江淮海並  
 溢九月乙亥有星晨見東方光爛如火是歲魏正光元年  
 二年春正月辛巳祀南郊詔置孤獨園以恤孤幼戊子大  
 赦二月辛丑祀明堂三月癸亥大宴平地三尺夏四月乙

卯改作南北郊丙辰詔曰平狄東作義不在南前代因襲  
有乖禮制可於震方具茲千畝於是徙藉田於東郊外十  
五里五月癸卯琉璃殿火延燒後宮屋三千間閏月丁巳  
詔自今可停賀瑞六月丁卯襄州刺史文僧明以州歸魏  
秋七月丁酉假大匠卿裴讓節度使軍侵魏甲寅魏荊州  
刺史桓叔興帥眾降八月丁亥始平郡石鼓村地自開成  
井方六尺六寸深三十二丈冬十一月百濟新羅國各遣  
使朝貢十二月戊辰以鎮東大將軍百濟王餘隆為寧東  
大將軍

三年春正月庚子以吳郡太守王暕為尚書左僕射庚戌

都下地震二月乙卯巴陵王蕭屏薨夏四月丁卯沙陰王  
劉端薨五月壬辰朔日有蝕之既又巳大赦詔公卿百僚  
各上封事連率郡國舉賢良方正直言之士秋八月甲子  
婆利白題國各遣使朝貢冬十一月甲申開府儀同三司  
始興王憺薨

四年春正月辛卯祀南郊大赦辛亥祀明堂二月乙亥耕  
藉田孝弟力田賜爵一級豫耕之司尅日勞酒冬十月庚  
午以中書將軍袁昂為尚書令即本號開府儀同三司十  
一月癸未朔日有蝕之甲辰尚書左僕射王暕卒十二月  
戊午用給事中李子雲議始鑄鐵錢狼牙脩國遣使朝貢

五年夏六月乙酉龍鬪于曲阿王陵因西行至建陵城所  
經樹木倒折開數十丈庚子以負外散騎常侍元樹為平  
北將軍北青兗二州刺史率眾侵魏

六年春正月辛亥祀南郊大赦庚申魏徐州刺史元法僧  
以彭城來降自去歲以來北侵諸軍所存剋獲甲戌以元  
法僧為司空封始安郡王二月辛巳改封法僧為宋王三  
月丙午賜新附人長復除註誤罪失一無所問夏五月己  
酉脩宿豫堰又脩曹公堰於濟陰壬子遣中護軍夏侯實  
督壽陽諸軍侵魏六月庚辰豫章王綜奔魏魏復據彭城  
秋七月壬戌大赦冬十二月壬辰都下北雪是歲魏孝昌

元年

七年春正月辛丑朔赦死罪以下夏四月乙酉太尉臨川  
王宏薨南州津改置按尉增加奉秩詔在位辭臣各舉所  
知凡是清吏咸使薦聞秋九月己酉荊州刺史鄱陽王恢  
薨冬十一月庚辰丁貴嬪薨大赦是歲河南高麗林邑滑  
國並遣使朝貢

大通元年春正月乙丑以尚書右僕射徐勣為尚書左僕  
射詔百官奉祿自今可長給見錢辛未祀南郊詔流亡者  
聽復宅業蠲役五年尤貧家勿收今年三調孝弟力田賜  
爵一級是月司州刺史夏侯夔進軍三關所至皆剋初帝

五年夏六月乙酉龍鬪于曲阿王陵因西行至建陵城所  
經樹木倒折開數十丈庚子以負外散騎常侍元樹為平  
北將軍北青兗二州刺史率眾侵魏

六年春正月辛亥祀南郊大赦庚申魏徐州刺史元法僧  
以彭城來降自去歲以來北侵諸軍所在剋獲甲戌以元  
法僧為司空封始安郡王二月辛巳改封法僧為宋王三  
月丙午賜新附人長復除註誤罪失一無所問夏五月己  
酉脩宿豫壇又脩曹公壇於濟陰壬子遣中護軍夏侯實  
督壽陽諸軍侵魏六月庚辰豫章王綜奔魏魏復據彭城  
秋七月壬戌大赦冬十二月壬辰都下北雪是歲魏孝昌

元年

七年春正月辛丑朔赦死罪以下夏四月乙酉太尉臨川  
王宏薨南州津改置校尉增加奉秩詔在位群臣各舉所  
知凡是清吏咸使薦聞秋九月己酉荊州刺史鄱陽王恢  
薨冬十一月庚辰丁貴嬪薨大赦是歲河南高麗林邑滑  
國並遣使朝貢

大通元年春正月乙丑以尚書右僕射徐勉為尚書左僕  
射詔百官奉祿自今可長給見錢辛未祀南郊詔流亡者  
聽復宅業蠲役五年尤貧家勿收今年三調孝弟力田賜  
爵一級是月司州刺史夏侯夔進軍三關所至皆剋初帝

創同泰寺至是開大通門以對寺之南門取凡語以協同  
泰自是晨夕講義多由此門三月辛未幸寺捨身甲戌還  
宮大赦改元大通以符寺及門名夏五月丙寅成景雋尅  
魏臨潼竹邑冬十月庚戌魏東豫州刺史元慶和以渦陽  
內屬甲寅曲赦東豫州十一月丁卯以中護軍蕭藻為都  
督侵魏鎮于渦陽是歲林邑師于高麗等國各遣使朝貢  
二年春正月乙酉蠕蠕國遣使朝貢二月築寒山夏癸丑  
魏孝明皇帝崩夏四月戊戌魏尙書朱榮推奉孝莊帝庚子  
榮殺幼主及太后胡太后辛丑魏郢州刺史元願達以義陽  
降封願達為樂平王甲申時魏大亂其北海王顥臨淮王彧

汝南王悅並來奔北青州刺史元僬南荊州刺史李志皆  
以地降冬十月丁亥以魏北海王顥主魏滎東宮置閭將  
軍陳慶之衛送還北魏衛州刺史鄧欽以地降是歲魏武  
泰元年尋改為建義又改曰永安  
中大通元年春正月辛酉祀南郊大赦賜孝悌力田爵一  
級辛巳祀明堂夏四月癸巳陳慶之攻拔魏梁城進屠考  
城禽魏濟陰王暉業五月癸酉進尅虎牢魏孝莊帝出居  
河北乙亥元顥入京師僭號建武六月壬午以永興公主  
疾篤故大赦公主志也是月都下疫甚帝於重雲殿為百  
姓設救苦齋以身為禱閏月護軍將軍南康王績薨己卯

魏將介朱蘭攻殺元顥京師反正秋九月辛巳朱雀航華表災癸巳幸同泰寺設四部無遮大會上釋御服披法衣行清淨大捨以便省為房素床瓦器乘小車私人執役甲午升講堂法坐為四部大衆開涅槃經題矣卯群臣以錢一億萬奉贖皇帝菩薩大捨僧衆默許乙巳百辟詣寺東門奉表請還臨宸極三請乃許帝三答書前後並稱頓首冬十月己酉又設四部無遮大會道俗五萬餘人會畢帝御金輅還宮御太極殿大赦改元十一月戊子魏巴州刺史嚴始欣以城降是歲盤盤蠕蠕國遣使朝貢

二年夏四月癸丑幸同泰寺設平等會庚申大雨雹六月

丁巳遣魏汝南王悅還北主魏庚申以魏尚書左僕射范溥為司州牧隨悅北侵是月林邑扶南國遣使朝貢秋八月庚戌幸德陽堂祖魏主元悅山賊寇會稽郡縣九月壬午假起武庫軍湛海珍鄭以討之是歲魏莊帝殺其權臣介朱榮其黨奉魏長廣王曄為主而殺孝莊帝年號建明三年春正月辛巳祀南郊大赦丙申以魏尚書僕射鄭元護為征北大將軍二月辛丑祀明堂夏四月己巳皇太子統薨六月癸丑立昭明太子子華容公歡為豫章郡王枝江公譽為河東郡王曲江公譽為岳陽郡王是月丹丹國遣使朝貢秋七月乙亥立晉安王綱為皇太子大赦賜為

父後者及出處忠孝文武清勤並爵一級庚寅詔宗戚有  
服屬者並賜湯沐食餼高秩各隨遠近以為差次至辰以  
吏部尚書何敬容為尚書僕射九月狼牙脩國遣使朝  
貢是秋具興生野稻飢者糶焉冬十月己酉上幸同泰寺  
升法坐為四部眾說涅槃經迄于乙卯前樂山縣侯蕭正  
則有罪流徙至是招誘亡命劫寇廣州在所討平之十一  
月乙未上幸同泰寺升法座為四部眾說般若經迄于十  
二月辛丑是歲魏介朱兆又廢其主暉而奉節閔皇帝改  
建明二年為普泰元年又魏渤海王高歡舉兵信都別奉  
渤海太守朗為主改普泰元年為中興

四年春正月丙寅以開府儀同三司南平王偉為大司馬  
以司空宋王元法僧為太尉尚書令以開府儀同三司袁  
昂為司空立臨川靖惠王宏子正德為臨賀郡王庚午立  
嫡皇孫大器為宣城郡王位列諸王上癸未魏南兗州刺  
史劉世明以城降二月壬寅以太尉元法僧還北主魏以  
侍中元景隆為徐州刺史封彭城郡王通直常侍元景宗  
為青州刺史封平昌郡王隨法僧北侵庚戌新除揚州刺  
史邵陵王綸有罪免為庶人三月庚午侍中領國子博士  
蕭子顯表置制旨孝經助教一人生十人專通帝所釋孝  
經義夏四月盤盤國遣使朝首秋七月甲辰星隕如雨九

月乙巳加司空袁昂尚書令冬十一月高麗國遣使朝貢  
十二月丙子魏彭城王尒朱仲遠來奔以為定洛將軍封  
河南王北侵隨所寇土使自封建庚辰以太尉元法僧為  
鄆州刺史驃騎大將軍開府同三司之儀是歲魏相勃海  
王高歡平尒朱氏廢節閔皇帝及自所奉勃海故王朗而  
奉平陽王脩是為孝武皇帝改中興二年為太昌尋又改  
為永熙元年

五年春正月辛卯祀南郊大赦賜孝悌力田爵一級先是  
一日丙夜南郊令解滌之等到郊所獲行忽聞異香三隨  
風至及將行事奏樂迎神畢有神光圓滿壇上朱紫蒼白

雜色食頃乃滅戊申都下地震己酉長旱見辛亥祀明堂  
二月癸未幸同泰寺設四部大會并法坐發金字般若經  
題訖于己丑三月丙辰大司馬南平王偉薨夏五月戊子  
都下大水御道通船六月己卯魏建義城主蘭保殺東徐  
州刺史崔祥以下邳降冬十月庚申以尚書右僕射何敬  
容為左僕射以吏部尚書謝舉為右僕射是歲河南波斯  
盤盤等國並遣使朝貢

六年春二月癸亥耕藉田大赦賜孝悌力田爵一級三月  
己亥以行河南王可沓根為西秦河二州刺史正封河南  
王甲辰百濟國遣使朝貢夏四月丁卯熒惑在南斗秋七

月甲辰林邑國遣使朝貢冬十月丁卯以信武將軍元慶和為鎮北將軍封魏王率眾北侵閏十二月丙午西南有雷聲二是歲魏孝武帝迫于其相高歡出居關中歡又別奉清河王世子善見為主是為孝靜帝改永熙三年為天平元年魏於是始分為兩孝武既至關中又與丞相宇文泰不平未幾遇燬而崩

大同元年春正月戊申朔大赦改元二月辛巳祀明堂丁亥耕藉田辛丑高麗丹丹國並遣使朝貢三月丙寅幸同泰寺設無遮大會辛未滑國遣使朝貢夏四月庚子波斯國遣使朝貢壬戌幸同泰寺鑄十方銀像并設無遮會秋

七月辛卯扶南國遣使朝貢冬十月雨黃塵如雪十一月壬戌北梁州刺史蘭欽攻漢中魏梁州刺史元羅降癸亥復梁州是歲西魏文皇帝大統元年

二年春二月乙亥耕藉田三月庚申詔求讜言及令文武在位舉士戊寅帝幸同泰寺設平等法會夏四月乙未以開府同三司之儀元法僧為太尉五月癸卯以魏梁州刺史元羅為青異二州刺史封東郡王六月丁亥詔郊明堂陵廟等令改視散騎侍郎秋九月辛亥幸同泰寺設四部無遮法會冬十月乙亥詔大舉北侵壬午幸同泰寺設無遮大會十一月兩黃塵如雪攬之盈掬己亥詔北侵眾軍

班師辛亥都下地震坐白毛長二尺十一月壬申與東魏  
通和

三年春正月辛丑祀南郊大赦賜孝悌力田爵一級是夜  
朱雀門災壬寅雨灰黃色二月丁亥耕藉田癸巳以護軍  
將軍蕭藻為尚書左僕射三月戊戌立昭明太子子整為  
武昌郡王暨為義陽郡王夏五月癸未幸同泰寺鑄十方  
金銅像設無量法會六月青州朐山隕霜秋七月青州雪  
害苗稼癸卯東魏人來聘己酉義陽王暨薨八月辛卯幸  
阿育王寺設無量法喜食大赦九月使兼散騎常侍張臯  
聘于東魏閏九月甲子侍中太尉元法僧薨十月丙辰

都下地震是歲飢

四年春二月己亥耕藉田三月河南蠕蠕國並遣使朝貢  
夏五月甲戌東魏人來聘六月辛丑日有蝕之秋七月癸  
亥詔以東冶徒李胤之降象牙如來真形大赦戊辰使兼  
散騎常侍劉孝儀聘于東魏八月甲辰詔南岳等十二州  
既經飢饉曲赦逋租宿責勿收今年三調九月閱武于樂  
游苑

五年春正月乙卯以護軍將軍廬陵王績為驃騎將軍安  
右將軍尚書左僕射蕭藻為中衛將軍並開府儀同三司  
中權將軍丹楊尹何敬容以本號為尚書令吏部尚書張

續為尚書左僕射下已御史中丞參禮儀事賀琛奏今南  
北二郊及藉田往還並宜御輦不復乘路三郊請用素輦  
藉田往還乘常輦皆以侍中陪乘傳大將軍及太僕詔付  
尚書博議施行改素輦名大同輦郊祀宗廟乘佩輦辛未  
祀南郊詔孝悌力田及州閭鄉黨稱為善人者各賜爵一  
級秋八月乙酉扶南國獻生犀冬十一月乙亥東魏人來  
聘十二月使兼散騎常侍柳豹聘于東魏是歲都下訛言  
天子取人肝以飴天狗大小相警自晚使閉門持仗數月  
乃止

六年春正月庚戌朔曲赦司豫徐兗四州二月己亥耕藉  
田夏四月癸未詔晉宋齊二代諸陵有職司者勤加守護  
五月己卯河南王遣使朝獻馬及方物求釋迦像并經論  
十四條敕付像并制旨涅槃般若若金光明講疏一百三卷  
秋七月丁亥東魏人來聘遣散騎常侍陸晏子報聘八月  
戊午大赦辛未盤盤國遣使朝貢九月戊戌司空袁昂薨  
冬十一月己卯曲赦都下十二月壬子江州刺史豫章王  
歡薨

七年春正月辛巳祀南郊大赦辛丑祀明堂二月乙巳以  
行宕昌王梁弼泰為平西將軍河涼二州刺史正封宕昌  
王辛亥耕藉田乙卯都下地震夏四月戊申東魏人來聘

遣兼散騎常侍明少選報聘冬十一月丙子詔停所在使  
役女丁十二月壬寅東魏人來聘遣兼散騎常侍袁狎報  
聘丙辰於宮城西立士林館延集學者是歲名昌蠕蠕高  
麗百濟滑國各遣使朝貢百濟求涅槃等經疏及醫工畫  
師毛詩博士並許之交州人李賁攻刺史蕭諮

八年春正月安成郡人劉敬躬挾左道以及二月戊戌江  
州刺史湘東王繹遣中兵曹子邳討禽之送于都斬之建  
康市三月於江州新蔡高塘立鎮平屯壘作蠻屯

九年春閏正月丙申地震生毛三月以太子詹事謝舉為  
尚書僕射夏四月林邑王破德州攻李賁賁將范脩又破

林邑王於九德敗走之冬十一月益州刺史武陵王紀進  
號征西將軍開府儀同三司

十年春正月李賁竊號於交阯年號天德三月甲午幸蘭  
陵庚子謁建陵有紫雲蔭陵上食頃乃散帝望陵流涕所  
霑草皆變色陵傍有枯泉至是而流水香繁辛丑哭于脩  
陵壬寅於皇基寺設法會詔賜蘭陵老少位一階并加頒  
賚所經縣邑無出今年租賦因賦還舊鄉詩癸卯詔園陵  
職司恭事勤勞並錫位一階并加賜賚己酉幸京口城北  
固樓因改名北顧庚戌幸回賓亭宴帝鄉故老及所經近  
縣奉迎候者少長數千人各賚錢二千夏四月乙卯至自

蘭陵詔繹寡孤獨尤貧者贍恤各有差五月廣州人盧子略反刺史新渝侯映討平之詔曲赦廣州秋九月己丑赦冬十一月大雪平地三尺

十一年春正月震華林園光嚴殿重雲閣帝自貶拜謝上天累刻乃止夏四月東魏人來聘冬十月己未詔復開贖罪典

中大同元年春正月丁未曲阿縣建陵隧口石辟邪起舞有大蛇鬪隧中其一被傷奔走青蟲食陵樹葉略盡癸丑交州刺史楊暉剋交趾嘉寧城李賁竄入屈獠洞交州平三月乙巳大赦庚戌幸同泰寺講金字三慧經仍施身夏

四月丙戌皇太子以下奉贖仍於同泰寺解設法會大赦改元是夜同泰寺災六月辛巳竟天有聲如風水相薄秋七月甲子詔自今有犯罪者非大逆父母祖父母勿坐丙寅詔曰朝四暮三衆狙皆喜名實未虧而喜怒為用頃聞外間多用九佰錢佰減則物貴佰足則物賤非物有貴賤是心有顛倒至於遠方日更滋甚自今可通用足佰錢八月丁丑東揚州刺史武昌王警薨甲午渴槃陀國遣使獻方物冬十一月癸酉汝陰王劉哲薨

太清元年春正月己亥朔日有蝕之壬寅荊州刺史廬陵王續薨辛酉祀南郊大赦甲子祀明堂是月東魏相勃海

王高歡薨二月己卯白虹貫日庚辰東魏司徒侯景求以河南十三州內屬至午以景為大將軍封河南王大行臺承制如鄧禹故事丁亥耕藉田三月庚子幸同泰寺設無遮大會上釋御服服法衣行清淨大捨名曰羯磨以五明殿為房設素木牀葛帳土瓦器乘小輿私人執役乘輿法服一皆屏除甲辰遣司州刺史羊鴉仁率土州刺史桓和仁州刺史湛海珍等應接侯景兵未至而東魏遣兵攻景景又割地求救於西魏方解圍乙巳帝升光嚴殿講堂坐師子講金字三慧經捨身夏四月庚寅群臣以錢一億萬奉贖皇帝菩薩僧眾默許戊寅百辟詣鳳庭門奉表三請

三谷頓首並如中大通元年故事丁亥服袞冕御輦還宮幸太極殿如即位禮大赦改元是月神馬出皇太子獻寶馬頌六月戊辰以前雍州刺史鄱陽王範為征北將軍摠督漢北征討諸軍事秋七月庚申羊鴉仁入縣鞏城八月乙丑諸軍北征以南豫州刺史蕭明為大都督救緣邊初附諸州戊子以大將軍侯景錄行臺尚書事九月癸卯王游苑成輿駕幸苑冬十一月東魏將慕容紹宗大敗蕭明于寒山明被俘執紹宗進圍潼州十二月戊辰命太子舍人元貞還北為東魏主

二年春正月癸巳朔兩見相承如鉤見于西方戊戌詔在

位各舉所知己亥東魏平瀋陽辛丑以尚書僕射謝舉為  
尚書令以守吏部尚書王克為尚書僕射甲辰東魏尅殷  
豫二州三月甲辰撫軍將軍高麗王高延卒以其子成為  
寧東將軍高麗王樂浪公己未岳獠洞斬李賁傳首建鄴  
夏四月丙子詔在朝及州郡各舉士五月辛丑以新除中  
書令邵陵王綸為安南將軍開府儀同三司辛亥曲赦交  
愛德三州六月天裂于西北長十丈闊二丈光出如電其  
聲若雷秋七月使兼散騎常侍謝班聘于東魏結和八月  
戊戌侯景舉兵反甲辰他蘭府儀同三司邵陵王綸都督  
眾軍討景曲赦南豫州九月戊辰地震江左尤甚壞屋殺

人地生白毛長二尺益州市有飛蠱萬群螿人死冬十月  
侯景襲譙州進攻陷歷陽戊申以臨賀王正德為平北將  
軍都督諸軍屯丹楊郡己酉景自橫江濟採石辛亥至建  
鄴臨賀王正德率眾附賊十一月戊午朔設壇刑白馬祀  
蚩尤於太極殿前己未景立蕭正德為天子於南關前辛  
酉賊攻陷東府城庚辰邵陵王綸帥武州刺史蕭弄璋前  
譙州刺史趙伯超等入援乙酉進軍湖頭與賊戰賊敗績  
丙戌安北將軍鄱陽王範遣世子嗣雄信將軍裴之高等  
率眾入援次張公洲十二月戊申天西北裂有光如火尚  
書令謝舉卒丙辰司州刺史柳仲禮前衡州刺史韋粲高

州刺史李遷仕前司州刺史羊鴉仁等率軍入援  
三年春正月丁巳大都督柳仲禮率衆軍分據南岸賊濟  
軍於青塘襲殺韋粲庚申白虹貫日三重邵陵王綸臨城  
公大連等率兵集南岸及辰有流星長三十丈墮武庫李  
遷仕及天門太守樊文皎進軍青溪東為賊所破文皎死  
之壬午熒惑守心二月侯景遣使求和皇太子固請帝乃  
許之盟于西華門下景既運東城米歸于石頭亦不解圍  
啓求遣諸軍退丁未皇太子又命南兖州刺史南康王會  
理前青冀二州刺史湘潭侯退率江北之衆頓于蘭亭苑  
甲子以開府儀同三司丹陽尹邵陵王綸為司空以合州

刺史鄱陽王範為征北大將軍開府儀同三司以司州刺  
史柳仲禮為侍中尚書僕射時景對計既成乃表陳帝失  
復舉兵向關三月城內以皇太后盟設壇告天地神祇戊午  
前司州刺史羊鴉仁等進軍東府北與賊戰大敗時四方  
征鎮入援者三十餘萬莫有鬪志自相抄奪而已丁卯賊  
攻陷宮城縱兵大掠己巳賊矯詔遣石城公大款解外援  
軍庚午侯景自為都督中外諸軍事大丞相錄尚書事辛  
未援軍各退散丙子熒惑守心夏四月己丑都下地震丙  
申又震己酉帝以所求不效憂憤寢疾是月青冀二州刺  
史明少遐東徐州刺史湛海珍北青州刺史王奉伯各舉

州附東魏五月丙辰帝崩于淨居殿時年八十六辛亥遷梓宮于太極前殿十一月乙卯葬于脩陵追尊爲武皇帝廟號高祖帝性淳孝六歲獻皇太后崩水漿不入口三日哭泣有過成人及丁文帝愛時爲禱隨王詒議隨府在荆鎮以病聞便投劾星馳不復寢食倍道就路憤風驚浪不暫停上帝形容本壯及至都銷毀骨立親表士友皆不復識望宅奉禱氣絕久之每哭輒歐血數升服內曰惟食麥二溢拜埽山陵涕淚所洒松草變色及居帝位即於鎮山造大愛敬寺青溪邊造智度寺於臺內立至敬等殿又立七廟宮月中再設淨饌每至辰拜禮西華池哀勵左右少

而篤學能事畢究雖萬機多務猶卷不輟手燃燭側光常至戊夜撰通史六百卷金海三十卷制旨孝經義周易講疏及六十四卦二繫文言序卦等義我樂社義志詩春秋答問尚書大義中庸講疏孔子正言孝經講疏凡二百餘卷王侯朝臣皆奉表質疑帝皆爲解釋脩飾國學增廣生員立五館置五經博士天監初何佟之賀瑒嚴植之明山賓等覆述制旨并撰吉凶賓軍嘉禮一千餘卷帝稱制斷疑焉大同中於臺西立士林館領軍朱异太府卿賀琛舍人孔子祛等遞互講述皇太子宣城王亦於東宮宣猷堂及揚州解開講於是四方郡國莫不向風爰自在田及登

寶位躬制贊序詔誥銘誅箴頌牋奏諸文又百二十卷六藝備閑其登逸品陰陽緯候卜筮占決草隸尺牘騎射莫不稱妙晚乃溺信佛道日止一食膳無鮮腴惟豆羹糲飯而已或遇事擁日儻移中便嗽口以過制製涅槃小品淨名三慧諸經義記數百卷聽覽餘閑即於重雲殿及同泰寺講談名僧碩學四部聽衆常萬餘人身衣布衣木綿皂帳一冠三載一被二年自五十外便斷房室後宮職司貴妃以下六宮律褊三翟之外皆衣不曳地傍無錦綺不飲酒不聽音聲非宗廟祭祀大會饗宴及諸法事未嘗作樂勤於政務孜孜無怠每冬日四更竟即救把燭看事執筆觸

寒手為皴裂然仁愛不斷親親及所愛愆犯多有縱捨故政刑弛紊每決死罪常有哀矜涕泣然後可奏性方正雖居小殿暗室恒理衣冠小坐暑月未嘗褰袒雖見內豎小臣亦如遇大賓也初齊高帝夢展而登殿顧見武明二帝後二人手張天地圖而不識問之荅曰順子後及崔慧景之逼長沙宣武王入援至越城夢乘馬飛半天而隊帝所馭化為赤龍騰虛獨上時臺內有宿衛士為覲常見太極殿有六龍各守一柱末勿失其二後見在宣武王宅時宣武為益州現乃往蜀伏事及宣武在郢北覲還都乃見六龍俱在帝所寢齋遂去郢之雍中途遇疾且死謂同侶曰

蕭雍州必作天子具以前事語之推此而言蓋天命也雖在蒙塵齋戒不廢及疾不能進膳盥漱如初皇太子日中再朝每問安否涕泗交面賊臣侍者莫不掩泣疾久口若索蜜不得再曰荷荷遂崩賊祕之太子問起居不得見慟于閣下始天監中沙門釋寶誌爲詩曰昔年三十八今年八十三四中復有四城北火酣酣帝使周捨封記之及中大同元年同泰寺災帝啓封捨手迹爲之流涕帝生於甲辰三十八尅建鄴之年也遇災歲實丙寅八十三矣四月十四日而火起之始自浮屠第三層三者帝之昆季次也帝惡之召太史令虞翻筮之遇坤履曰無害其繇云西

南得朋東北喪朋安貞吉文言云東北喪朋乃終有慶帝曰斯魔鬼也酉應見卯金來尅木卯爲陰賊鬼而帶賊非魔何也孰爲致之酉爲口舌當乎說位說言乎允故知善言之口宜前爲法事於是人人讚善莫不從風或刺血灑地或刺血書經穿心然燈坐禪不食及太清元年帝捨身光嚴重雲殿游仙化生皆震動三日乃止當時謂之祥瑞識者以非動而動在鴻範爲祚以比石季龍之敗殿壁畫人頸皆縮入頭之類時海中浮鵠山去餘姚岸可千餘里上有女人年三百歲有女官道士四五百人年並出百但在山學道遣使獻紅席帝方捨身時其使適至云此草常

有紅鳥居下故以為名觀其圖狀則鸞鳥也時有男子不知何許人於大眾中自割身以飴飢鳥血流徧體而顏色不變又沙門智泉鐵鈎挂體以然千燈一日一夜端坐不動閑講日有三足鳥集殿之東方自戶適于西南縣捐三飛三集白雀一見于重雲閣前連理樹又有五色雲浮於華林園昆明池上帝既流遁益甚境內化之遂至喪亡云論曰梁武帝時逢昏虐家遭冤禍既地居勢勝乘機而作以斯文德有此武功始用湯武之師終濟唐虞之業豈曰人謀亦惟天命及據圖錄多歷歲年制造禮樂敦崇儒雅自江左以來年踰二百文物之盛獨美于茲然先王文武

適用德刑備舉方之水火取法陰陽為國之道不可獨任而帝留心姐豆忘情干戚溺於釋教弛於刑典既而帝紀不立悖逆萌生反噬彎弧皆自子弟履霜弗戒卒至亂亡自古撥亂之君固已多矣其或樹置失所而以後嗣失之未有自己而得自己而喪追蹤徐偃之仁以致窮門之酷可為深痛可為至戒者乎

梁本紀中第七

南史七

梁本紀下第八

南史八

李

延壽

太宗簡文皇帝諱綱字世讚小字六通武帝第三子昭明  
 太子母弟也天監二年十月丁未生于顯陽殿五年封晉安  
 王普通四年累遷都督雍州刺史中大通三年被徵入朝  
 未至而昭明太子謂左右曰我夢與晉安王對夾擾道我  
 以班劍授之王還當有此加乎四月昭明太子薨五月丙申  
 立晉安王為皇太子七月乙亥臨軒策拜以脩繕東宮權居  
 東府四年九月移還東宮太清二年臺城陷太子坐永福  
 省見侯景神色自異無懼容五月丙辰帝崩辛巳太子即皇

帝位天赦癸未追尊神貴嬪為皇太后追謚妃王氏為簡  
皇后六月丙戌以南惠王會理為司空丁亥立宣城王大  
器為皇太子壬辰立當陽公大心為尋陽郡王石城公大  
款為江夏郡王寧國公大臨為南海郡王臨城公大連為  
西郡王西曲公大春為安陸郡王新塗公大成為山陽郡  
王臨湘公大封為宜都郡王高唐公大莊為新興郡王秋  
七月甲寅廣州刺史元景仲謀應侯景西江督護陳霸先  
攻之景仲自殺霸先迎定州刺史蕭勃為刺史庚午以司  
空南康王會理為兼尚書令是月九江大饑人相食者十  
四五八月癸卯征東大將軍開府儀同三司南徐州刺史

蕭繹薨丙午侯景矯詔儀同三司位比正公自今悉不加  
將軍以為定準冬十月丁未地震是月百濟國遣使朝貢  
見戒寺荒蕪哭于闕下

大寶元年春正月辛亥朔大赦改元丁巳天雨黃沙己未  
西魏剋安陸執司州刺史柳仲禮盡有漢東地丙寅月書  
見于東方癸酉前江都令祖皓起義兵于廣陵二月癸未  
侯景攻下廣陵皓見害乙巳以尚書僕射王克為左僕射  
丙午侯景逼帝幸西州夏五月丙辰東魏靜帝遜位于齊  
庚午開府儀同三司都陽王範薨自春迄夏大旱人相食  
都下尤甚六月庚子前司州刺史羊鴉仁自尚書省出奔

江陵秋七月戊辰賊行臺任約寇江州刺史尋陽王大心以州降之八月甲午湘東王繹遣領軍將軍王僧辯逼郢州邵陵王綸棄郢州走九月乙亥侯景自進位相國封二十郡為漢王冬十月乙未景又逼帝幸西州曲宴自加字宙大將軍都督六合諸軍事立皇子大鈞為西陽郡王大威為武寧郡王大球為建安郡王大昕為義安郡王大摯為綏建郡王大園為樂梁郡王壬寅侯景害司空南康王會理十一月任約進據西陽分兵徼齊魯執衡陽王獻送都下害之湘東王繹遣前寧州刺史徐文盛拒約南郡王前中興參軍張彪起義於會稽若邪山攻破浙東諸縣

二年春二月邵陵王綸走至安陸董城為魏所攻見殺三月庚戌魏文帝崩夏閏四月侯景圍巴陵六月乙巳解圍宵遁秋七月景還至建鄴八月戊午景遣偽衛尉卿彭雋廂公王僧貴入殿廢帝為晉安王害皇太子大器尋陽王大心西陽王大鈞武寧王大威建安王大球義安王大昕及尋陽王諸子二十餘人矯為帝詔以為次當支庶宜歸正嫡禪位于豫章王棟使呂季略送詔令帝寫之帝書至先皇念神器之重思社稷之固越外非次遂主震方嗚咽不能自止賊衆皆為掩泣乃幽帝于永福省棟即位改元天正使害南海王大臨於吳郡南郡王大連於姑熟安陸

王大春於會稽新興王大莊於京口冬十月壬寅帝崩於  
求福省時年四十九賊偽謚曰明皇帝廟稱高宗明年三  
月己丑王僧辯平侯景率百官奉梓宮升朝堂元帝追崇  
爲簡文皇帝廟號太宗四月乙丑葬莊陵帝幼而聰睿六  
歲便能屬文武帝弗之信於前面試帝攬筆立成文武帝  
歎曰常以東阿爲虛今則信矣及長器宇寬弘未嘗見喜  
愠色尊嚴若神方頤豐下須鬚如畫直髮委地雙眉翠色  
項毛左旋連錢入背手執玉如意不相分辨眄睞則目光  
燭人讀書十行俱下辭藻艷發博綜羣言善談玄理自十  
一便能親庶務歷試藩政所在稱美性恭孝居穆貴嬪憂

哀毀骨立所坐席露濕盡爛在襄陽拜表侵魏遣長史柳  
津司馬董當門牓武將軍杜懷寶振遠將軍曹義宗等進  
軍尅南陽新野等郡拓地千餘里及居監撫多所弘宥文  
案簿領纖豪必察弘納文學之士賞接無倦嘗於玄圃述  
武帝所製五經講疏聽者傾朝野雅好賦詩其自序云七  
歲有詩癖長而不倦然帝文傷於輕靡時號宮體所著昭  
明太子傳五卷諸王傳三十卷禮大義二十卷長春義記  
一百卷法寶連璧三百卷謝客文涇渭三卷玉簡五十卷  
光明符十二卷易林十七卷竈經二卷沐浴經三卷馬槊  
譜一卷碁品五卷彈碁譜一卷新增白澤圖五卷如意方

十卷文集一百卷並行於世初即位制年號將曰文明以  
外制強臣取周易內文明而外柔順之義恐賊覺乃改爲  
大寶雖在蒙塵尚引諸儒論道說義披尋墳史未嘗暫釋  
及見南康王會理誅知不久指所居殿謂舍人殷不害曰  
龐涓死此下又曰吾昨夢吞土試思之不害曰昔重耳饋  
塊卒反晉國陛下所夢將符是乎帝曰儻幽宜有徵異斯  
言不妄初景納帝女溧陽公主公主有美色景惑之妨於  
政事王偉每以爲言景以告主主出惡言偉知之懼見諛  
乃謀廢帝而後間主苦勸行殺以絕衆心廢後王偉乃與  
彭儁王脩纂進觴於帝曰丞相以陛下幽憂旣久使臣上

壽帝笑曰已禪帝位何得言陛下此壽酒將不盡此乎於  
是雋等并齎酒餚曲項琵琶與帝極飲帝知將見殺乃盡  
酣謂口不圖爲樂一至於斯旣醉而寢偉乃出雋進土囊  
王脩纂坐上乃崩竟協於夢偉撤戶扉爲棺遷殯于城北  
酒庫中帝自幽繫之後賊乃撤內外侍衛使突騎圍守牆  
垣悉有枳棘無復紙乃書壁及板鄣爲文自序云有梁正  
士蘭陵蕭世讚立身行道終始若一風雨如晦雞鳴不已  
爲欺暗室豈況三光數至於此命也如何又爲文數百篇  
崩後王偉觀之惡其辭切即使刮去有隨偉入者誦其連  
珠三首詩四篇絕句五篇文並悽愴云

世祖孝元皇帝諱縹字世誠小字七符武帝第七子也初  
武帝夢眇目僧執香鑪稱託生王宮既而帝母在采女次  
侍始褰戶幔有風回裾武帝意感幸之采女夢月墮懷中  
遂孕天監七年八月丁巳生帝舉室中非常香有紫胞之  
異武帝竒之因賜采女姓阮進為脩容十三年封湘東王  
太清元年累遷為鎮西將軍都督荊州刺史三年三月侯  
景隋建鄴四月世子方等至自建鄴知臺城不守帝命撫  
江陵城周回七十里鎮西長史王冲等拜牋請為太尉都  
督中外諸軍事承制主盟帝不許曰吾於天下不賤寧侯  
都督之名帝子之尊何藉上台之位議者可斬投筆流淚

洋等重請不從又請為司空以立諸侯亦弗聽乃開鎮西  
府辟天下士是月帝徵兵於湘州刺史河東王譽譽拒命  
尋上甲侯韶自建鄴至宣三月十五日密詔授帝位假黃  
鉞大都督中外諸軍事司徒承制於是立行臺於南郡而  
置官司焉七月遣世子方等討河東王譽軍敗死之又遣  
鎮西將軍鮑泉討譽九月乙卯雍州刺史岳陽王譽舉兵  
寇江陵其將杜蒯兄弟來降譽遁走鮑泉攻湘州未剋又  
遣左衛將軍王僧辯代將及簡文帝即位改元為大寶元  
年帝以簡文制于賊臣卒不遵用正月使少子方晷質于  
魏魏不受質而結為兄弟四月剋湘州斬譽湘州平雍州

南史卷八  
刺史岳陽王登自稱梁王蕃于魏魏遣兵助伐襄陽先是  
邵陵王綸書已言凶事祕之以待湘州之捷是月壬寅始  
命陳瑩報武帝崩問帝哭于正寢六月江夏王大款山陽  
王大成宜都王大封自信安來奔九月辛酉以前郢州刺  
史南平王恪為中衛將軍尚書令開府儀同三司改封大  
款為臨川郡王大成為桂陽郡王大封為汝南郡王十一  
月甲子南平王恪等奉牋進位相國摠百揆帝不從二年  
三月侯景悉兵西上閏四月景遣其將宋子仙任約襲郢  
州執刺史方諸庚戌領軍王僧辯屯師巴陵五月癸未帝  
遣將胡僧祐陸法和援巴陵六月僧祐等擊破景將任約

軍禽約景解圍肖道以王僧辯為征東將軍開府儀同三  
司尚書令帥眾追景所至皆捷進圍郢州獲賊將宋子仙  
等九月盤盤國獻馴象十月辛丑朔紫雲如蓋臨江陵城  
是月簡文帝崩開府儀同三司王僧辯等奉表勸進帝奉  
諱大臨三日百官縞素答表不許司空南平王恪率宗室  
領軍將軍胡僧祐率群僚江州別駕張佚率吏人並奉牋  
勸進帝固讓十一月乙亥僧辯又奉表勸進又不從時巨  
寇尚存帝未欲即位而四方表勸前後相屬乃下令斷表  
承聖元年二月王僧辯眾軍發自尋陽帝馳檄四方購獲  
景及逆者封萬戶開國公絹布五萬疋三月僧辯等平景

傳首江陵戊子以賊平告明堂太社己丑僧辯等又表勸  
進曰衆軍以今月戊子摠集建康賊景烏伏獸窮頻擊頻  
挫姦竭詐盡深溝自固臣等分勒武旅百道同趨突騎短  
兵犀函鐵楯結隊千羣持戟百萬止紂七步圍項三重轟  
然大潰羣凶四滅京師少長俱稱萬歲長安酒食於此價  
高九縣雲開六合清朗矧伊黔首誰不載躍伏惟陛下咀  
痛茹哀嬰憤忍酷自紫庭絳闕胡塵四起墟垣好時異馬  
雲屯泣血臨兵嘗膽誓衆而吳楚一家方與七國俱反管  
蔡流言又以三監作亂西涼義衆阻秦塞而不通并州遺  
黎跨飛狐而見絕豺狼當路非止一人鯨鯢不梟倏焉五

載美武克振怒耻並雪求尋霜露伊何可勝臣等輒依故  
實奉脩社廟使者持節分告園陵嗣后升遐龍輜未殯承  
華掩曜梓宮莫測並即隨由備辦禮具凶荒四海同哀六  
軍袒哭聖情孝友理當感慟日者百司岳牧仰祈宸鑒以  
錫珪之功旣歸有道當璧之禮允屬聖明而優詔謙冲香  
然凝竅飛龍可濟而乾交在四帝闔云叫而閭闔未開謳  
歌再馳是用翹首所以越人固執熏丹穴以求君周人樂  
推蒲岐山而事主漢王不即位無以貴功臣光武止蕭王  
豈謂紹宗廟黃帝迷於襄城尚訪御人之道放勛寂於姑  
射猶使鐔俎有歸伊此儻來豈聖人所欲帝王所應不獲

已而然伏讀聖書尋諷制旨領懷物外未奉慈衷陛下日  
角龍顏之姿表於徇齊之日彤雲素靈之瑞基於應物之  
初博學則大哉無所與名深言則曄乎文章之觀忠為令  
德孝實勳天加以英威茂略雄圖武筭指麾則舟浦不戰  
顧眎則阪泉自蕩地維絕而重紐天柱傾而更植鑿河津  
於孟門百川復啓補穹儀以五石萬物再生縱陛下拂衣  
而游廣城登崦山而去東土羣臣安得仰訴北燕何所歸  
仁沉郊祀配天靈籙禮贖齋宮清廟匏竹不陳仰望鸞輿  
匪朝伊夕瞻言法駕載渴且飢豈可久稽衆議有曠彝則  
舊邦凱復函洛已平高奴櫟陽宮館維毀濁河清渭佳氣

猶存臯門有元甘泉凶敞土圭測景仙人承露斯蓋九州  
之赤縣六合之樞機博士捧圖書而稍還太常定禮儀其  
已立豈得不揚清馨而赴名都具玉鑿而旋正寢昔東周  
既遷鎬京遂其不復長安一亂郊洛永以為居夏后以萬  
國朝諸侯文王以六州匡天下方之跡基百里劔杖三尺  
以殘楚之地抗拒六戎一旅之卒翦夷二叛坦然大定御  
辯東歸解五牛於冀州秣六馬於譙郡緬求前古其可得  
歟對揚天命無所讓德有理存焉敢重新祈奏帝尚未從辛  
卯宣猛將軍朱買臣奉帝密旨善豫章王棟及其二弟橋  
穆四月乙巳益州刺史新除假黃鉞太尉武陵王紀僭位

於蜀年號天正帝遣兼司空蕭泰祠部尚書樂子雲拜謁  
瑩陵脩復社廟丁巳下令解嚴五月庚午司空南平王恪  
及宗室王侯大都督王僧辯等復拜表上尊號帝猶固讓  
甲申以開府儀同三司江州刺史王僧辯為司徒乙酉斬  
賊左僕射王偉尚書呂季略少府卿周石珍舍人嚴實於  
江陵市乃下令赦境內齊將潘樂辛術等攻秦郡王僧辯  
遣將杜弼帥眾拒之以陳霸先為征北大將軍開府儀同  
三司徐州刺史齊人賀平侯京八月武陵王紀率巴蜀之  
眾東下遣護軍將軍陸法和屯巴峽以拒之九月甲戌司  
空南平王恪薨十月乙未前梁州刺史蕭循自魏至江陵

以為平北將軍開府儀同三司戊申執湘州刺史王琳於  
殿內庚戌琳長史陸納及其將潘烏累等舉兵反攻陷湘  
州是月四方征鎮王公卿士復勸進表三上乃許之冬十  
一月丙子皇帝即位於江陵改太清六年為承聖元年通  
租宿貢並許弘宥孝子順孫悉皆賜爵長徒鎮士特加原  
宥禁錮倉勞一皆曠蕩是日帝不升正殿公卿陪列而已  
特有兩日俱見己卯立王太子方矩為皇太子改名元良  
立皇太子方智為晉安郡王方略為始安郡王追尊所生妣  
阮脩容為文宣太后改謚忠壯太子為武烈太子封武烈  
子莊為永嘉王是月陸納遣將軍潘烏累等破衡州刺史

下道貴於淶口道貴走零陵十二月陸納分兵襲巴陵湘  
州刺史蕭循擊走之天門山獲野人出山三日而死星隕  
吳郡淮南有野象數百壞人室廬宣城郡猛獸暴食人是  
歲魏廢帝元年

二年春正月乙丑詔上僧辯討陸納戊寅以吏部尚書王  
褒為尚書僕射己卯江夏宮南門齧牡飛三月庚寅有兩  
龍見湘州西江夏五月甲申魏大將尉遲迴進兵逼巴西  
潼州刺史楊乾運以城納迴己丑武陵王紀軍至西陵六  
月乙卯王僧辯平湘州秋七月武陵王紀衆大潰見殺八  
月戊戌尉遲迴平蜀九月齊遣郭元建及將邢景遠步大

洋薩東方老帥衆頓合肥冬十一月辛酉僧辯留鎮姑熟  
豫州刺史侯瑱據東關壘徵具興太守裴之橫帥衆繼之  
戊戌以尚書僕射王褒為左僕射湘東太守張綰為右僕  
射十二月宿豫土人東方光據城歸北齊江西州郡皆起  
兵應之

三年春正月魏帝為相安定公所廢而立齊王廓是為恭  
帝元年三月主衣庫見黑蛇長丈許數十小蛇隨之舉頭  
高丈餘南望俄失所在帝又與宮人幸玄洲苑復見大蛇  
盤屈於前羣小蛇遶之並黑色帝惡之宮人曰此非怪也  
恐是錢龍帝敕所司即日取數千萬錢鎮於蛇處以厭之

因設法會救囚徒振窮乏退居栖心省又有蛇從屋墮落  
帝帽上忽然便失又龍光殿上所御有輿復見小蛇紫屈  
輿中以頭駕夾膝前金龍頭上見人走去逐之不及城濠  
中龍騰出煥爛五色竦躍入雲六七小龍相隨飛去羣魚  
騰躍墜死於陸道龍處為窟若數百斛圍舊大城上常有  
紫氣至時稍復消歇甲辰以司徒王僧辯為太尉車騎大  
將軍戊申以護軍將軍郢州刺史陸法和為司徒夏四月  
癸酉以征北大將軍開府儀同三司陳霸先為司空六月  
癸未有黑氣如龍見于殿內秋九月辛卯帝於龍光殿述  
老子義先是魏使宇文仁恕來聘齊使又至江陵帝接仁

恕有關魏相安定公憾焉乙巳使柱國萬紐于謹來攻冬  
十月丙寅魏軍至襄陽梁王蕭譽率眾會之丁卯停講內  
外戒嚴輿駕出行城柵大風拔木丙子續講百寮戎服以  
聽詔徵王僧辯十一月甲申幸津陽門講武置南北兩城  
主帝親觀閱風雨恊集部分未交旗幟飄亂帝趣駕而回  
無復次序風雨隨息眾竊驚焉乙酉以領軍胡僧祐為都  
督城東城北諸軍事右僕射張綰為副右僕射王襲都督  
城西城南諸軍事直殿省元景亮為副丁亥魏軍至柵下  
丙申徵廣州刺史王琳入援丁酉大風城內火燒居人數  
千家以為失在婦人斬首尸之是日帝猶賦詩無廢以胡

僧祐為開府儀同三司庚子信州刺史徐世譜晉安王司馬任約軍次馬頭岸是夜有流星墜城中帝援著筮之卦成取龜式驗之因抵于地曰吾若死此下豈非命乎因裂帛為書懼僧辯曰吾忍死待公可以至矣戊申胡僧祐朱賈臣等出戰買臣敗績辛亥魏軍大攻帝出批把門親臨陣督戰僧祐中流矢薨軍敗反者斬西門守卒以納魏軍帝見執如梁王蕭譽營其見詰辱他日乃見魏僕射長孫儉誦儉云埋金千斤於城內欲以相贈儉乃將帝入城帝因述答相辱狀謂儉曰向聊相譎欲言耳豈有天子自埋金乎儉乃留帝於主文庫十二月丙辰徐世譜任約退成

巴陵辛未魏人戕帝明年四方梁王方智承制追尊為元皇帝廟號世祖帝聰悟俊朗天才英發出言為論音響若鍾年五六歲武帝嘗問所讀書對曰能誦曲禮武帝使誦之即誦上篇左右莫不驚歎初生患眼醫療必增武帝自下意療之遂盲一日乃憶先夢彌加愍愛及長好學博極羣書武帝嘗問曰孫策在江東于時年幾荅曰十七武帝曰正是汝年帝性不好聲色頗慕高名為荊州刺史起州學宣尼廟嘗置儒林參軍一人勸學從事二人生三十人加稟餼帝工書善畫自圖宣尼像為之贊而善之時人謂之三絕與裴子野劉顯蕭子雲張纘及當時才秀為布衣

交常自比諸葛亮桓溫惟續許為性好矯飾多狙忌於名  
無所假人微有勝已者必加毀害帝姑義興昭長公主子  
王銓兄弟八九人有盛名帝妬害其美遂改寵姬王氏兄  
王珩名琳以同其父名忌劉之遴學使人鴆之如此者甚  
衆雖骨肉亦徼被其禍始居文宣太后憂依丁蘭作木母  
及武帝崩秘喪逾年乃發凶問方刻檀為像置千百福殿  
內事之甚謹朝夕進蔬食動靜必啓聞迹其虛矯如此性  
愛書籍既患目多不自執卷置讀書左右番次上直晝夜  
為常略無休息雖睡卷猶不釋五人各伺一更恒致達曉  
常眠熟大鼾左右有聽讀史次第或偷卷度紙帝必驚覺

更令追讀加以擯楚雖戎略殷湊機務繁多軍書羽檄文  
章詔誥點毫便就殆不游手常曰我韜於文士愧於武夫  
論者以為得言始在尋陽夢人曰天下將亂王必維之又  
背生黑子巫媪見曰此大貴不可言初武帝敕加董為帝  
府諮議使講三禮董西上意甚不悅過別御史中丞江革  
江革告之曰吾嘗夢主上徧見諸子至湘東王脫帽授之  
此人後必當璧卿其行乎革領之及太清之禍遂膺歸運  
自侯景之難州郡大半入魏自巴陵以下至建康緣以長  
江為限荊州界北盡武寧西拒峽口自嶺以南復為蕭勃  
所據文軌所同千里而近人戶著籍不盈三万中興之盛

盡於是矣武陵之平議者欲因其舟艦遷都建鄴宗懷黃  
羅漢皆楚人不願移帝及胡僧祐亦俱未欲動僕射王褒  
左戶尚書周弘正驟言即楚非便宗懷及御史大夫劉懿  
以為建鄴王氣已盡且渚宮洲已滿百於是乃留尋而歲  
星在井熒惑守心帝觀之慨然而謂朝臣文武曰吾觀玄  
象將恐有賊但吉凶在我運數由天避之何益及魏軍逼  
闔人朱買臣按劔進曰惟有斬宗懷黃羅漢可以謝天下  
帝曰襄實吾意宗懷何罪二人退入於人中及魏人燒柵  
買臣謝荅仁勸帝乘暗潰圍出就任約帝素不便馳馬曰  
事必無成徒增辱耳荅仁又求自扶帝以問僕射王褒襄

曰荅仁侯景之黨豈是可信成彼之勳不如降也乃聚圖  
書十餘萬卷盡燒之荅仁又請守子城收兵可得五千人  
帝然之即授城內大都督以帝鼓吹給之配以公主既而  
又召王褒謀之荅仁請入不得歐血而去遂使皇太子王  
褒出質請降有頃黃門郎裴政犯門而出帝乘白馬素衣  
出東門抽劔擊闔曰蕭世誠一至此乎魏師至凡二十八  
日徵兵四方未至而城見剋在幽逼求酒飲之製詩四絕  
其一曰南風且絕唱西陵最可悲今日還蒿里終非封禪  
時其二曰人世逢百六天道異貞恒何言異螻蟻一旦損  
鷗鵬其三曰松風侵曉哀霜零當夜來寂寥千載後誰畏

軒轅臺其四曰夜長無歲月安知秋與春原陵五樹杏空  
得動耕人梁王嘗遣尚書傳準監行刑帝謂之曰卿幸為  
我宣行準捧詩流淚不能禁進土囊而殞之梁王嘗使以  
布帊纏屍斂以蒲席束以白茅以車一乘葬于津陽門外  
愍懷太子元良及始安王方略等皆見害徐世譜任約自  
馬頭走巴陵約後降于齊將軍裴畿畿弟機並被害謝朓  
仁三人相抱俱見屠汝南王大封尚書左僕射王褒以下  
並為俘以歸長安乃選百姓男女數萬口分為奴婢小弱  
者皆殺之帝於伎術無所不該嘗不得南信筮之遇剝之  
良曰南信已至今當遣左右李心往看果如所說賓客咸

驚其妙凡所占決皆然初從劉景受相術因訊以年荅曰  
未至五十當有小厄禳之可免帝自勉曰苟有期會禳之  
何益及是四十七矣特多禁忌牆壁崩倒屋宇傾頽年月  
不便終不脩改庭草蕪沒令鞭去之其慎護如此著孝德  
傳忠臣傳各三十卷丹楊尹傳十卷注漢書一百十五卷  
周易講疏十卷內典博要百卷連山三十卷詞林三卷玉  
韜金樓子補闕子各十卷老子講疏四卷懷舊傳二卷古  
今全德志荆南地記貢職圖古今同姓名錄一卷筮經十  
二卷式贊三卷文集五十卷初承聖二年三月有二龍自  
南郡城西升天百姓聚觀五采分明江陵故老竊相泣曰

昔年龍出建康淮而天下太亂今復有焉禍至無日矣帝  
聞而惡之踰年而遘禍又江陵先有九十九洲古老相承  
云洲滿百當出天子桓玄之為荊州刺史內懷篡逆之心  
乃遣鑿破一洲以應百數隨而崩散竟無所成宋文帝為  
宜都王在藩一洲自立俄而文帝纂統後遇元凶之禍此  
州還沒太清末枝江揚之閤浦復生一洲羣公上疏稱慶  
明年而帝即位承聖末其洲與大岸相通惟九十九云  
敬皇帝諱方智字慧相小字法真元帝第九子也太清三  
年封興梁侯承聖元年封晉安郡王二年出為江州刺史  
三年十一月魏剋江陵太尉王僧辯司空陳霸先定議以

帝為梁王太宰承制四年二月癸丑於江州奉迎至建鄴  
入居朝堂以太尉王僧辯為中書監錄尚書驃騎大將軍  
都督中外諸軍事加司空陳霸先班劍二十人以湘州刺  
史蕭循為太尉廣州刺史蕭勃為司徒三月齊遣其上黨  
王高渙送貞陽侯蕭明來主梁嗣至東關遣吳興太守裴  
之橫拒之與戰敗績死之四月司徒陸法和以郢州附齊  
遣江州刺史侯瑱討之七月辛丑僧辯納貞陽侯蕭明自  
採石濟江甲辰入建鄴丙午即偽位號天成以帝為皇  
太子司空陳霸先襲殺王僧辯黜蕭明而奉帝焉  
紹泰元年秋九月丙午皇帝即位冬十月己巳大赦改元

以貞陽侯蕭明為司徒封建安郡公王子加司空陳霸先  
尚書令都督中外諸軍事震州刺史杜龕舉兵攻信武將  
軍陳舊於長城義興太守韋載應之癸丑以太尉蕭循為  
太保以司徒蕭明為大傅司徒蕭勃為太尉以鎮南將軍  
王琳為車騎將軍開府儀同三司戊午尊所生夏貴妃為  
皇太后立妃王氏為皇后辛未司空陳霸先東討韋載降  
之丙子南豫州刺史任約譙秦二州刺史徐嗣徽舉兵據  
石頭反十一月庚辰齊安州刺史翟子崇楚州刺史柳達  
摩率衆赴任約入石頭十二月庚戌任約徐嗣徽等至採  
石迎齊援丙辰遣猛烈將軍侯安都於江寧邀擊敗之約

嗣徽等奔江西庚申翟子崇等降並放還北

太平元年春正月戊寅大赦追贈謚簡文帝諸子封故末  
安侯確子後為邵陵王奉攜王後癸未震州刺史杜龕降  
詔賜死赦吳興郡已亥以太保宜豐侯蕭循襲封都陽王  
東揚州刺史張彪圍臨海太守王懷振於剡若二月庚戌  
遣周文育陳蒨龍褒會稽討彪敗走以中衛將軍臨川王大  
款即本號開府儀同三司丙辰若邪村人斬張彪傳首建  
鄴赦東揚州甲子以東土經杜龕張彪之亂遣大使巡省  
是月齊人來聘使侍中王廓報聘三月壬午班下遠近並  
雜用今古錢戊戌齊將蕭軌出柵口向梁山陳霸先大敗

之夏四月壬申侯安都輕兵龍衣齊行臺司馬恭於歷陽大  
破之五月癸未太傅建安公蕭明薨庚寅齊軍水步入丹  
楊縣內外纂嚴六月壬子齊軍至玄武湖西北乙卯陳霸  
先大破齊軍戊午大赦辛酉解嚴秋七月丙子司空陳霸  
先進位司徒丁亥以開府儀同三司侯瑱為司空八月己  
酉大保鄱陽王楨薨九月壬寅大赦改元司徒陳霸先進  
位丞相錄尚書事改封義興郡公加中權將軍王冲開府  
儀同三司以吏部尚書王通為尚書右僕射冬十月乙亥  
魏相安定公薨十一月起雲龍神武門十二月壬申進太  
尉蕭勃為大保甲午封前壽昌公劉劼為汝陰王前鎮西

法曹行參軍蕭沈為巴陵王奉宋齊二代後庚子魏恭帝  
遜位于周

二年春正月壬寅詔求魯國孔氏族為奉聖侯并繕廟堂  
供備祀典又詔諸州各置中正舊放棄舉選不得輒承單狀  
序官皆須中正押上然後書奏其選中正每求者德該悉  
以他官領之以開府儀同三司王琳為司空以尚書右僕  
射王通為左僕射二月庚午遣領軍將軍徐度入東關太  
保廣州刺史蕭勃舉兵大舉平西將軍周文育平南將軍  
侯安都等南討戊子徐度至合肥燒齊船舶三千艘癸巳  
周文育軍於巴山獲蕭勃為帥歐陽頔二月甲寅德州刺

史陳法武前衡州刺史譚遠於始興攻殺蕭勃夏四月癸酉曲赦江廣衡三州并督內為賊所拘逼者已卯鑄四柱錢一當二十齊遣使通和壬辰改四柱錢一當十丙申復用細錢五月乙巳平西將軍周文育進號鎮南將軍平南將軍侯安都進號鎮北將軍並開府儀同三司戊辰余孝頃遣使詣丞相府求降秋八月加丞相陳霸先殊禮九月周冢字文護殺閔帝丞相陳霸先改授相國封陳國公冬十月戊辰進陳國公爵為王辛未帝遜位于陳陳受命奉帝為江陰王薨于外邸時年十六追謚敬皇帝論曰帝王之位天下之重職文武之道守聘所常遵其於

行用義均水火相資則可專任成亂觀夫有梁諸帝皆一之而已簡文文明之姿稟乎天授粵自支庶入居明兩經國之筭其道弗聞宮體所傳且變朝野雖主虛號何救滅亡元帝居勢勝之地啓中興之業既雪讎恥且應天人而內積猜忍外崇矯飾攀號之節悉酷於踰年定省之制申情於木偶竟而雍州引寇釁起河東之戮益部親尋辜習邵陵之窘悖辭屈於僧辯殘虐極於圓正不義不昵若斯之甚而復謀無經遠心勞志大近捨宗國遠迫強隣外弛藩籬內崇講肆卒於溘至救隕方追始皇之迹雖復文籍滿腹何救社廟之墟歷觀書契以來蓋亦廢興代有未見

三葉遊塵頓若蕭宗之醜敬皇以此冲年當斯類運將不  
高揖其可得乎初武帝末年都下用錢每百皆除其九謂  
為九佰竟而有侯景之亂及江陵將覆每百復除六文稱  
為六佰識者以為九者陽九六者百六蓋符歷數非人事  
也善平鄭文貞公論之曰高祖固天攸縱聰明稽古道亞  
生知學為博物允文允武多藝多才爰自諸生有不羈之  
度屬昏凶肆虐天倫及禍糾合義旅將雪家冤曰紂可伐  
不期而會龍躍樊漢電擊湘郢窮離德如振槁取獨夫如  
拾遺其雄才大略固無得而稱矣既縣白旗之首方應皇  
天之眷布德施惠悅近來遠開蕩蕩之王道革靡靡之商

俗大脩文教益飾禮容鼓前玄風闡初儒業介胄仁義折  
衝尊俎聲振寰宇澤流遐裔干戈載戢凡數十年濟濟焉  
洋洋焉魏晉以來未有若斯之盛也然不能息末敦本斷  
彫為樸慕名好事崇尚浮華抑揚孔墨流連釋老或終夜  
不寢或日旰不食非弘道以利物惟飾智以驚愚且心未  
遺榮虛廁蒼頭之位高談脫屣終戀黃屋之尊夫人之大  
欲在乎飲食男之至於軒冕殿堂非有切身之急高祖屏  
除嗜欲眷戀軒冕得其所難而滯於所易可謂神有所不  
達者有所不通矣逮夫精華稍竭鳳德已衰惑於聽受權  
在奸佞儲后百辟莫能盡言險躁之心暮年逾甚見利而

動懷諫違卜開門揖盜棄好即讎釁起蕭牆禍成戎羯身  
殆非命災被億兆衣冠斃鋒鏑之下老幼粉戎馬之足瞻  
彼黍離痛深周廟永言來矣悲甚殷墟自古以安為危既  
成而敗顛覆之速書契所未聞也易曰天之所助者順人  
之所助者信高祖之遇斯屯剝不得其死蓋動而之險不  
由信順失天人之助其能免於此乎太宗敏叡過人神采  
秀發多聞博達富贍詞藻然文艷用寡華而不實體窮淫  
麗義罕踈通哀思之音遂移風俗以此而貞萬國異乎周  
誦漢莊矣我生不辰載離多難桀逆構扇巨猾滔天始同  
牖里之拘終類望夷之禍悠悠蒼昊其可問哉昔國步初

屯兵纏魏闕群石釋位投袂勤王元帝以盤石之序受分  
陝之任屬君親之難居連率之長不能撫劍嘗膽枕戈泣  
血躬先士卒致命前驅遂乃擁眾逡巡內懷歎望坐觀國  
變以為身幸不急莽卓之誅先行昆弟之戮又沈猜忍酷  
多行無禮騁智辯以飾非肆忿戾以害物爪牙重將心膂  
謀臣或顧眄以就拘囚或一言而及菹醢朝之君子相顧  
慄然自謂安若太山筭無遺策怵於邪說即安荆楚雖元  
惡克翦社稷未寧而西隣責言禍敗旋及斯乃上靈降鑒  
此焉假手天道人事其可誣乎其篤志藝文採浮華而棄  
忠信戎昭果毅先骨肉而後寇讎口誦六經心通百氏有

仲尼之學有公旦之才適足以益其驕矜增其禍患何補  
金陵之覆沒救江陵之滅亡哉故帝遭家不造紹茲屯運  
征伐有所自出政刑不由於已時無伊霍之輔焉得不為  
高讓歟

梁本紀下第八

南史八

陳本紀上第九

南史九

李

延壽

陳高祖武皇帝諱霸先字興國小字法生吳興長城下若  
里人姓陳氏其本甚微自云漢太丘長寔之後也寔玄孫  
晉太尉準進生匡匡生達永嘉中南遷為丞相掾太子洗  
馬出為長城令悅其山水遂家焉嘗謂所親曰此地山川  
秀麗當有王者興焉二百年後我子孫必鍾斯運達生康  
復為丞相掾咸和中土斷故為長城人康生盱台太守英  
英生尚書郎公弼公弼生步兵校尉鼎鼎生散騎侍郎高  
高生懷安令詠詠生安成太守猛猛生太常卿道巨道巨

生皇考文讚帝以梁天監二年癸未歲生少儻有大志長於謀略意氣雄傑不事生產及長涉獵史籍好讀兵書明緯候孤虛遁甲之術多武藝明達果斷為當時推服身長七尺五寸日角龍顏垂手過膝嘗游義興館於許氏夢天開數丈有四人朱衣捧日而至納之帝口及覺腹內猶熱帝心獨喜初仕鄉為里司後至建鄴為油庫吏徙為新諭侯蕭映傳教勤於其事為映所賞及映為吳興太守甚重帝謂僚佐曰此人將來遠大必勝於我及映為廣州帝為中直兵參軍隨之鎮映令帝招集士馬先是武林侯蕭諮為交州刺史以嚴刻失和土人李賁連結數州豪傑同

時反臺遣高州刺史孫罔新州刺史盧子雄將兵擊賁罔等不時進皆於廣州伏誅子雄弟子略與罔子姪及其主帥杜天合杜僧明共舉兵執南江督護沈顛進寇廣州晝夜苦攻州中震恐帝率精兵救之賊衆大潰僧明後有功業遂降梁武帝深歎異焉授直閣將軍封新枋縣子仍遣圖帝貌而觀之其年冬蕭映卒明年帝送喪還至大庾嶺會有詔以帝為交州司馬與刺史楊暕南討帝益招勇敢器械精利暕委帝經略時蕭勃為定州刺史於西江相會勃知軍士憚遠役因詭說留暕集諸將問計帝曰交阯叛換罪由宗室節下奉辭伐罪故當死生以之於是鼓行

而進軍至交州驃推帝為前鋒所向摧陷賁竄入屈獠洞中屈獠斬賁傳首建鄴是歲太清元年也賁兄天寶遁入九真與劫帥李紹隆收餘兵殺德州刺史陳文戒進圍愛州帝討平之除西江督護高要太守督七郡諸軍事二年冬侯景寇逼帝將赴援廣州刺史元景仲陰將圖帝帝知之與成州刺史王懷明等集兵於南海馳檄以討景仲景仲溢於閣下帝迎蕭勃鎮廣州時臨賀內史歐陽頎監衡州蘭裕蘭京禮扇誘始興等十郡共攻頎頎請援於勃勃令帝救之悉禽裕等仍監始興郡事帝遣杜僧明胡頴將二千人頓于嶺上并厚結始興豪傑同謀義舉侯安都張

偲等率衆來附蕭勃聞之遣鍾休悅說偲帝帝泣謂休悅曰君辱臣死誰敢愛命僕行計決矣時終路養起兵據南康勃遣腹心譚世遠為曲江令與路養相結同逼義軍大寶元年正月帝發始興次大庾嶺大破路養軍進頓南康湘東王繹承制授帝交州刺史改封南野縣伯於是脩理崎頭古城徙居之劉惠襄等望見恒有紫氣冒城上遠近驚異故惠襄等深自結於帝尋改封長城縣侯南江州刺史時寧都人劉諱等資高州刺史李遷仕舟艦兵仗將襲南康帝遣杜僧明等據白口禦之二年僧明禽遷任送南康斬之承制授帝江州刺史帝發南康瀘石舊有二十四

灘灘多巨石行旅以為難帝之發水暴起數丈三百里間  
巨石皆沒進軍頓西昌有龍見水濱高五丈丑采鮮曜軍  
人觀者數萬人帝又嘗獨坐胡牀於閣下忽有神光滿閣  
廊廡之間並得相見趙知禮侍側性而問帝帝笑不答時  
承制遣征東將軍王僧辯督衆軍討侯景次益城帝率杜  
僧明等合三萬將會焉時西軍乏食帝先計軍糧五十萬  
石至是分三十萬石以資之仍頓巴丘會侯景廢簡文立  
豫章嗣王棟帝遣兼長史沈袞奉表於江陵勸進承制授  
帝東揚州刺史領會稽太守三年帝帥師發自豫章二月  
次桑落洲時僧辯已發益城會帝于白茅灣乃登岸結壇

刑牲盟約進次大雷軍人杜稜夢雷池君周何神自稱征  
討大將軍棄朱航陳甲仗稱下征侯景須臾便還云已殺  
景竟三月帝與諸軍進剋姑孰仍次蔡洲侯景登石頭城  
望官軍之盛不悅曰一把子人何足可打密謂左右曰此  
軍上有紫氣不易可當乃以般舫貯石沈塞淮口緣淮作  
城自石頭迄青溪十餘里中樓雉相接僧辯遣杜崩問計  
於帝帝以諸將不敢當鋒請先往立柵即於石頭西橫壠  
築柵衆軍次連八城直出東北賊恐西州路斷亦於東北  
果林作五城以遏大路帝曰善用兵者如常山之蛇使救  
首救尾困而無暇今我師旣衆賊徒甚寡應分賊兵力以

弱制疆乃命諸將分處置兵帝與王琳杜龕等悉力乘之  
景衆大潰僧辯啓命帝鎮京口五月齊遣將辛術圍嚴超  
達摩秦郡帝命徐度領兵助其固守齊衆起土山穿地道  
攻之甚急帝乃自率萬人解其圍掘旅南歸承制授帝征  
北大將軍開府儀同三司南徐州刺史進封長城縣公及  
王僧辯征陸納於湘州承制命帝代鎮揚州承聖二年湘  
州平帝旋鎮京口二年三月進帝位司空及魏平江陵帝  
與王僧辯等進啓請晉安王以太宰承制十二月晉安王  
至自尋陽入居朝堂給帝班劍二十人四年五月齊送貞  
陽侯明還主社稷王僧辯納之明即位改元天成以晉安  
王為皇太子初齊之納貞陽也帝固爭之以為不可不見  
從帝居常憤歎曰嗣主高祖之孫元皇之子竟有何辜坐  
致廢黜假立非次此情可知乃密具袍數千領及錦綵金  
銀以為賞賜之資九月壬寅帝召徐度侯安都周文育仍  
部列將士水陸俱進夜發南徐州討王僧辯甲辰帝至石  
頭前遣勇士自城北踰入時僧辯方視事聞外白有兵遽  
走帝大兵尋至因風縱火僧辯就禽是夜縊之及其子願  
於是廢貞陽侯而奉晉安王即位改承聖四年為紹泰元  
年壬子詔授帝侍中大都督中外諸軍事重騎將軍揚南  
徐二州刺史持節司空班劍鼓吹並如故仍詔甲仗百人

出入殿省震州刺史杜龕據兵與與義興太守韋載舉兵  
 逆命辛未帝親自東討留高州刺史侯安都石州刺史杜  
 稜宿衛臺省甲戌軍至義興秦州刺史徐嗣徽據城入齊  
 又要南豫州刺史任約舉兵應龕齊人資其兵食嗣徽乘  
 虛奄至闕下侯安都出戰嗣徽等退據石頭丁丑載及龕  
 從弟北史來降帝撫而釋之仍以載兄鼎知郡事以嗣徽  
 寇逼卷甲還都命周文育進討杜龕十一月己卯齊遣兵  
 五千度據姑熟又遣安州刺史程子宗楚州刺史劉士榮  
 淮州刺史柳達摩領兵萬人於胡野度米粟三萬石馬千  
 匹入石頭帝乃遣侯安都領水軍夜襲胡野燒齊船周鐵

武率舟師斷齊運輸帝領鐵騎自西明門龍襲之齊人大潰  
 嗣徽留達摩等守城自率親屬腹心往南州採石以迎齊  
 援先是太白自十一月丙戌不見十二月乙卯出于東方  
 丙辰帝盡命眾軍分部甲卒對冶城日立航度兵攻其水  
 南二柵柳達摩等度淮置陣帝督兵疾戰縱火燒柵煙塵  
 張天齊人大潰盡收其船艦是日嗣徽約等領齊兵還據  
 石頭帝遣侯安都領水軍襲破之嗣徽等單舸脫走丁巳  
 拔石頭南岸柵移度北岸起柵以絕其汲路又堙塞東門  
 故城中諸井齊所據城中無水水一合賀米一升一升米  
 賀絹一疋或炒米食之達摩謂其衆白頃在北童謠云石

頭擣兩襠擣青復擣黃侯景服青已倒於此今吾徒衣黃  
豈謠言驗邪庚申達摩遣侯子欽劉士榮等請和帝許之  
乃於城外盟約其將士恣其南北辛酉帝出石頭南門陳  
兵送齊人歸北者及至齊人殺之壬戌齊和州長史烏丸  
遠自南州奔還歷陽江寧令陳嗣黃門侍郎曹朗據姑熟  
不從帝命侯安都徐度等討平之聚其首為京觀是月杜  
龕以城降二年正月癸未誅龕其弟龕從弟北叟司馬沈  
孝敦並賜死三月戊戌齊遣水軍儀同蕭軌庫狄伏連克  
難宗東方老侍中裴英起東廣州刺史獨孤辟惡洛州刺  
史李希光并任約徐嗣徽王僧愔等衆十萬出柵口向梁

山帳內盪上黃叢逆擊敗之燒其前軍船艦齊頓軍保蕪  
湖五月丙申齊兵至秣陵故城己亥帝率宗室王侯及朝  
臣於大司馬門外白虎闕下刑牲告天以齊人背約發言  
慷慨涕泗交流士卒觀者益奮辛丑齊軍於秣陵故城跨  
淮立橋柵引度兵馬癸卯自方山進及兎塘游騎至臺都  
下震駭帝潛以精卒三千配沈泰度江襲齊行臺趙彥深  
於瓜步獲其舟粟六月甲辰齊兵潛至鍾山龍尾丁未進  
至莫府山帝遣錢明領水軍出江乘要擊齊人糧運盡獲  
之齊軍大餒殺馬驢而食之壬子齊軍至玄武湖西北莫  
府山南將據北郊壇衆軍自覆舟東移頓郊壇北與齊人

相對其夜大雨震電暴風拔木平地水丈餘齊軍晝夜坐  
立泥中縣南以變足指皆爛而臺中及潮溝北水退路燥  
官軍每得番易甲寅少霽是時食盡調市人餽軍皆是麥  
屑為飯以荷葉裹而分給間以麥餅兵士皆困會文帝遣  
送米三千石鴨千頭帝即炊米煮鴨誓申一戰士及防身  
計糧數獨人人裹飯媿以鴨肉帝命衆軍蓐食攻之齊軍  
大潰魏嗣徽及其弟嗣宗斬之以徇虜蕭軌東方老王敬  
寶李希光裴英起王僧智等將帥四十六人其軍士得窺  
至江者縛筏以濟申江而溺流屍至京口者彌岸惟任約  
王僧愔獲免先是童謠云虜萬夫入五湖城南酒家使虜

奴自晉末以後經綰在魏境江淮以北南人皆謂為虜是  
時以賞俘質濟者一人裁得一醉丁巳衆軍出南州燒賊  
舟已未斬劉歸義徐嗣產傳野猪于建康市是日解嚴庚  
申誅蕭軌東方老王敬寶李希光裴英起等太平元年九  
月壬寅帝進位丞相錄尚書事鎮衛大將軍揚州牧進封  
義興郡公庚申追贈皇考侍中光祿大夫封義興郡公謚  
曰恭十月甲戌梁帝敕丞相自今問訊可施別榻以近宸  
坐二年正月壬寅詔加帝班劍十人并前為三十丁未詔  
贈皇兄道談南兖州刺史長城縣公謚曰昭烈皇弟休光  
侍中南徐州刺史武康縣侯謚曰忠壯甲寅遣兼侍中謁

者僕射陸績策拜長城縣夫人章氏為義興國夫人丁卯  
詔贈皇祖侍中太常卿謚曰孝追封皇祖妣許氏吳郡嘉  
興縣君謚曰敬皇妣張氏義興國太夫人謚曰宣二月庚  
午蕭勃舉兵自廣州度嶺頓南康遣其將歐陽頎傳泰及  
其子孜為前軍至豫章分屯要險南江州刺史余孝頃起  
兵應勃帝命周文育侯安都率眾討平之八月甲午帝進  
位太傅加黃鉞劔履上殿入朝不趨贊拜不名丙申加前  
後部羽葆鼓吹是時湘州刺史王琳擁兵不應命遣周文  
育侯安都率眾討之九月辛丑梁帝進帝位相國摠百揆  
封十郡為陳公備九錫之禮加璽綬遠游冠綠綬綬位在

諸侯王上策曰大哉乾元資日月以貞觀至哉坤元憑山  
用以載物故惟天為大陟配者欽明惟王建國翼輔者齊  
聖是以文武之佐稽籙蘊其玉璜堯舜之臣滎河鑿其金  
板况乎體得一之鴻姿寧陽九之危危接橫流於碣石撲  
燎火於崑岡驅馭於韋彭躋躐於齊晉神功行而靡用聖  
道運而無名者乎今將授公典策其敬聽朕命日者昊天  
不弔鍾亂于我國家網漏吞舟疆胡內鼎茫茫宇宙慄慄  
黎元方趾圓顛萬不遺一太清否亢橋山之痛以深大寶  
屯如平陽之禍相繼上宰膺運康救黔黎鞠旅於溟池之  
南揚旌於桂嶺之北縣三光於已墜謚四海於群飛光啓

中興此則公之大造於皇家者也既而天未悔禍夷醜荐  
臻南夏崩騰西京蕩覆豈司昏撓旁引寇讎既見貶於桐  
宮方謀危於漢閣皇運已殆何殊贅旒中國搖然非徒如  
綫公赫然投袂匡救本朝獲晉齊都平戎王室朕所以還  
膺寶曆重寶宸居挹建武之風猷歌宣王之雅頌此又公  
之再造於皇家者也公應務之初登庸惟始孫盧肇豐越  
貊爲災番部帖危勢將淪殄公赤旗所指秋壘洞開白羽  
纒搗凶徒粉潰此又公之功也大同之末邊政不脩李賁  
狂迷竊我交愛公英暮雅舞電掃風行馳御樓船直跨滄  
海三山獠洞八角蠻陬逝矣水寓之鄉悠哉火山之國馬

援之所不屈陶璜之所未開莫不懼我王靈爭朝邊侯歸  
琛天府獻狀鴻臚此又公之功也自寇虜陵江宮闈幽辱  
而番禺連率本自諸夷言得其朋是懷同惡公仗此忠誠  
乘機勦定執沛令而釁鼓平新野而據鞏此又公之功也  
卅道初艱方隅多難公以國盜邊警知無不爲恤是同盟  
誅其醜類南土黔黎重保蘇息此又公之功也長驅崑崙  
夢想京畿緣道酋豪遞爲榛梗路養渠帥全據大都蓄聚  
逋逃方謀阻亂公龍驤虎步嘯吒風雲山靡堅城野無疆  
陣清氛於瀨石滅沴氣於雩都此又公之功也遷仕凶  
慝屯據大臯乞活類馬騰之軍流入多杜弼之衆公坐揮

三略遙制六奇義勇同心此貅騁力雷奔電擊谷靜山空  
 列郡無犬吠之驚叢祠罷狐鳴之盜此又公之功也王師  
 討虜次屆淪波兵乏兼儲士有飢色公回麾彭蠡積穀巴  
 丘億庾之詠斯豐虛漿之吐是衆故使三軍勇銳百戰無  
 前承此兵糧遂殄凶逆此又公之功也益壘猜攜用淹戎  
 略公志惟同獎師克在和屈禮交盟神祇感咽故能使舟  
 師並路遠邇崩心此又公之功也姑孰襟要嶠函所憑寇  
 虜擄其關梁大盜負其肩鏞公一枝纒撓三雄並奮左賢  
 右角沙潰土崩鄂坂之隘斯開夷庚之道無塞此又公之  
 功也義軍大衆俱集帝京逆豎凶徒猶屯皇邑公回茲地

軸抗此天羅曾不崇朝得無遺噍此又公之功也內難初  
 靜諸侯出關外郡傳烽鮮卑犯塞公舟師步甲亘野橫江  
 殲歟羣氏遂殫封豕此又公之功也公克黜禍難劬勞皇  
 室而孫賓之黨翻啓狄人伊洛之間咸為虜成朝闇戎塵  
 夜喧胡鼓公三籌既畫八陣斯張裁舉靈鉞亦抽金僕咸  
 俘醜類悉反高壩此又公之功也任約叛渙梟聲不悛戎  
 羯貪婪狼心無改公左甄右落箕張翼舒掃是攬槍驅其  
 獫狁投秦阮而盡沸噓泄水而不流此又公之功也一相  
 居中自析羣鼎五湖小守妄懷同惡公夙駕兼道衣製杖  
 戎玉斧將揮金鉞且戎衣西震懼遽請灰釘此又公之功

也賊龕凶橫陵霄具區阻兵安忍憑火枯亂公雖宗居汝  
頽世寓東南眷言桑梓公私憤切戮此大憝如烹小鮮此  
又公之功也同姓有虜頑凶不賓憑藉宗盟圖危社稷公  
論兵於廟堂之上決勝於尊俎之間寇賈樊滕浮江下瀨  
一朝翦梗無待旬師此又公之功也豫章袂冠依憑山澤  
繕甲完聚多歷歲時結從連橫爰洎交廣言嘉旣獲吳淠  
已銳命我還師征其不恪連營盡拔偽黨斯禽此又公之  
功也自八紘九野瓜剖豆分竊帝偷王連州比縣公武靈  
已暢文德又宣折簡馳書風猷斯遠此又公之功也京師  
禍亂亟積寒暄雙闕低昂九門寥慙公求衣昧旦反食高

春興構宮闈具瞻遐邇郊庠宗稷之典六符十等之章還  
闡太始之風流重覩永平之遺事此又公之功也公有濟  
天下之勲重之以明德凝神體道合德符天周百姓以為  
心隨萬機以成務上德不德無為以為夏長春生顯仁藏  
用功成化洽樂奏咸雲安上御人禮兼文質是以天無蘊  
寶地有呈祥既景煥於圖書方歲黜於史牒高勲踰於象  
緯積德冠於高華固無得而稱者矣朕又聞之前王宰世  
茂賞尊賢式樹藩長摠征羣伯二南崇絕四履遐曠泱泱  
表海祚土維齊巖巖泰山俾侯于魯況復經營宇宙寧惟  
斷鼉足之功弘濟蒼生非直鑿龍門之險而疇庸報德寂

爾無聞朕所以垂拱當心載懷慙慙者也今授公相國以  
南豫州之陳留南丹揚宣城揚州之吳興東陽新安新蔡  
南徐州之義興江州之鄱陽臨川十郡封公為陳公錫茲  
青土苴以白茅爰定爾邦用建冢社昔旦奭分陝俱為保  
師晉鄭諸侯咸作卿士兼其內外禮實攸宜今命使持節  
兼太尉王通授相國印綬陳公璽紘使持節兼司空王瑒  
授陳公茅土金武符第一至第五左竹使符第一至第十  
左相國秩踰三鉉任摠百司位絕朝班禮由事革以相國  
摠百揆除錄尚書之號上所假節侍中貂蟬中書監印章  
中外都督太傅印綬義興公印策其鎮衛大將軍揚州牧

如故又加公九錫其敬聽後命以公禮為楨幹律等銜策  
四維皆舉八柄有章是用錫公大輅戎輅各一玄牡二馬  
以公賤寶崇穀疏爵待農室富京坻人知榮辱是用錫公  
衮冕之服赤舄副焉以公調理陰陽燮諧風雅三靈允降  
萬國同和是用錫公軒縣之樂六佾之儻以公宣導玉猷  
弘闡風教光景所照韞象必通是用錫公朱戶以居以公  
柳揚清濁褒德進賢聖主盈朝幽人虛谷是用錫公納陛  
以登以公嶷然廊廟為世鎔範析衝四表臨御八荒是用  
錫公武賁之士三百人以公軌茲明罰期在刑厝象恭無  
赦千紀必誅是用錫公斧鉞各一以公英猷遠重跨厲高

涓包一車書括囊爰禹是用錫公彤弓彤矢曰盧弓十  
盧矢十以公天經地義貫徹幽明春露秋霜介供采盛是  
用錫公秬鬯一卣圭瓚副焉陳國置丞相以下一遵舊式  
往欽哉其恭循朕命克相皇天弘建邦家允興鴻業以光  
我高祖之休命十月戊辰又進帝爵為王以揚州之會稽  
臨海永嘉建安南徐州之晉陵信安江州之尋陽豫章安  
成廬陵并前為二十郡益封陳國其相國揚州牧鎮衛大  
將軍並如故又命陳王暕十有二旒建天子旌旗出警入  
蹕乘金根車駕六馬備五時副車置旄頭雲罕樂儻八佾  
設鍾虞宮縣王妃王子王女爵命之號陳臺百官一依舊

典幸未梁帝禪位于陳策曰咨爾陳王惟昔上古厥初生  
人驪連栗陸之前谷成大庭之世杳冥恍忽故靡得而議  
焉自羲農軒昊之君陶唐有虞之主或垂衣而御四海或  
無為而子萬姓居之如馭朽索空之如脫弊屣我遇許由  
便能捨帝暫逢善卷即以讓王故知玄扈璇璣非關尊貴  
金根玉輅示表君臨及南觀河清東沈刻璧青華既竭耄  
勤已倦則抗首而笑惟賢是與謏然作歌簡能斯授遺風  
餘烈昭晰圖書漢魏因循是為政實宋齊授受又弘斯義  
我高祖應期撫運握樞御宇三石重光祖宗齊聖及時屬  
陽九封豕存食西都失馭夷狄交侵乃聚天成輕筭龜鼎

慄慄黔首若崩厥用徽徽皇極討其綴旒惟王乃聖乃神  
欽明文思二儀並運四時合序天錫智勇人挺雄傑珠庭  
日角龍行虎步爰初投袂日廼勤王電掃番禺禹瓘彭蠡  
翦其元惡定我京畿及王賀帝弑買茲冠履旣行伊霍用  
保冲人震澤稽塗竝懷叛逆獯貊虜三亂皇都裁命偏  
師二邦自殄薄伐獫狁六戎盡殪嶺南叛換湘郢連結賊  
帥旣禽凶渠傳首用能百揆時序四門允穆無思不服無  
遠不屆上達穹昊下漏深泉蛟魚並見謳歌攸屬况乎長  
慧黃天已徵布新之兆璧日斯旣定表更姓之符七百無  
常期皇王非一族昔木德旣季而傳祚于我有梁天之歷

數况集明禮式遵前典廣詢群議王公卿君莫不攸屬敬  
從人祗之願授帝位于爾躬四海困窮天祿求終王其允  
執厥中軌儀前式以副溥天之望禋郊祀帝時膺大禮求  
固洪業豈不盛與又命璽書遣兼太保尚書左僕射王通  
兼太尉司徒左長史王瑒奉皇帝璽綬受終之禮一依唐  
虞故事是日梁帝遜于別宮帝謙讓再三群臣固請乃許  
之永定元年冬十月乙亥皇帝即位于南郊柴燎告天曰皇  
帝臣霸先敢用玄牡昭告于皇皇后帝梁氏以圯剝荐臻  
歷運有極欽若天應以命于霸先夫肇有黎蒸乃樹司牧  
選賢與能末常厥姓有梁末運仍葉蓮也獯醜馮陵父移

神器承聖在外非能祀夏天未悔禍復懼寇逆嫡嗣廢黜  
宗枝僭詐天地板蕩紀綱泯絕霸先爰初投袂大極橫流  
重舉義兵實戡多難廢王之帝寔有厥功安國定社用盡  
其力是謂小康方期大道旣而煙雲表色日月呈祥除舊  
布新旣彰玄象遷虞事夏且協謳譔九域八荒同布秉款  
百神群祀皆有誠願梁帝高謝萬邦授以大寶霸先自惟  
菲薄讓德不嗣至于再三辭弗獲許僉以百姓須玉萬機  
難曠皇靈有命非可謙拒畏天之威用膺嘉祚永言夙志  
能無慙德敬簡元辰升壇受禪告類上帝用答毗心求保  
于我有陳惟明靈尚饗先是氛霧雨雪晝夜晦冥至是日

景氣清晏禮畢輿駕還宮臨太極前殿大赦改元賜百姓  
爵二級文武二等鰥寡孤獨不能自存者人穀五斛逋租  
宿責皆勿復收有犯鄉論清議贓污淫盜者皆洗除先注  
與之更始其長徒敕繫特皆原之亡官失爵禁錮奪勞一  
依舊典又詔以江陰郡奉梁主爲江陰王行梁正朔車旗  
服色一依前準梁皇太后爲江陰國太妃皇后爲江陰國  
妃又詔百司各依位攝職丙子幸鍾山祭蔣帝廟戊寅幸  
華林園覽辭訟臨赦囚徒己卯分遣大使宣勞四方庚辰  
詔出佛牙於杜姥宅集四部設無遮大會辛巳追尊皇考  
曰景皇帝廟號太祖皇妣董太夫人曰安皇后前夫人錢

氏為昭皇后世子克為孝懷太子立夫人章氏為皇后癸未尊景帝陵曰瑞陵昭皇后陵曰嘉陵依梁初園陵故事立刪定卽刊定律令戊子遷景皇帝神主祔于太廟是月西討都督周文育侯安都於郢州敗績没于王琳十一月丙申封皇兄子長城縣侯蒨為臨川郡王瑱襲封始興郡王皇弟子曇朗襲封南康郡王庚申都下火十二月庚辰皇后謁太廟是歲周閔帝元年及九月冢宰宇文護廢閔帝而奉明帝又為明帝元年

二年春正月乙未以車騎將軍開府儀同三司侯瑱為司空辛丑祀南郊大赦甲寅遣中書舍人常鼎策吳興楚王神為帝戊午祀明堂二月壬申南豫州刺史沈泰奔齊辛卯詔司空侯瑱督水陸眾軍以禦齊三月王琳立梁永嘉王蕭莊以奉梁後即位于郢州夏四月甲子祀太廟乙丑江陰王殂陳志也追謚梁敬帝詔太宰弔祭司空監護喪事以梁武林侯蕭諮子季卿嗣為江陰王戊辰重雲殿東鷓尾有紫煙屬天五月乙未都下地震壬寅立梁邵陵攜王廟室祭以太牢辛酉帝幸大莊嚴寺捨身壬戌群臣表請還宮六月己巳詔司空侯瑱領軍將軍徐度討王琳初侯景之平也太極殿被焚承聖中議欲營之獨闕一柱秋七月有樟木六十八圍長四丈五尺流泊陶家後渚監

軍鄒子度以聞詔中書令沈衆兼起部尚書構太極殿八月周文育侯安都等於王琳所逃歸自劾廷尉即日引見宥之並復本官丁亥加江州刺史周迪平南將軍開府儀同三司冬十月庚午遣鎮南將軍周文育都督衆軍出豫章討余孝勳乙亥幸莊嚴寺發金光明經題丁酉加高州刺史黃法甦平南將軍開府儀同三司十二月甲子幸大莊嚴寺設無量大會捨乘輿法物羣臣備法駕奉迎即日還宮丙戌加北江州刺史熊曇朗平西將軍開府儀同三司三年春正月丁酉鎮南將軍廣州刺史歐陽頔即本號開府儀同三司是夜大雪及旦太極殿前有龍跡見甲子廣

州言仙人見于羅浮山寺小石樓二月辛酉加平西將軍桂州刺史淳于量鎮西大將軍開府儀同三司夏閏四月中午詔依前代置西省學士兼取伎術士是時久不雨丙午幸鍾山祭蔣帝廟是日降雨迄于月晦五月丙辰朔日有蝕之有司奏舊儀帝御前殿服朱紗裹通天冠詔曰此乃前代承用意有未同合朔仰助太陽宜備袞冕之服自今未可爲準丙子扶南國遣使朝貢乙酉北江州刺史熊曇朗殺都督周文育舉兵反王琳遣其將常景愛等於左里獲兵接余孝勳六月戊子儀同侯安都敗衆愛等於左里獲琳從弟襲王帥羊暕等四十餘人衆愛遁走庚寅廬山人

斬之傳首建鄴甲午衆軍凱歸丁酉帝不豫遣兼太宰尚  
書右僕射王通以疾告太廟兼太宰中書令謝哲告大社  
南北郊辛丑帝小瘳故司空周文育之極至自建昌壬寅  
帝素服哭于朝堂哀甚癸卯上臨訣獄訟是夜熒惑在天  
尊上疾甚丙午帝崩于瓊璣殿時年五十七遺詔追臨川  
王蒨入纘大業甲寅殯于太極殿西階八月甲午羣臣上  
謚曰武皇帝廟號高祖丙申葬萬安陵帝雄武多英略性  
甚仁愛及居阿衡恒崇寬簡雅尚儉素常膳不過數品私  
饗曲宴皆无器罇盤肴核庶羞裁令充足不為虛費初平  
侯景及立敬帝子女正帛皆班將士其充闡房者衣不重

采飾無金翠聲樂不列於前踐祚之後強厲恭儉故能隆  
功茂德光于江左云

世祖文皇帝諱蒨字子華始興昭烈王之長子也少沈敏  
有識量美容儀留意經史武帝甚愛之常稱吾家英秀梁  
太清初帝夢兩日關一大一小大者元滅墜地色正黃其  
大如斗帝三分取一懷之侯景之亂避地臨安縣郭文舉  
舊宅及武帝舉兵南下景遣吳興太守信都遵收帝及衡  
陽獻王出都帝乃密袖小刀候見景欲圖之及至以付郎  
中王翻幽守故其事不遂武帝圍石頭景欲加害者數矣  
會景敗乃得出起家是興太守武帝之討王僧辯也先召

帝與謀時僧辯督杜龕據吳興兵衆甚盛武帝密令帝還  
長城立柵備之龕遣將杜泰來廬掩至將士相視失色帝  
言笑自若部分益明於是衆心乃定及武帝遣周文育討  
龕帝遣將軍劉澄將元舉攻下龕拜會稽太守武帝受禪  
立為臨川王夢梁武帝以寶刀授已周文育侯安都之敗  
於沌口武帝詔帝入樞軍政尋命率兵城南皖永定三年  
六月丙午武帝崩皇后稱遺詔徵帝入纂皇統甲寅至自  
南皖入居中書省皇后令帝嗣膺寶籙帝辭讓至丁再三  
公卿固請其日即皇帝位於太極前殿大赦詔州郡悉停  
奔赴秋七月丙辰尊皇后為皇太后辛酉以司空侯瑱為

太尉以南豫州刺史侯安都為司空以南徐州刺史徐度  
為侍中中撫軍將軍開府儀同三司乙丑重雲殿災八月  
庚戌立皇子伯茂為始興王奉昭烈王後徙封始興嗣王瑱  
為安成王九月辛酉立皇子伯宗為皇太子王公以下賜  
帛各有差乙亥立妃沈氏為皇后冬十月甲子齊文宣帝  
殂十一月乙卯王琳寇大雷詔太尉侯瑱司空侯安都儀  
同徐度禦之是歲周明帝改天王稱皇帝後建年號曰武  
成元年

天嘉元年春二月癸丑大赦改元詔賜鰥寡孤獨不能自  
存者人粟五斛孝悌力田殊行異等加爵一級甲寅分遣

使者宣勞四方辛酉祀南郊詔賜人爵一級二月丙申太尉侯瑱敗王琳于梁山敗齊兵于博望禽齊將劉伯球王琳及其主蕭莊奔齊庾子分遣使者齎書宣勞四方乙巳遣太尉侯瑱鎮益城庚戌立武帝第六子昌為衡陽王三月丙辰蕭莊所署郢州刺史孫瑒舉州內附丁巳江州刺史周迪平南中斬賊帥熊曇朗傳首建鄴戊午齊軍棄魯山城走詔南豫州刺史程靈洗守之丙子衡陽王昌沈于江夏四月丁亥立皇子伯信為衡陽王奉獻王後辛丑周明帝崩六月辛巳改謚皇祖妣景安皇后曰景文皇后壬辰詔改葬梁元帝於江寧舊墓車騎禮章悉同梁典仍

依魏葬漢獻帝故事甲午追策故始興昭烈王妃曰孝妃辛丑國哀周忌上臨于太極前殿百僚陪哭赦建鄴殊死以下秋七月丙辰立皇子伯山為番陽王八月壬午齊孝昭帝廢其主殷而自立戊子詔非兵器及國容所須金銀珠玉衣服雜玩悉皆禁斷丁酉幸正陽堂閱武九月癸丑彗星見乙卯周將獨孤盛領水軍趣巴湘與賀若敦水陸俱進太尉侯瑱自尋陽禦之冬十月癸巳侯瑱襲破獨孤盛於楊葉洲盛登岸築城自保丁酉詔司空侯安都率眾會侯瑱南拒周軍十二月己亥周巴陵城主尉遲憲降庚子獨孤盛潛遁走

二年春正月庚戌大赦辛未周湘州城主殷亮降湘州平  
二月庚寅曲赦湘州諸郡三月乙卯太尉湘州刺史侯瑱  
薨夏六月己亥齊人通好林七月丙午周將賀若敦遁歸  
武陵天門南平義陽河東宜都郡悉平九月甲寅詔以故  
太尉侯瑱故司空周文育故開府儀同三司杜僧明故中  
護軍胡穎故領軍陳擬配食武帝廟庭冬十月癸丑霍州  
西山蠻率部內屬乙卯高麗國遣使朝貢十一月甲辰齊  
孝昭帝殂十二月甲申立始興國廟于都下用王者禮以  
國用不足立考父海鹽傳及推酤科先是緡州刺史留異應  
王琳丙戌詔司空侯安都討之是歲周武帝保定元年

三年春正月庚戌設帷宮於南郊幣告胡公以配天辛亥  
祀南郊詔賜人爵一級孝悌力田加一等二月梁宣帝殂  
閏月己酉以百濟王餘明爲撫東大將軍高麗王高湯爲  
寧東將軍江州刺史周迪舉兵應留異甲子改鑄五銖錢  
三月丙子安成王頊至自周丁丑以安右將軍吳明徹爲  
安南將軍江州刺史督衆軍南討甲申大赦庚寅司空侯  
安都破留異於姚支嶺異奔晉安東陽郡平夏四月癸卯  
曲赦東陽郡乙巳齊人來聘秋七月己丑皇太子納妃王  
氏在位文武賜帛各有差孝悌力田爲父後者賜爵二級  
九月戊辰朔日有蝕之以侍中到仲舉爲尚書右僕射丁

周迪請降

四年春正月丙子平阇利國遣使朝貢甲申周迪走投閩  
州刺史陳寶應納之夏四月辛丑設無昇大會捨身於太  
極前殿乙卯加驃騎將軍揚州刺史安成王瑱開府儀同  
三司六月癸巳司空侯安都賜死秋九月壬戌開府儀同  
三司廣州刺史歐陽頔薨癸亥曲赦都下辛未周迪復寇  
臨川詔護軍將軍章昭達討平之冬十二月丙申大赦詔  
昭達進軍建安討陳寶應

五年春三月壬午詔以故護軍將軍周鐵武配食武帝廟  
庭夏五月周齊並遣使來聘秋七月丁丑曲赦都下九月

城西城冬十一月己丑章昭達禽陳寶應留異送建鄴晉

安郡平甲辰以護軍將軍章昭達為鎮軍將軍開府儀同

三司十二月甲子曲赦建安晉安二郡討陳寶應將士死

王事者並給棺槨送還本鄉并復其家癸未齊人來聘

六年春正月甲午皇太子加元服王公以下賜帛各有差

孝悌力田為父後者賜爵一級鰥寡孤獨不能自存者穀

人五斛夏四月甲寅以開府儀同三司揚州刺史安成王

瑒為司空五月齊武成帝傳位於太子緯自號太上皇帝

六月辛酉彗星見于上台北周人來聘秋七月癸未有大

風自西南至廣百餘步激壞靈臺扶樓甲申儀賢堂無故

自壞丙戌臨川太守駱牙斬周迪傳首建鄴梟於朱雀航  
八月己卯立皇子伯固為新安王伯恭為晉安王伯仁為  
廬陵王伯義為江夏王九月新作大航冬十月辛亥齊人  
來聘十二月乙卯立皇子伯禮為武陵王癸亥曲赦都下  
天康元年春二月丙子大赦改元三月己卯以司空安成  
王頊為尚書令夏四月乙卯皇孫至澤生賜在位文武帛  
各有差為父後者賜爵一級癸酉皇帝崩于有覺殿遺詔  
皇太子可即君臨山陵務存儉速大斂竟群臣三日一臨  
公除之制率依舊典六月甲子群臣上謚曰文皇帝廟號  
世祖丙寅葬永寧陵文帝起自布衣知百姓疾苦國家資

用務從儉約妙識真偽下不容姦一夜內刺聞取外事分  
判者前後相續每雞人伺漏傳籤於殿中者令投籤於階  
石上鎗然有聲云吾雖得眠亦令驚覺其自彊若此云  
廢帝諱伯宗字奉業小字樂王文帝嫡長子也梁承聖三  
年五月庚寅生永定二年二月戊辰拜臨川王世丁三年  
文帝嗣位八月庚戌立為皇太子自梁室亂離東宮焚燼  
太子居于永福省天康元年四月癸酉文帝崩是日太子  
即皇帝位于太極前殿大赦詔内外文武各復其職遠方  
悉停奔赴五月己卯尊皇太后曰太皇太后皇后曰皇太  
后庚寅以司空揚州刺史新除尚書令安成王頊為司徒

錄尚書都督中外諸軍事丁酉以中軍大將軍開府儀同  
三司徐度為司空以鎮東將軍東揚州刺史始興王伯茂  
為征東將軍開府儀同三司以吏部尚書袁樞為尚書左  
僕射以兵興太守沈欽為右僕射秋七月丁酉立妃王氏  
為皇后冬十月庚申享太廟十一月乙亥周人來弔十二  
月甲子高麗國遣使朝貢是歲周天和元年

光大元年春正月癸酉尚書左僕射袁樞卒乙亥大赦改  
元賜孝悌力田爵一級辛卯祀南郊二月辛亥南豫州刺  
史余孝頃謀反伏誅三月甲午以尚書右僕射沈欽為侍  
中尚書僕射夏五月乙未湘州刺史華皎不從執政丙申

以中撫軍大將軍淳于量為征南大將軍摠舟師討之六  
月壬寅以中軍大將軍司空徐度為車騎將軍摠督都下  
衆軍自步道襲湘州秋七月戊申立皇子至澤為皇太子  
賜天下為父後者爵一級三公以下齊帛各有差九月丙  
辰百濟國遣使朝貢是月周將拓拔定入郢州與華皎水  
陸俱進都督淳于量吳明徹等大破之皎單舸奔江陵禽  
定送建鄴冬十月辛巳曲赦湘巴二州為皎所誣誤者十  
一月甲子中權將軍開府儀同三司王冲薨十二月庚寅  
以儀同三司兼從事中郎孔英哲為奉聖直侯奉孔子祀  
二年春正月己亥司徒安成王瑱進位太傅領司徒加殊

禮以新除征南大將軍淳于量為中軍大將軍及安南將  
軍湘州刺史吳明徹即本號並開府儀同三司庚子詔討  
華皎軍人死王事者並給棺槨送還本鄉仍復其家甲子  
司空徐度薨夏五月丙辰太傅安成王頊獻玉璽一六月  
丁亥彗星見秋七月戊申新羅國遣使朝貢壬戌立皇弟  
伯智為永陽王伯謀為桂陽王九月林邑狼牙脩國並遣  
使朝貢冬十一月甲寅慈訓太后令曰伯宗昔在儲宮本  
無令問及居宗極遂騁凶活太傅親承顧託義深垣屏而  
攢塗未御翌日無淹仍遣劉師知殷不佞等顯言排斥陰  
謀禍亂賴元相維持但除君側又以余老頊密適京師便  
相徵召宗社之靈於氣是滅於是密出華嚴稱兵上流國  
祚憂惶幾移醜類又別敕歐陽紇等攻逼衡州嶺表紛紛  
殊淹弦望但賊豎皆亡日望懲改而悖禮忘德情性不悛  
盪主侯法喜等太傅麾下恒游府內嗚以深利謀興肘腋  
又盪主孫泰等潛相連結大有交通天誘其衷自然開發  
此諸文迹今以相示豈可復肅恭禮祀臨御生靈今可特  
降為臨海郡王送還藩邸太傅安成王固天生德齊聖廣  
深一后鍾心三靈佇眷自前朝不豫任摠邦家威惠相宣  
刑禮兼設且地彰靈壘天表長彗布新除舊禎祥成顯文  
皇知子之賢事甚帝堯傳弟之懷又符太伯今可還申舊

志崇立賢君外宜依舊典奉迎輿駕是日帝出居別第太  
建二年四月乙卯薨時年十九帝性仁弱無人君之器及  
即尊位政刑皆歸冢宰故宣太后稱文帝遺志而廢焉  
論曰陳武帝以雄毅之姿屬殷憂之運功存拯溺道濟橫  
流應變無方蓋惟人傑及乎匹都湯覆二表陸危僧辯任  
同伊尹空結桐宮之恨貞陽入假秦兵不息穆羸之泣帝  
乘隙以舉乃蹈玄機王業所基始自於此柴天改物蓋有  
憑云文帝以宗枝承統情存兢惕加以崇尚儒術愛悅文  
義恭儉行已勤勞濟物志度弘遠有前哲之風至於臨下  
明察得永平之政矣臨海懦弱有同於帝堯文后雖欲不

鑒殷道蓋亦其可得耶

陳本紀上第九

南史九

陳本紀下第十

南史十

李

延壽

高宗孝宣皇帝諱瑱字紹世小字師利始興昭烈王第二子也梁中大通二年七月辛酉生有赤光滿室少寬容多智略及長美容儀身長八尺三寸垂手過膝有勇力善騎射武帝平侯景鎮京口梁元帝徵武帝子姪入侍武帝遣帝赴江陵累官為中書侍郎時有軍主李恁與帝有舊每同游處帝嘗夜被酒張燈而寐恁適出尋反乃見帝是大龍便驚走他室魏平江陵遷于長安帝貌若不慧魏將楊忠門客張子煦見而奇之曰此人虎頭當大貴也永定元

年送襲封始興郡王文帝嗣位改封安成王天嘉三年自  
周還授侍中中書監中衛將軍置佐吏歷位司空尚書令  
廢帝即位拜司徒錄尚書都督中外諸軍事光大二年正  
月進位太傅領司徒加殊禮劔履上殿十一月甲寅慈訓  
太后黜廢帝為臨海王以帝入繼皇統是月齊武成帝殂  
太建元年春正月甲午皇帝即位於太極前殿太赦改元  
文武賜位一階孝悌力田及為父後者賜爵一級鰥寡不  
能自存者人賜穀五斛後太皇太后尊號曰皇太后立妃  
柳氏為皇后並子叔寶為皇太子封皇子江州刺史康樂  
侯叔陵為始興王奉昭烈王祀乙未謁太廟丁酉分命大  
使觀省四方風俗以尚書僕射沈欽為左僕射度支尚書  
王勣為右僕射辛丑祀南郊壬寅封皇子建安侯叔英為  
豫章王豐城侯叔堅為長沙王二月乙亥耕藉田夏五月  
甲午齊人來聘丁巳以吏部尚書徐陵為尚書右僕射秋  
七月辛卯皇太子納妃沈氏王公以下賜帛各有差冬十  
月新除左衛將軍歐陽紇據廣州反辛未遣開府儀同三  
司章昭達討之

二年春二月癸未章昭達禽歐陽紇送都斬于建康市廣  
州平三月丙申皇太后崩丙午曲赦屬衛二州丁未大赦  
又詔自討周迪華皎以來兵所有死亡者並令收斂并給

棺槨送還本鄉夏四月乙卯臨海王伯宗薨戊寅皇太后  
祔葬于萬安陵五月壬午齊人來弔六月戊子新羅國遣  
使朝貢辛卯大雨雹乙巳分遣大使巡州郡省冤屈冬十  
一月辛酉高麗國遣使朝貢十一月癸巳雷

三年春正月癸丑以尚書右僕射徐陵為尚書僕射辛酉  
祀南郊二月辛巳祀明堂丁酉耕藉田三月丁丑大赦夏  
四月壬辰齊人來聘五月辛亥高麗新羅丹丹天竺盤盤  
等國並遣使朝貢六月丁亥江陰王蕭季卿以罪免甲辰  
封東中郎長沙王府諮議參軍蕭繇為江陰王冬十月乙  
酉周人來聘十一月壬辰司空章昭達薨

四年春正月丙午以尚書僕射徐陵為左僕射中書監王  
勣為右僕射二月乙酉立皇子叔卿為建安王三月乙丑  
扶南林邑國並遣使朝貢夏五月癸卯尚書右僕射王勣  
卒是月周人誅冢宰宇文護秋八月辛未周人來聘九月  
庚子朔日有蝕之辛亥大赦丙寅以故太尉徐度儀同三  
司杜稜程靈洗配食武帝廟庭故司空章昭達配食文帝  
廟庭冬十一月己亥地震是歲周建德元年

五年春正月癸酉以吏部尚書沈君理為尚書右僕射領  
吏部辛巳祀南郊二月辛丑祀明堂乙卯夜有白氣如虹  
自北方貫北斗紫宮三月壬午以開府儀同三司吳明徹

都督征討諸軍事略地北邊丙戌西衡州獻馬生角己丑  
 皇孫胤生内外文武賜帛各有差為父後者賜爵一級夏  
 六月癸卯周人來聘秋九月癸未尚書右僕射沈君理卒  
 壬辰晦夜明冬十月己亥以特進周弘正為尚書右僕射  
 乙巳吳明徹剋壽陽城斬王琳傳首建鄴梟于朱雀航十  
 二月壬辰詔熊曇朗留異陳寶應周迪鄧緒等及王琳首  
 並還親屬以弘廣宥乙巳立皇子叔明為宜都王叔獻為  
 河東王是歲諸軍略地所在剋捷

六年春正月壬戌赦江淮北諸州甲申周人來聘高麗  
 遣使朝貢二月壬辰朔日有蝕之辛亥耕藉田夏四月

庚子彗星見六月壬辰尚書右僕射周弘正卒冬十一月  
 乙亥詔北邊行軍之所並給復十年十二月戊戌以吏部  
 尚書王瑒為尚書右僕射

七年春正月辛未祀南郊三月辛未詔豫二兗譙徐合霍  
 南司定九州及南豫江郢所部在江北諸郡置雲旗義士  
 往大軍及諸鎮備防夏四月丙戌有星孛于大角庚寅監  
 豫州陳桃根獻青牛詔以還百姓乙未桃根又上織成羅  
 紋錦被表各二詔於雲龍門外焚之壬子郢州獻瑞鍾六  
 六月丙戌詔為北行將士死王事者剋日舉哀壬辰以尚  
 書右僕射王瑒為尚書僕射己酉改作雲龍神獸門秋八

月癸卯周人來聘閏九月壬辰都督吳明徹大破齊軍於  
呂梁是月甘露頻降樂游苑丁未輿駕幸苑採甘露宴群  
臣詔於苑龍舟山立甘露亭癸十月己巳立皇子叔齊為  
新蔡王叔文為晉熙王十二月壬戌以尚書僕射王瑒為  
左僕射太子詹事陸繕為右僕射甲子南康郡獻瑞鍾一  
八年春二月壬申以開府儀同三司吳明徹為司空夏五  
月庚寅尚書左僕射王瑒卒冬月甲寅以尚書右僕射陸  
繕為左僕射新除晉陽太守王克為右僕射秋九月戊戌  
立皇子叔彪為淮南王

九年春正月乙亥齊主傳位於其太子恒自號太上皇是  
月周滅齊二月壬子耕藉田秋七月己卯百濟國遣使朝貢  
庚辰大雨震萬安陵華表己丑震慧日寺刹及瓦官寺重  
門一女子震死冬十月戊午司空吳明徹破周將梁士彥  
於呂梁十二月戊申東宮成皇太子移于新宮

十年春二月甲子周軍救梁士彥大敗司空吳明徹於呂  
梁及將卒皆見囚俘不反三月辛未震武庫丙子分命眾  
軍以備周乙酉大赦夏四月庚戌詔絰在軍者並賜爵二  
級又詔御府堂署所營造禮樂儀服軍器之外悉皆停息  
掖庭常供王侯妃主諸有奉卹者並各量減庚申大雨雹  
六月丁酉周武帝崩閏六月丁卯大雨震大皇寺刹莊嚴

寺露盤重陽閣東樓千秋門內槐樹及鴻臚府門秋七月  
戊戌新羅國遣使朝貢八月戊寅隕霜殺稻菽九月乙巳  
立方明壇于婁湖戊申以揚州刺史始興王叔陵兼王官  
泊臨盟甲寅幸婁湖臨誓衆乙卯分遣大使以盟誓班下  
四方以上下相警冬十月戊子以尚書左僕射陸繕為尚  
書僕射十二月乙亥合州廬江蠻田伯興出寇樅陽刺史  
魯廣達討平之是歲周宣政元年

十一年春正月丁酉南兖州言龍見二月癸亥耕藉田秋  
七月辛卯初用大貨六銖錢八月丁卯幸大壯觀閱武冬  
十月甲戌以尚書僕射陸繕為尚書左僕射以祠部尚書

晉安王伯恭為右僕射十一月辛卯大赦戊戌周將梁士  
彥圍壽陽尅之辛亥又尅霍州癸丑以揚州刺史始興王  
叔陵為大都督總督水步衆軍十二月乙丑南北兗晉三  
州及盱台山陽陽平馬頭秦歷陽沛北譙南梁等九郡民  
並自拔向建鄴周又尅譙北徐二州自是淮南之地盡歸  
于周矣己巳詔非軍國所須多所減損歸于儉約是歲周  
宣帝大象元年

十二年夏四月癸亥尚書左僕射陸繕卒己卯大雩壬午  
雨五月癸巳以尚書右僕射晉安王伯恭為尚書僕射己  
酉周宣帝崩六月壬戌大風吹壞臯門中閨秋八月己未

周鄖州摠管司馬消難以所統九州八鎮之地來降詔因以消難為大都督加司空封隨郡公庚申詔鎮西將軍樊毅進督沔漢諸軍事遣南豫州刺史任忠率衆趨歷陽超武將軍陳慧紀為前軍都督趨南兖州戊辰以司空司馬消難為大都督水陸諸軍事庚午通直散騎常侍淳于陵赴臨江郡癸酉智武將軍魯廣達剋郭默城甲戌大雨霖丙子淳于陵剋祐州城九月癸未周臨江太守劉顯光率衆來降是夜天東南有聲如風水相激三夜乃止丁亥周將王延貴率衆援歷陽任忠擊破之禽延貴等己酉周廣陵義軍主曹藥率衆來降冬十月癸丑大雨震電十二月

庚辰南徐州刺史河東王叔獻薨

十三年春正月壬午以中權將軍護軍將軍鄒陽王伯山即本號開府儀同三司以尚書僕射晉安王伯恭為左僕射吏部尚書袁憲為右僕射二月乙亥耕藉田秋九月癸亥夜大風從西北來發屋拔樹大雨雹冬十月壬寅丹丹國遣使朝貢十二月辛巳彗星見西南是歲周靜帝大定元年遜位于隋文帝改元開皇元年

十四年春正月己酉上弗豫甲寅崩于宣福殿時年五十三遺詔凡厥終制事從省約金銀之飾不以入壙明器皆用瓦以日易月及公除之制悉依舊準在位百司三日一

臨四方州鎮五等諸侯各守所職並停奔赴二月辛卯群  
臣上諡曰孝宣皇帝廟號高宗癸巳葬顯寧陵帝之在田  
本有恢弘之度及居尊位寔允天人之屬于時國步初弭  
創痍未復淮南之地並入于齊帝志復舊境意反侵地疆  
弱之形理則縣絕犯斯不韙適足為禽及周兵滅齊乘勝  
而舉略地還至江陰自此懼矣既而脩飾都城為扞禦之  
備獲銘云二百年後當有癡人脩破吾城者時莫測所從云  
後主諱叔寶字元秀小字黃奴宣帝嫡長子也梁承聖二  
年十一月戊寅生于江陵明年魏平江陵宣帝遷于長安  
留後主於穰城天嘉三年歸建鄴立為安成王世子光大  
二年累遷侍中太建元年正月甲午立為皇太子十四年  
正月甲寅宣帝崩乙卯始興王叔陵構逆伏誅丁巳太子  
即皇帝位于太極前殿大赦在位文武及孝悌力田為父  
後者並賜爵一級孤老鰥寡不能自存者賜穀人五斛帛  
二匹癸亥以侍中丹陽尹長沙王叔堅為驃騎將軍開府  
儀同三司揚州刺史乙丑尊皇后為皇太后丁卯立皇弟  
叔敦為始興王奉昭烈王祀巳巳立妃沈氏為皇后辛未  
立皇弟叔儼為尋陽王叔慎為岳陽王叔達為義陽王叔  
熊為巴山王叔虞為武昌王甲戌設無尋大會於太極前  
殿三月癸亥詔內外衆官九品以上各薦一人又詔求忠

謹無所隱諱己巳以新除翊左將軍永陽王伯智為尚書  
僕射夏四月丙申立皇子永康公胤為皇太子賜天下為  
父後者爵一級王公以下賚帛各有差庚子詔鏤金銀薄  
度物化生土木人綵華之屬及布帛短狹輕踈者並傷財  
廢業尤成蠹患又僧尼道士狹邪左道不依經律人間淫  
祀祆書諸珍恠事詳為條制並皆禁絕秋七月辛未大赦  
是月自建鄴至荊州江水色赤如血八月癸未天有聲如  
風水相激乙酉夜又如之九月丙午設無尋大會於太極  
前殿捨身及乘輿御服大赦辛亥夜天東北有聲如蟲飛  
漸移西北丙寅以驃騎將軍開府儀同三司揚州刺史長  
沙王叔堅為司空征南將軍江州刺史豫章王叔英即本  
號開府儀同三司

至德元年春正月壬寅大赦改元以江州刺史豫章王叔  
英為驃騎將軍開府儀同三司以司空揚州刺史長沙王  
叔堅為江州刺史征東將軍開府儀同三司癸卯立皇子  
深為始安王秋八月丁卯以驃騎將軍開府儀同三司長  
沙王叔堅為司空九月丁巳天東南有聲如蟲飛冬十月  
丁酉立皇弟叔平為湘東王叔敖為臨賀王叔宣為陽山  
王叔穆為西陽王叔儉為南安王叔澄為南郡王叔興為  
沅陵王叔韶為樂山王叔純為新興王十二月丙辰頭和

國遣使朝貢司空長沙王叔堅有罪免戊午夜天開自西北至東南其內有青黃雜色隆隆若雷聲

二年春正月丁卯分遣大使巡省風俗癸巳大赦夏五月戊子以吏部尚書江惔為尚書僕射秋七月壬午皇太子加元服在位文武賜帛各有差孝悌力田為父後者賜爵一級鰥寡癯老不能自存者人穀五斛冬十一月丙寅大赦是月盤盤百濟國並遣使朝貢

三年春正月戊午朔日有蝕之庚午鎮左將軍長沙王叔堅即本號開府儀同三司三月辛酉前豐州刺史章大寶奉兵反夏四月庚戌豐州義軍主陳景詳斬大寶傳首建

鄴冬十月己丑丹丹國遣使朝貢十一月己未詔脩後仲尼廟辛巳幸長干寺大赦十二月癸卯高麗國遣使朝貢是歲梁明帝殂

四年春正月甲寅詔王公以下各薦所知無隔輿皂二月丙申立皇弟叔謨為巴東王叔顯為臨江王叔坦為新會王叔隆為新寧王夏五月丁巳立皇子莊為會稽王秋九月甲午幸玄武湖肆艦闕武丁未百濟國遣使朝貢冬十月癸亥以尚書僕射江惔為尚書令吏部尚書謝朓為尚書僕射十一月己卯大赦

禎明元年春正月戊寅大赦改元乙未地震秋九月庚寅

梁太傅安平王蕭巖荊州刺史蕭瓛遣其都官尚書沈君公詣荊州刺史陳紀請降辛卯巖等帥其文武官男女濟江甲午大赦冬十一月丙子以蕭巖為平東將軍開府儀同三司東揚州刺史丁亥以驃騎大將軍開府儀同三司豫章王叔英為兼司徒十二月丙辰以前鎮衛大將軍開府儀同三司東揚州刺史鄱陽王伯山為鎮衛大將軍開府儀同三司

二年春正月辛巳立皇子恮為東陽王恬為錢唐王夏四月戊申有群鼠無數自蔡洲岸入石頭淮至于青塘兩岸數日自死隨流出江是月郢州南浦水黑如墨五月甲午

東治鑄鐵有物赤色大如數升自天墜鎔所有聲隆隆如雷鐵飛出牆外燒人家六月戊戌扶南國遣使朝貢庚子廢皇太子胤為吳興王立揚州刺史始安王深為皇太子辛丑以太子詹事袁憲為尚書僕射丁巳大風自西北激濤水入石頭城淮渚暴溢漂沒舟乘冬十月己亥立皇子蕃為吳王己酉幸莫府山大校獵十一月丁卯詔剋日於大政殿讖獄丙子立皇弟叔榮為新昌王叔匡為太原王初隋文帝受周禪甚敦鄰好宣帝尚不禁侵掠太建末隋兵大舉聞宣帝崩乃命班師遣使赴弔修敵國之禮書稱姓名頓首而後主益驕書末云想彼統內如宜此宇宙清

泰隋文帝不說以示朝臣清河公楊素以為主辱再拜請  
罪及襄邑公賀若弼並奮求致討後副使袁彥聘隋竊圖  
隋文帝狀以歸後主見之大駭曰吾不欲見此人每遣間  
謀隋文帝皆給衣馬禮遣以歸後主愈驕不虞外難荒于  
酒色不恤政事左右嬖佞珥貂者五十人婦人美貌麗服  
巧態以從者千餘人常使張貴妃孔貴人等八人夾坐江  
摠孔範等十人預宴號曰狎客先令八婦人襪采箋製五  
言詩十客一時繼和遲則罰酒君臣酣飲從夕達旦以此  
為常而盛脩宮室無時休止稅江稅市徵取百端刑罰酷  
濫牢獄常滿覆舟山及蔣山栢林冬月常多采醴後主以  
為甘露之瑞前後災異甚多有神自稱老子游於都下與  
人對話而不見形言吉凶多驗得酒輒酌之經三四年乃  
去船下有聲云明年亂視之得嬰兒長三尺而無頭蔣山  
衆鳥鼓兩翼以拊膺曰柰何帝柰何帝又建鄴城無故自  
壞青龍出建陽門井涌霧赤地生黑白毛犬風拔朱雀門  
臨平湖草舊塞忽然自通後主又夢黃衣圍城乃盡去繞  
城橘樹又見大蛇中分首尾各走夜中索飲忽變為血有  
血霑階至於坐牀頭而火起有狐入其牀下捕之不見以  
為祆乃自賣於佛寺為奴以襁之於郭內大皇佛寺起七  
層塔未畢火從中起飛至石頭燒死者甚衆又采木湘州

擬造正寢棧至牛渚磯盡沒水中既而漁人見棧浮於海上起齊雲觀國人歌曰齊雲觀寇來無際畔始北齊末諸省官人多稱省主未幾而滅至是舉朝亦有此稱識者以為省主主將見省之兆隋文帝謂僕射高頴曰我為百姓父母豈可限一衣帶水不拯之乎命大作戰船人請密之隋文帝曰吾將顯行天誅何密之有使投枳於江若彼能改吾又何求及納梁蕭巖蕭巖隋文愈忿以晉王廣為元帥督八十摠管致討乃送璽書暴後主二十惡又散寫詔書書三十萬紙徧喻江外諸軍既下江濱鎮戍相繼奏聞新除湘州刺史施文慶中書舍人沈客卿掌機密並抑而不言初蕭巖蕭巖之至也德教學士沈君道夢巖前長人朱衣武冠頭出欄上攘臂怒曰那忽受叛蕭巖誤人事後主聞之忌二蕭故遠散其眾以巖為東揚州刺史巖為吳州刺史使領軍任忠出守吳興郡以襟帶二州使南平王嶷鎮江州永嘉王彥鎮南徐州尋召二王赴期明年元會命緣江諸防船艦悉從二王還都為威勢以示梁人之來者由是江中無一關船主流諸州兵皆阻揚素軍不得至都下甲士尚十餘萬人及關隋軍臨江後主曰二王氣在此齊兵三度來周兵再度至無不摧沒虜今來者必自敗孔範亦言無度江理但奏伎縱酒作詩不輟

三年春正月乙丑朔朝會大霧四塞入人鼻皆辛酸後主  
昏睡至晡時乃罷是日隋將賀若弼自北道廣陵濟韓擒  
趨橫江濟分兵晨襲採石取之進拔姑熟次於新林時弼  
攻下京口緣江諸戍望風盡走弼分兵斷曲阿之衝而入  
丙寅採石戍主徐子建至告變戊辰乃下詔曰大羊陵縱  
侵竊郊畿蠱毒有甚宜時埽定朕當親御六師廓清八表  
內外並可戒嚴於是以前摩訶為皇畿大都督樊猛為上  
流大都督樊毅為下流大都督司馬消難施文慶並為大  
監軍重立賞格分兵鎮守要隘僧尼道士盡皆執役庚午  
賀若弼攻臨南徐南徐未幾韓擒又陷南豫州隋軍南北道

並進辛巳賀若弼進軍鍾山頓白土岡之東南眾軍敗績  
弼乘勝進軍宮城燒北掖門是時韓擒率眾自新林至石  
子岡鎮東大將軍任忠出降擒仍引擒經朱雀航趣宮城  
自南掖門入城內文武百司皆遁出唯尚書僕射袁憲後  
閣舍人夏侯公韻侍側憲勸端坐殿上正色以待之後主  
曰鋒刃之下未可及當吾自有計乃逃於井二人苦諫不  
從以身蔽井後主與爭久之方得入沈后居處如常太子  
深年十五閉閣而坐舍人孔伯魚侍焉戍士叩閣而入深  
安坐勞之曰戎旅在塗不至勞也既而軍人窺井而呼之  
後主不應欲下石乃聞叫聲以繩引之驚其太重及出乃

穿聲傳會

與張貴妃孔貴人三人同乘而上隋文帝聞之大驚開府  
鮑宏曰東井上於天文為秦公主都所在投井其天意邪  
先是江東謠多唱王獻之桃葉辭云桃葉復桃葉度江不  
用楫但度無所苦我自接迎汝及晉王廣軍於六合鎮其  
山名桃葉果乘陳船而度丙戌晉王廣入據臺城送後主  
于東宮三月己巳後主與王公百司同發自建鄴之長安  
隋文帝權分京城人宅以俟內外脩整遣使迎勞之陳人  
謳詠忘其亡焉使還奏言自後主以下大小在路五百里  
嚙齏不絕隋文帝嗟歎曰一至於此及至京師列陳之輿  
服器物於庭引後主於前及前後二太子諸父諸弟眾子

之為王者凡二十八人司空司馬消難尚書令江總僕射  
表憲驃騎蕭摩訶護軍樊毅中領軍魚廣達鎮軍將軍任  
忠吏部尚書姚察侍中中書令蔡徵左衛將軍樊猛自尚  
書郎以上二百餘人文帝使納言宣詔勞之次使內史令  
宣詔讓後主後主伏地屏息不能對乃見宥隋文帝詔陳  
武文宣三帝陵樹給五戶分守之初武帝始即位其夜奉  
朝請史普直宿省夢有人自天而下導從數十至太極殿  
前北面執玉策金字曰陳氏五帝三十二年及後主在東  
宮時有婦人突入唱曰畢國主有鳥一足集其殿庭以觜  
畫地成文曰獨足上高臺盛草變為灰欲知我家處朱門

當水開解者以為獨足蓋指後主獨行無眾盛草言荒穢  
隋承火運草得火而灰及至京師與其家屬館於都水臺  
所謂上高臺當水也其言皆驗或言後主名叔寶反語為  
少福亦敗亡之徵云既見宥隋文帝給賜甚厚數得引見  
班同三品每預宴恐致傷心為不奏兵音後監守者奏言  
叔寶云既無秩位每預朝集願得一官號隋文帝曰叔寶  
全無心肝監者又言叔寶常耽醉罕有醒時隋文帝使節  
其酒既而曰任其性不爾何以過日未幾帝又問監者叔  
寶所嗜對曰嗜驢肉問飲酒多少對曰與其子弟日飲一  
石隋文帝大驚及從東巡登芒山侍飲賦詩曰日月光天

德山川遊帝居太平無以報願上東封書并表請封禪隋文  
帝優詔謙讓不許後從至仁壽宮常侍宴及出隋文帝目  
之曰此敗豈不由酒將作詩功夫何如思安時事當賀若  
弼度京口彼人密啓告急叔寶為飲酒遂不省之高頴至  
日猶見啓在牀下未開封此亦是可矣蓋天亡也昔苻氏  
所征得國皆榮貴其主苟欲求名不知違天命與之官乃  
違天也隋文帝以陳氏子弟既多恐京下為過皆分置諸  
州縣每歲賜以衣服以安全之後主以隋仁壽四年十一  
月壬子終於洛陽時年五十二贈大將軍封長城縣公謚  
曰煬葬河南洛陽之芒山

論曰陳宣帝器度弘厚有人君之量文帝知冢嗣仁弱早  
存太伯之心及乎弗念咸已委託矣至於續業之後拓土  
開疆蓋德不逮文智不及武志大不已晚致呂梁之敗江  
左日蹙抑此之由也後主因削弱之餘鍾滅亡之運刑政  
不樹加以荒淫夫以三代之隆歷世數十及其亡也皆敗  
於婦人況以區區之陳外鄰明德覆車之跡尚且追蹤叔  
季其獲支數年亦為幸也雖忠義感慨致慟井隅何救麥  
秀之深悲適足取笑乎千祀嗟乎始梁末童謠云可憐巴  
馬子一日行千里不見馬上郎但見黃塵起黃塵汗人衣  
卓茨相料理及僧辯滅群臣以謠言奏聞曰僧辯本乘巴  
馬以擊侯景馬上郎王字也塵謂陳也而不解卓茨之謂  
既而陳滅於隋說者以為江東謂殺羊角為卓茨隋氏姓  
楊楊羊也言終滅於隋然則興亡之兆蓋有數云

陳本紀下第十

南史十

南史補遺一

七



